

NITASVITAI IRAI SALM.

SALM 1.

1 Et mun ahes moiĵ a natimi ineig, et eti ehrado aien im ilpu atimi auatatimi, un eti aiji an nefalaig o ilpu atimi ago nedo has, um eti ateuc an nitai tec o ilpu atimi imiafak ahcil.

2 Ja et imiacitak intas alep o Ihova aien; et lep aktaktai intas alep o un aien ira iĵi adiat im niĵi epeg.

3 Et idivaig nauincai aien eris ahoaig ui rai wai, et oho an naopan noho o un; inyi ti imlai nerin; et lep upene niĵi itai asega et ago aien.

4 Era eti ucce a ilpu atimi auatatimi: ja era idivaig narasi itai ara et ahladaig nintinjop.

5 Va nitai ineigki eri eti amen aktit a ilpu atimi auatatimi uhuit asuptecnaig nintan imi ra, im lep ilpu atimi ago nedo has an nasjapicnaig o ilpu atimi upene.

6 Et idim ato nedo o ilpu atimi upene a Ihova, ja uhpu auahas ilpu atimi auatatimi an nefalaig has ura.

SALM 2.

1 Era auri a ilpu atimi aupat par etaauh, era lep auri a nup iran pece par aktaktai intakitai?

2 Era atidai a ilpu atimarid an nobohtan, era lep tastas jipe a ilpu atimi alupas vai Ihova, im lep yin is ati yin aien, um ika,

3 Intumu atgeig yi amud inwau urau akaija, um erekhaig pan jaula urau.

4 Etpu laav aien et amen an nohatag aien: etpu imiafak ahcil ra a Natimarid.

5 Etpu lep tas tavaitaup ehele ra aien, erupu lep imtitaig ara va nedemda alupas o un.

6 Ja kis ati natimarid imi nyak ainyak iĵinies a Saion nedoon itaup unyak.

7 Ekpu asuptecnaig intas alep ainyak: is ika ehelek a Ihova, Nai Hal unyak aiek; ek mun apos euc ainyak an nadiat ineigki.

8 Namu ugni nyak aiek, ekpu alupai euc nup ira iĵi pece ainyak mika unyum, im lep nobohtan asega mika an ohuun aiek.

9 Napu auahas ra aiek an nelop hat; napu auhoig yi agre ra aiek et idivaig nipjinitai er ago an nobohtan apol.

10 Va nitai ineigki akumu arapakau aijaua, ak ilpu atimarid: akumu ato itai aijaua, ak ilpu atimi alupas an nobohtan.

11 Akumu imtitaig Ihova aijaua um aheca o un, akumu lep imiacitak aijaua um ucjucjucaij.

12 Akumu aijumni Inhal o un aijaua, va yi jim edemda aien, um auahas caua an nefalaig has unyimia et wat ere intavaitaup o un. Era mun ahes moiĵ ara asega era asgeig iran ara.

SALM 3.

1 Ak Ihova, era ahinag a ilpu atimi tak atimi irak; era lep ahinag acen ara era atidai ara um amcel vai nyak.

2 Era ahinag acen ara era tas vai nyak ara, um ika, Inyi ti imiatamaig yin a Atua. Sela.

3 Ja na itai adahpoi nyak aiek, ak Ihova; ek esjilid ainyak vai euc; as lep imiatidai jai nidjinik aiek.

4 Kis ahlaig vai Ihova ainyak an nohrak; is atahajjeg intas unyak aien an nedoon itaup o un. Sela.

5 Kis asjeuc ainyak um umjeg; kis aiji lahlah ainyak: is idim aminjinai nyak a Ihova.

6 Ek eti imtitaig natimi et ahinag acen ainyak, era aiji arahed irak ara.

7 Namu atidai aiek, ak Ihova; imiatamaig nyak aiek, ak Atua unyak; as auad neduon nahpa ilpu atimi tak atimi irak asega aiek; as ahti nejei ilpu atimi auatimi aiek.

8 Et ahes ehele Ihova nitai imiatamaig atimi vaig: etmu amen intas aces yi aloai unyum ira ilpu atimi unyum. Sela.

SALM 4.

1 Namu atahajjeg intas unyak aiek im nahlaig unyak, ak Atua upene unyak: as imiatamaig nyak aiek an nohacred unyak; namu aiheuc vai nyak aiek um atahajjeg nalaigaheni unyak.

2 Ak ilpu atimi alupas, akupu imiasuol natimi alupas unyak aijaua, um yet pan an nahopan? akupu aktaktai intaktai aijaua, um ago nedo ahcil um yet pan an nahopan? Sela.

3 Akumu lep ato aijaua mika is ehtai imi yin a Ihova natimi ineig et upene aien: ekuit ahlaig vai Ihova ainyak etpu atahajjeg aien.

4 Akumu imtitaig aijaua, um jim ago tah nedo has; akumu aktaktai anliinmopomia aijaua an tinamia, um tup eclim amen. Sela.

5 Akumu ahlap aijaua irai itai ahlap inivaijec, um asgeig irai Ihova.

6 Era ika matimi et ahinag, Etpu ehvaig ehelaija tah nitai upene a di? Ak Ihova, etmu lah nesgan- imtam aiek vai cama.

7 As ati nimiacitak anliinmopok aiek, is esjilid iran ura is wat alupas sito im waina ura.

8 Ekpu asjeuc ainyak jam eti imtitaig, um umjeg: ak Ihovah, ekpu amen upene ache ainyak vai euc.

SALM 5.

1 Ak Ihova, namu atgeig pam intikgam aiek vai intas unyak, um aktaktai nanaclelen unyak.

2 Ak Natimarid unyak, in Atua unyak, atahajjeg nahlaig unyak: ekpu ago nalaigaheni vai euc ainyak.

3 Ak Ihova, napu atahajjeg nohrak aiek an nuhiale; ekpu ati pan nalaigaheni unyak ainyak ehelum, um aijnai euc.

4 Ak Atua, na esjum aiek vai nedo has: inyi ti amen ehelum tah nitai has.

5 Eri ti amen a ilpu atimi ahnag an nuhup unyum: na amcel vai ilpu atimi ago nedo has asega aiek.

6 Napu auahas ra sji eigki aiek era asai tas ahcil ara: etpu amcel vai natimi atgei atmas im natimi efaifa a Ihova.

7 Ja inyi eche vai nyak, ekpu apam anli neom unyum ainyak va nedo aiheuc esjilid unyum; inki lep imtitaig euc ainyak um atpuse pan u neom ahlap itaup unyum.

8 Ak Ihova, namu uhup irak aiek an nedo atoh unyum va ilpu atimi tak atimi irak; namu ago atoh nefal- laig unyum aiek an nuhup unyak.

SALM, 6, 7.

9 Et eti tah intas inivaijec an nipjineucsera; et tup has ache inliinmopura ara; et ehpanitai er eti athei inhujgopul ura; era asan tas efaifa an nipjineucsera ara.

10 Ak Atua, namu aru nedo has ura aiek; etmu auahas ra naktaktai ura; namu ahlo ra aiek va nedo has ura et ahinag; era ilpu atimi tak atimi iram ara.

11 Ja erumu imiacitak ara asega era asgeig iram ara: erumu acesaces nohrai itai ara va nimiacitak ura ira iji adiat, na idim imicaho ra aiek: erumu lep imiacitak euc ara sji eigki et aiyu inliinmopura ara vai nidam.

12 Ak Ihova, napu idim ces yi aloai natimi ineig aiek et atoh nedo o un; napu arahed ra aiek an nedo aiheuc unyum et idivaig an nitai adahpoi.

SALM 6.

1 Ak Ihova, namu jim ated nyak aiek an nedemda unyum, um jim arodei nyak an tavaitaup ere unyum.

2 Ak Ihova, namu aiheuc vai nyak aiek; ek auatialidi ainyak: Ak Ihova, namu ago cehcehe nyak aiek; et emda niji eduok ainyak.

3 Et lep ohacred alupas inliinmopok ainyak: ak Ihova, napu ude nyak aiek um yet pan an nahopan?

4 Ak Ihova, namu adumoij pam aiek um aihiyi nyak; namu imiatamaig nyak aiek va naiheuc unyum.

5 Era eti imiehva euc a ilpu atimi ememas: inyi naaurineig vai euc a di uma atmas?

6 Et esvi nyak naauwe unyak; et ahga intinak ainyak irai iji epeg asega; et idin nitai ahled unyak ira idi imtak.

7 Et aupat nesganimtak ainyak va intaig unyak; et auroauro um aupat va ilpu atimi tak atimi irak asega.

8 Akumu ude nyak aijaua asega, ak ilpu atimi ago nedo has; et mun atahaijeg nohnan taig unyak a Ihova.

9 Et mun atahaijeg intas ugni unyak a Ihova; etpu adai intas alai-gaheni unyak a Ihova.

10 Erumu ehcamai a ilpu atimi tak atimi irak asega um ohacred alupas; erumu adumoij ara, um auroauro um ehcamai.

SALM 7.

1 Ak Ihova Atua unyak, ek asgeig iram ainyak: namu imicaho nyak aiek vai ra asega era atmas vai nyak ara, um aihiyi nyak.

2 Va eri jim aces nyak ara et idivaig laion, um auahas nyak, etuiti eti eteuc tah par imiatamaig nyak.

3 Ak Ihova Atua unyak, el kis ago nedo ineigki ainyak; el et eteuc nedo has an nikmak;

4 El kis ago nedo has ainyak vai etoak; (ja kis imialep yin ainyak is edemda vai nyak aien jam eti eteuc nohuun iran:)

5 Etmu ahau nyak a natimi tak atimi irak, um arop irak; maiya, etmu auahi se nyak aien an noboh-tan, um atipagki natimi alupas unyak. Sela.

6 Ak Ihova, namu atidai aiek an nedemda unyum, um ahlaahos jai euc va intavaitaup o ilpu atimi tak atimi irak: um aiji lahlah vai nyak, um ago neruvaig ira ra as asaig aiek.

7 Erumu asjapicnaig natimi inyi ahinag um arahed iram: namu lep aridjai aiek vai ra.

8 Etpu ago neruvaig ira atimi a Ihova; etmu idivaig nedo atoh unyak nintan imi nyak, ak Ihova, um lep idivaig inliinmopok inivaijec.

9 Etmu ti nedo has o ilpu atimi auatatimi; jam ikni aktit ilpu atimi upene: et idim ahilek inliinmopoi

SALM, 8, 9.

atimi im naktaktai ura a Atua et atoh nedo o un.

10 Et imicaho nyak a Atua ineig, et lep imiatamaig ilpu atimi inivaijec inliinmopura aien.

11 Et aktaktai ilpu atimi upene a Atua, ja et edemda a Atua, vai ilpu atimi auatatimi ira iji adiat.

12 El era eti adumoij an nefalaig has ura ara, etpu ati neiijin nautoga o un aien; et mun aiyihi ineen nafana o un aien, um ahcatoh pan iran.

13 Is lep amatata nij va atimi aien vai ra; is ago upene nafana o un aien vai ilpu atimi atmas vai nyak.

14 Era idim ohacred ara va nedo has, eris aktaktai intakitai ara, um ago nefafa.

15 Eris ago nehpanitai ara um ucji ubou, ja eris eduuje ara anli nehpanitai ineig eris ago ara.

16 Etpu adumoij pam nedo has ura irai idjinira, etpu lep asuol nauatatimi ura ijinjinies irai ipji epek ura.

17 Ekpu naaurineig vai Ihova ainyak va nedo atoh o un; ekpu lep acesaces nohranitai ainyak vai nidai Ihova esjilid acen.

SALM 8.

1 Ak Ihova, natimarid unyima, et esjilid nidam an nobohtan asega; et esjilid natimi alupas unyum an nohatag ijinies acen.

2 As ati nemda aiek an nipjin-eucse ilpu halav im ilpu hadi, va ilpu atimi tak atimi iram.

3 Ekuit aijidcid nohatag unyum ainyak, nauritai ira upsikman, im inmohoc im inmoijev as ikni aktit aiek;

4 Ek ika ainyak, Era he natimi mika an aktaktai yin aiek? im lep inhal o atimi mika an ateghe yin aiek?

5 As ati yin aiek mika yi upoupo tintin aien irai ilpu agelo, um lep esjilid natimi alupas o un.

6 As ati yin aiek mika yi esjilid aien ira iji auritai an nikman; as ikni niji itai asega ithan neduon aiek:

7 Siip im kurimatau asega, im lep niji itai eclim edo irai pece aleg;

8 Inman an nohatag, im numu an jop, im niji itai asega et athut irai li jop.

9 Ak Ihova Natimarid unyima, et esjilid nidam an nobohtan asega!

SALM 9.

1 Ak Ihova, ekpu imiahpas euc ainyak anliinmopok asega; ekpu asuptecnaig niji auritai asega unyum ainyak er imiali vaig.

2 Ekpu cediai euc ainyak um imiacitak: ekpu acesaces nohrai itai ainyak vai nidam, ak Atua esjilid acen.

3 Uduit imiadumoij ilpu atimi tak atimi irak, erupu ebehtau ara, um ememas an nuhup unyum.

4 As tas alep upene vai nyak aiek va nedo atoh unyak; as atauc aiek an nitai tec esjilid unyum, um tas alep atoh.

5 As ated ilpu atimi aupat aiek, as auahas ilpu atimi auatatimi aiek, as atipagki nidara aiek ira iji mesese.

6 Ak ilpu atimi tak atimi irak, er auahas ehni caua: as auahas niji uari pece aiek; er eti lep imiehva ra.

7 Ja etpu amen a Ihova ira iji mesese: is ati nitai tec o un aien mika yi tas alep iran.

8 Etpu tas alep vai atimi aien an nedo atoh o un, etpu lep asuptecnaig nimtan atoh imi nup ira iji pece aien.

9 Etpu lep aminjinaig ilpu ihki atimi a Ihova, etpu aminjinai ra aien an nohacred ura.

10 Erupu asgeig iram ara asega era ato nidam ara; ak Ihova, na eti ude ra sji eigki aiek era ahilek euc ara.

11 Akumu acesaces nohrai itai vai Ihova aijaua, et amen Saion aien: asuptecnaig nedo o un ehele nup ira iji pece.

12 Eruit aruinja ira atimi aien, etpu imiehva ra aien: et imiehva intaig o ilpu atimi upoupo aien.

13 Ak Ihova, namu aiheuc vai nyak aiek; almoi nohacred unyak vai ra era amcel vai nyak ara, kis wat ubutpotet u inmas unyak ainyak as iminusjai nyak aiek.

14 Ja ekpu asan tas imiahpas euc asega ainyak ira eucse athatahau o inhalav atahaig o Saion: ekpu imiacitak ainyak nitai imiatamaig atimi unyum.

15 Er edjo se anli nehpan itai eris ucji a ilpu atimi aupat: et lep eccen neduora an nopoig ineig eris adinaig ara.

16 Er ato Ihova va nedo ated atimi o un: era eccen a ilpu atimi auatatimi ira auritai irai ikmara. Hicaion. Sela.

17 Uhpu erekhaig ilpu atimi auatatimi an pece has, im lep nup ira iji pece aupat era eti imiehva Atua ara.

18 Eri ti ahnag irai ilpu ihki atimi ira iji adiat: eri ti aijnai itai a ilpu ikhi atimi ira iji mesese jam eti leh.

19 Ak Ihova, namu atidai aiek; va yi jim esjilid tah natimi: uhpu asuptecnaig nimtan imi nup ira iji pece an nuhup unyum.

20 Ak Ihova, namu alupai ra inliinmopura imtitai euc aiek; erumu lep ato a nup ira iji pece mika era tup takitai ache ara. Sela.

SALM 10.

1 Ak Ihova, na auri aiek par amen itac acen? na auri aiek par adinai euc ira aopan ohacred unyak?

2 Era atmas vai ilpu ihki atimi a ilpu atimi auatatimi anliinmopura ijinies; ja erupu eccen ara an nedo efaifa eris aktaktai ara.

3 Era tas emda va nitai merit u inliinmopura a ilpu atimi auatatimi, um ces yi aloai ilpu atimi has ira ra itai, ja et amcel vai ra a Ihova.

4 Era eti ahilek Atua a ilpu atimi auatatimi va nijinies u inliinmopura, era idim eti aktaktai Atua ara.

5 Et ipjin nedo ura ira iji adiat; et ehka vai ra nato vaig nedo unyum; era lep edemda ara vai ilpu atimi tak atimi ira ra asega.

6 Era ika anliinmopura ara, intupu ti amaamai akaija: inyi ti yet pam iraija tah nohacred.

7 Et ohua intas ahlaijaig im intas efaifa im intas ahcil ira ipjieucsera: et eteuc nitai has im intak itai ithai amara.

8 Era amen ara ira iji uarin atpuh iran ira iji uai pece: era atgei ilpu atimi upene ara ira iji uarin adinaig: era imiiris ilpu atimi auatialidi ara.

9 Era atpuh ara um imiiris atimi et idivaig laion a kakoai kuri o un: era atpoijinaig ilpu atimi auatialidi ara miki eri arop ira ra; era aihiaig ilpu atimi auatialidi ara an nopoig ura um anai ra iran.

10 Era atga auopauop ara um atpuse, va erupu eropse a ilpu atimi auatialidi va nemda ura.

11 Et ika inliinmopura ara, et eti imiehva a Atua: et adinaig nesgan- imtan aien; inyi ti lep ecetai aien.

12 Ak Ihova, namu atidai aiek; ak Atua, namu adaig jai nikmam aiek: jim ahnag irai ilpu atimi upoupo aiek.

SALM, 11, 12, 13.

13 Era auri a ilpu atimi auatatimi par amcel vai Atua? et ika inliinmopura ara, Napu eti alumaijidcid aiek.

14 As ecetai aiek; na mun almoi nedo has ura aiek im nedemda ura, napu lep aru an nikmam aiek: era asgeig iram a ilpu ihki atimi: na aiheuc vai ilpu umnij aiek.

15 Namu asvi nikmai ilpu atimi auatatimi aiek im ilpu atimi ago nedo has: namu ahilek nedo has ura aiek um yet pan u niti vaig o un.

16 Et Atimarid a Ihova ira iji mesese: era idim ti a ilpu atimi aupat an pece o un.

17 Ak Ihova, as atahaijeg nitai merit o ilpu atimi upoupo aiek: ago emda inliinmopura aiek: atgeig pam intikgam aiek um atahaijeg intas ura:

18 Um aktaktai ilpu umnij im ilpu atimi upoupo, va erupu eti lep ago nedo has natimi an nobohtan.

SALM 11.

1 Ek asgeig irai Ihova ainyak: eka auri aujaua par ika ehelek, Namu ahah pan aiek an nedoon unyum et idivaig inman.

2 Era aiyihi ineen nafana ura a ilpu atimi auatatimi, era ati upene nafana ura an ya ara, mika eri ahcai ilpu atimi inivaijec ara an naupat.

3 El er auahas nohun itai upene, erupu ago inhe a ilpu atimi upene?

4 Et amen a Ihova anli neom ahlap itaup o un, et eteuc dorona o Ihova an nohatag: et alum atimi an nesganimtan aien, et alumaijidcid ra aien an nohosjin nesganimtan.

5 Et ahilek inliinmopoi ilpu atimi upene a Ihova; ja et amcel vai ilpu atimi auatatimi aien, im ilpu atimi ago nedo has.

6 Etpu imiasuol nauainapit im incop im nerekwes irai ilpu atimi

auatatimi aien, im lep nehio esjilid; nimsan imi ra ineigki.

7 Et merit va nedo atoh a Ihova upene; et almoi ilpu atimi inivaijec aien an nesganimtan.

SALM 12.

1 Ak Ihova, namu imiatamaig nyak aiek; era ti a ilpu atimi upene; era lep ti a ilpu atimi inivaijec ira atimi.

2 Era asan tas ahnag natimi asega ehele ilpu etoara: et ero inliinmopura ara um lep efaifa intas ura.

3 Etpu auahas ilpu atimi tas efaifa asega a Ihova, im lep ra era tas umrigumrig ara:

4 Era ika ara, Intupu esjilid akaija va intas uja; et uja nipjineucsaija: et atimarid uja a di?

5 Et ika a Ihova, ekpu atidai ainyak va nohacred o ilpu ikhi atimi, im lep intaig o ilpu atimi auatialidi: Ekpu imiatamaig ra ainyak vai yin et edemda vai ra aien.

6 Et upene intas o Ihova: et idivaig silver er atho an nobohtan, um eceseven ago adicinadicin.

7 Napu aminjinaig ra aiek, ak Ihova, napu imiatamaig ra aiek, an naopan ineig um yet pan ira iji mesese.

8 Erupu atga a ilpu atimi auatatimi ira iji uarin asega, eruit esjilid a ilpu atimi ago nedo has.

SALM 13.

1 Ak Ihova, napu eti imiehva nyak aiek um yet pan an nahopan? Inyi yet pan ira iji mesese, ka o'o? napu adinaig nesganimtam aiek vai nyak um yet pan an nahopan?

2 Ekpu aktaktai itai ainyak um ohacred inliinmopok um yet pan an nahopan? etpu esjilid irak a natimi auatatimi irak um yet pan an nahopan?

SALM, 14, 15, 16.

3 Ak Ihova Atua unyak, namu aktaktai nyak aiek, um atahajjeg intas unyak: namu ago lah nesgan-
imtak aiek, va ki jim umjeg se ainyak um mas;

4 Va yi jim ika a natimi tak atimi irak ek esjilid iran ainyak; erupu lep imiacitak a ilpu atimi imiedo-
halav nyak ekuit etehto ainyak.

5 Ja kis asgeig an naiheuc unyum ainyak; etpu imiacitak inliin-
mopok ainyak va nimiatamaig nyak unyum.

6 Ekpu acesaces nohranitai vai Ihova ainyak, va nedo upene o un vai nyak.

SALM 14.

1 Et ika anliinmopon a natimi ahnag et eti eteuc tah Atua, Era has ara, eris ago nedo has ara, et eti ago nedo upene tah.

2 Is ias sepam a Ihova an nohatag ira atimi, par almoi kit eris ato itai tah ra, um ahilek Atua, ka o'o?

3 Eris ahnag ara asega, eris ehraş eheshas ara asega: et eti ago nedo upene tah, et idim ti.

4 Era ato itai a ilpu atimi auatatimi, ka o'o? era auahas ilpu atimi unyak ara et idivaig era caig nareto ara, um eti ahlaig vai Ihova.

5 Is esjilid acen nimtitaig ura; et idim amen a Atua ehele ilpu atimi upene.

6 Akis amcel vai naktaktai o ilpu ihki atimi aijaua, ja et imiata-
maig ra a Ihova.

7 Etmu ahes Saion nitai imiata-
maig nupu Isreel! etuit imiadu-
moij ilpu atimi o un a Ihova eris leucse pan ra erupu imiacitak a ilpu mapoi Jakob, erupu lep cedi-
aig a nupu Isreel.

SALM 15.

1 Ak Ihova, etpu amen a di anli neom atga unyum? etpu amen se a di an nedoon itaup unyum?

2 Aien et ahced nefalaig upene aien, um ago nedo atoh, um asan tas inivajjec anliimopon.

3 Aien et eti huis tas aien an nipjineucsen, um eti ago nedo has vai ilpu etoan, um eti atahajjeg intas has vai ilpu etoan.

4 Et amcel vai natimi ineig aien et atimi auatatimi aien: ja et imiahpas ra sji eigki aien era imtita-
tai Ihova ara: et asan tas up yi asaig aien, ja et wat has vai yin et eti adumoij iran aien.

5 Et eti ahtai mune o un aien mika yi lep leh neruvaig alupas; et eti leh nimitan va ilpu atimi upene aien. Aien et ago nedo ineigki aien inyi ti etehto aien.

SALM 16.

1 Ak Atua, namu imiatamaig nyak aiek: ek asgeig iram ainyak.

2 Kis ika ehele Ihova ainyak, na Atimarid unyak aiek: et eti yet pan ehelum nedo upene unyak;

3 Ja ehele ilpu atimi upene an nobohtan, im ilpu atimi esjilid, ek imiacitak alupas ra ainyak.

4 Etpu ahinag nohacred ura era ahilek intak itai ara: inki ti ahlap ainyak ira iji itai ahlap ura er umni, um eti asa nidara an nipjineucsek.

5 Et unyak a Ihova, et lep ohua nipjinitai unyak vai ym: na ago aktit namen unyak aiek.

6 Er ikni niji itai upene vai nyak; et lep upene namen unyak.

7 Ekpu ago naaurineig vai Ihova ainyak is tas ehelek aien: et lep ated nyak inliinmopok ira iji epeg.

SALM, 17, 18.

8 Ek ati Ihova an nuhup unyak ainyak ira iji adiat: et amen aien an matak, va nitai ineigki inki ti etehto ainyak.

9 Et idim imiacitak inliinmopok ainyak, et lep cediaig nesgak: etpu lep atumop upene nohuk.

10 Napu eti ude nyak aiek uma atmas inyi ti mutit a Natimi Upene unyum vai euc.

11 Napu ehvaig ehelek nefalaig umoh aiek: et eteuc nimiacitak esjilid an nuhup unyum; uhpu lep cediaig an matam ira iji mesese.

SALM 17.

1 Ak Ihova, namu aktaktai nedo atoh unyak aiek, um atahajjeg nahlaig unyak; namu adai intas alaig-aheni unyak aiek, et eti efaifa intas unyak.

2 Namu tas alep vai nyak aiek; um almoi nedo atoh unyak an nesganimtam.

3 Na ato nyak aiek; as ateghe nyak aiek an nepeg; as ahilek inliinmopok aiek, jam eti ecetai tah nitai; kis asaig ainyak mika inyi ti ahes intas ahnag an nipjineucsek.

4 Era ago nedo has atimi, ja kis ude nefalaig o ilpu atimi auatitimi ainyak va intas unyum.

5 Namu atau imi nyak aiek an nefalaig unyum va ki jim ebehtau ainyak.

6 Kis ahlaig vai euc ainyak, ak Atua, napu lep atahajjeg intas unyak aiek: namu atgeig pam ehelek intikgam aiek, um aktaktai intas unyak.

7 Namu ehvaig naiheuc esjilid unyum aiek, na imiatamaig ra sji eigki aiek era asgeig iram ara vai ilpu atimi tak atimi ira ra an nikman emda.

8 Namu aminjinaig nyak aiek et idivaig nauanagapeg an nesganim-

tam; um aibuthan nyak ithan naiyu an nehpan,

9 Vai ilpu atimi auatatimi era ago nedo has vai nyak ara, im ilpu atimi atmas piv vai nyak, era arahed irak ara.

10 Et ipjin inliinmopura ara: era asan tas ijinies ara an nipjineucsera.

11 Era arahed irama ara an nedo asega unyima: era apakapak ara um amah irama;

12 Et idivaig laion et merit aien natgei vaig itai, um lep idivaig inhakli laion et atpuh aien ira iji uarin adinaig.

13 Ak Ihova, namu atidai aiek, um atapanes ra, um imiasuol ra; namu imiatamaig nyak aiek vai ilpu atimi auatatimi an nautitoga unyum,

14 Im lep ilpu atimi era ikmam ara, ak Ihova, im natimi an noboh-tan era ohuun itai ara an naopan ineig, na alupai ra niji esjilid et ahinag aiek; era ahinag a ilpu hal ura, era lep ude niji itai ura ara imi ilpu hal ura.

15 Ja ekpu almoi nesganimtam ainyak anliinmopok upene: ekpu imiacitak ainyak ekuit nusjai ainyak um idivai euc.

SALM 18.

1 Et aiyu inliinmopok ainyak vai euc, ak Ihova, nemda unyak.

2 Et hehteuc unyak a Ihova, im nathatahau unyak, et lep imiatamaig nyak aien; et Atua unyak aien, im nemda unyak, ek asgeig iran ainyak; et itai aibuthan nyak aien, im nitai imiatamumoh emda nyak, im nuarin amen upene unyak.

3 Ekpu ahlaig vai Ihova ainyak um imiahpas yin: ja uhpu imiatamaig nyak vai ilpu atimi tak atimi irak.

4 Is arahed irak nohacred va

SALM, 18.

inmas, kis lep imtitaig ainyak vai ilpu atimi auatatimi is ahinag.

5 Is arahed irak nohacred ira uma atmas; is yet pam irak inwau an mas.

6 Kis ahlaig vai Ihova ainyak an nohacred unyak, um ugni Atua unyak: is atahajjeg nohrak aien anli neom ahlak o un, is aridjai nahlaig unyak an nuhup o un um yet pan irai tikgan.

7 Is ahcatina nobohtan um uc-rucraig; is lep amaamai nuhni se u iji edoon um ucjucjucaig, va inta-vaitaup o un.

8 Is ahes nadran cop an mun gedjin, is lep cas incop an nipjin-eucsen: eris atni humla iran.

9 Is lep imiade pam nohatag aien, um asuol se: is amen naupat ithan neduon.

10 Is atga ijinies a jerub aien, um ae; is idim ae aien ijinies an nehpan nintinjop.

11 Is uarin adinaig o un naupat; is aiyu iran nahpoi u incopda, im naupat an nohatag.

12 Is ae naupat va najjoran lah an nuhup o un, hion im inmehlai cop.

13 Is munuka an nohatag a Ihova, eris lep atahajjeg nohrai Atua es-jilid acen; hion im inmehlai cop.

14 Is idim aticijaig nafana o un aien um imiterimterim; is lep adia an nauainapit aien um auahas ra.

15 Is ame injop, eris lep ecetai niji uarin uboubo va intas ated un-yum, ak Ihova, im nohran gedjum.

16 Is arahpan va nikman an no-hatag aien, um arop irak, um aihiacse nyak irai wai is ahinag.

17 Is imiatamaig nyak aien va natimi tak atimi irak emda, im lep vai ilpu atimi amcel vai nyak; eris esjilid irak ara.

18 Eris ahtag pam ehelek ara an

naopan ohacred unyak; ja is atau imi nyak a Ihova.

19 Is ati nyak an nuarin lah aien: is imiatamaig nyak aien va naiyu u inliinmopon vai nyak.

20 Is aru irak a Ihova is idivaig nedo upene unyak; is aiheuc vai nyak aien is idivaig nadicinadicin u nikmak.

21 Kis ahced nefalaig o Ihova ainyak, um eti ago nedo has um ude Atua unyak.

22 Is amen intas alep asega o un an nuhup unyak, kis eti aticijaig intas o un ainyak.

23 Kis lep ago nedo atoh an nuhup o un ainyak, um ude nedo has unyak.

24 Va nitai ineigki is aru irak a Ihova is idivaig nedo upene unyak, is idivaig nadicinadicin u nikmak an nuhup o un.

25 Namu ago nedo aiheuc aiek vai ra sji eigki era ago nedo aiheuc vai atimi ara; namu ago nedo atoh aiek vai natimi ineig et ago nedo atoh aien.

26 Namu ago nedo upene aiek vai ilpu atimi upene; namu imiisjis aiek ehele ilpu atimi imiisjis itai.

27 Napu imiatamaig ilpu atimi upoupo aiek, ja napu imiasuol ilpu atimi ijinies aiek.

28 Napu atni lamp unyak aiek: etpu ago lah naupat unyak a Ihova Atua unyak.

29 Kis ahau ilpu ucsupo ainyak vai euc; kis lep ahtalegaunyi nat-hatahau ainyak va Atua unyak.

30 Et upene asega nedo o Atua: et adicinadicin intas o Ihova: et itai aibuthan ra asega aien era asgeig iran ara.

31 Et Atua ache a Ihova; et lep hehteuc a Atua uja ache.

32 Et alupai nyak nemda a Atua ache: et lep atau irak aien an nefa-laig atoh.

33 Et ago neduok aien mika yi

SALM, 19.

idivaig nedui haint, et lep ati nyak aien ira iji uarin ijinies unyak.

34 Et esege imi nyak aien par ago nedoa an nikmak, kis idim asvi inceen nafana bras ainyak an nikmak.

35 As lep adahpoi nyak aiek an nitai imiatamaig nyak: as ati akti nyak aiek an matam, ek esjilid ainyak va nedo aiheuc unyum.

36 As ago alupas nefalaig imi nyak aiek, va yi jim uiyilyik neduok ainyak.

37 Kis ahau ilpu atimi tak atimi irak ainyak, um uhum pan ra; kis eti lep adumoij ainyak um imihum pan an naopan yehki eris ememas ara.

38 Kis auad ra ainyak, eris lep auatialidi ara natidai vaig: eris eropropse ara ithan neduok.

39 As alupai nyak nemda aiek par ago nedoa: as imiasuol ra sji ehki aiek eris atidai vai nyak ara.

40 As lep ikni ehelek nauiwai ilpu atimi tak atimi irak aiek; vai ekpu auahas ilpu atimi amcel vai nyak ainyak.

41 Eris ahlaig ara, ja is eti eteuc tah par imiatamaig ra eris ahlaig vai Ihova marom, ja is eti atahaijeg ra aien.

42 Kis auad ra ainyak, eris idivaig inmoh ara et ahladiag nintinjop: kis imiterimterim ra ainyak et idivaig nohok an nefalaig.

43 As imiatamaig nyak aiek va nimiisjis itai o atimi; as ati nyak aiek mika ki esjilid ainyak irai ilpu atimi aupat: erupu aheca unyak a nup ira iji pece kis eti ato ra ainyak.

44 Eruit atahaijeg vai nyak ara erupu imiaiiji intas unyak ara: erupu atpuse an nuhup unyak a nup irai taka uarin.

45 Erupu ti a ilpu atimi et eche, erupu lep imtitaig ara irai iji uarin amen ipjin ura.

46 Et umoh a Ihova; naaurineig

va inhehteuc unyak; uhmu lep imiahpas Atua ineig et imiatamaig nyak aien.

47 Et aru nedo has vai nyak a Atua, um auahas atimi vai nyak.

48 Et imiatamaig nyak aien vai ilpu atimi tak atimi irak: maiya, na ati nya'k aiek mika ki esjilid ainyak irai ra sji eigki era atidai vai nyak ara: as imiatamaig nyak aiek vai ilpu atimi auatatimi.

49 Va nitai ineigki ekpu ago naaurineig vai euc ainyak, ak Ihova, an nuhup o ilpu atimi aupat, um acesaces nohranitai vai nidam.

50 Et imiatamaig emda natimarid o un aien; um lep aiheuc vai yin is ati yin aien, Tevit marom, im lep ilpu mapon ira iji mesese.

SALM 19.

1 Er ecetai natimi alupas o Atua an nohatag; er lep ecetai nauritai an nikman an nesganimtan nohatag.

2 Er asan tas vaig ira iji adiat, er lep ehvaig narapakau o un ira iji epeg.

3 Et ti namara um ti intas ura, er lep eti atahaijeg nohrara.

4 Is apaahni nohrara an nobohtan asega, im lep intas ura an tid an nobohtan.

5 Is ati nem atga iran aien va nagesega, et idivaig natimi leh ehgan aien et ahes anli neom o un, et lep imiacitak aien et idivaig natimi esjilid et athut emda aien.

6 Et ahes an nahaijen nohatag aien um yet pan an nahaijen: er eti adinaig tah nitai va nihlup iran.

7 Et upene asega intas o Ihova, um ahidaig inliinmopja: et inivaijec nesege o Ihova, um ago arapakau ilpu atimi eti ato itai.

8 Et atoh nedo et asuptecnaig a Ihova, um imiacitak inliinmopja: et adicinadicin intas alep o Ihova, um ago lah nesganimtaija.

SALM, 20, 21.

9 Et upene nimitai Ihova vaig, um yet pan ira iji mesese: et ini-vaijec intas alep o Ihova um upene asega.

10 Et upene mika yi esjilid inmerit o atimi vaig irai merit ura vai colt, colt upene marom um ahinag: et lep esjilid nadalei iran ira adalei irai idi hune im numehe et amen hune iran.

11 Et lep lah inliinmopoi naheca unyum vaig: inyi upene nimitan imi ra era imiaiiji ara.

12 Et ato nedo ahnag o un a di? namu ago adicinadicin nyak aiek va nedo has adinaig unyak.

13 Namu lep acaiji nyak aiek va ki jim ago nedo has esjilid ainyak; etmu jim esjilid irak: va ekpu upene ainyak, um eti amen irak nedo has et ahinag.

14 Etmu upene intas an nipjineucsek an nuhup unyum, im naktaktai u inliinmopok, ak Ihova, nemda unyak, im natimi imiatamaig nyak.

SALM 20.

1 Etmu atahaijeg intas unyum a Ihova an naopan ohacred unyum; uhmu imiatamaig euc va nidai Atua o Jakob.

2 Etmu atau imi euc aien an nuarin itaup o un, etmu lep ahes nemda unyum Saion;

3 Etmu imiehva niji itai top ahtai asega unyum aien, um aktaktai niji itai ahlap unyum er atnamud. Sela.

4 Etmu alupai euc nitai merit u inliinmopom aien, um imiaiiji naktaktai unyum.

5 Ecrupu imiacitak aijama va nimiatamaig euc, intupu lep atijai nitahlaig uja akaija an nidai Atua uja; etmu adai intas ugni asega unyum a Ihova.

6 Ek idim ato ainyak mika et imiatamaig yin a Ihova is ati yin aien; etpu atahaijeg intas o un aien an nohatag upene o un, um imiatamaig yin an matan emda.

7 Era aktaktai itai atga ura nahaiji atimi, era lep aktaktai hors ura nahaiji ra: ja ecrupu aktaktai nidai Ihova Atua uja akaija.

8 Era eropropse ara um ememas: ja inta atidai akaija um aiji aktit.

9 Ak Ihova, namu imiatamaig natimarid aiek: um atahaijeg intas unyima ecruit ahlaig vai euc aijama.

SALM 21.

1 Ak Ihova, etpu imiacitak nemda unyum a natimarid; etpu lep cediaig alupas aien va nimiatamaig yin unyum.

2 As alupai yin nitai merit u inliinmopon aiek, um eti imiaiij nitai ineig is ugni an nipjineucsen aien. Sela.

3 As auroauro aiek um alupai yin niji itai upene esjilid: as atijai an nidjinen aiek korona irai colt upene.

4 Is ugni euc aien mika yi ahinag nadiat iran, ja as alupai yin nitai umoh iran aiek ira iji mesese.

5 Et esjilid natimi alupas o un va nimiatamaig yin unyum: as alupai yin natimi alupas o un aiek im natimarid o un.

6 As ati yin aiek mika yi esjilid aien ira iji mesese: etpu imiacitak alupas aien va nesganimtam.

7 Et asgeig irai Ihova a natimarid, inyi ti etehto aien va naiheuc o Atua esjilid acen.

8 Etpu yet pan nikmam irai ilpu atimi tak atimi iram asega: uhpu aru irai ilpu atimi amcel vai euc an matam.

9 Napu ika aiek eri idivaig incop an netta-ara an naopan u intavai-

SALM, 22.

taup unyum : etpu auahas ra a Ihova an nedemda o un, etpu lep atnamud ra incop.

10 Napu auahas ilpu hal ura an nobohtan aiek, im lep ilpu mapora ehele atimi.

11 Eris aktaktai nedo has vai euc ara : eris lep anaclelra nitai has ara, ja eris eti emda ara nago vaig.

12 Erupu itai asjaaicnaig ara vai nafana unyum, naut ikni irai ya aiek an nuhup ura.

13 Na esjilid aiek, ak Ihova, va nemda unyum : erupu acesaces nohranitai aijama um imiahpas nemda unyum.

SALM 22.

1 Ak Atua unyak, ak Atua unyak, na auri aiek par ude nyak? na auri aiek par amen itac acen um eti atau imi nyak, um eti atahajeg naunyauaig unyak?

2 Ak Atua unyak, ek ahlaig ainyak an nadiat, ja na eti atahajeg aiek; im lep an nepeg, um eti atumop.

3 Ja na upene aiek, er lep imiahpas euc a nupu Isreel.

4 Eris asgeig iram a ilpu retpo- ma : eris asgeig iram ara, as lep imiatamaig ra aiek.

5 Eris ahlaig vai euc ara, as imiicaho ra aiek : eris asgeig iram ara, jam eti ehcamai.

6 Ja ek tup nimijan ainyak, um eti atimi : era atuh nyak natimi, era lep amcel vai nyak a nup iran pece.

7 Era imiafak ahcil nyak ara asega era alum nyak ara : era asalage nipjineucsera ara, um auhoig nidjina, um ika,

8 Is asgeig irai Ihova aien mika yi imiatamaig yin : etmu imiatamaig yin aien, el et imiacitak yin aien.

9 As idim atipagki nyak aiek

an nipjinetgai risik : as lep aminjinaig nyak aiek is wat alidak a risik.

10 Eris ude nyak ehelum an naopan yehki eris apos nyak : as Atua unyak aiek an naopan yehki eris eti fi apos nyak um imihum pam an naopan ineig.

11 Jim amen itac acen vai nyak; et ubutpotet pam ehelek nohacred; et lep eti eteuc tah par atau imi nyak.

12 Era arahed irak kurimatau atamaig et ahinag : era lep ahtag irak kurimatau atamaig emda Besan.

13 Era asalage nipjineucsera ara vai nyak et idivaig laion et aleg um aunyauaig.

14 Er atladoi nyak et idivaig inwai, er lep esjilieki niji eduok asega : et idivaig nasanicai iulinmopok ainyak; et ahga anli nipjinetgak.

15 Et imlai nemda unyak et idivaig nipjinitai obohtan; et apol namak an nipjineucsek; na mun ati nyak anli nehpanitai aiek.

16 Era arahed irak kuri : era atakapidjin nyak a ilpu atimi aua- tatimi : era ahcai nikmak ara im neduok.

17 Ek esvi niji eduok asega ainyak : era alum nyak ara um ahahtit irak.

18 Era ahaig napelumai unyak ira ra ara, um edaig sjipe niji itai asjaaicnaig par ato natimi ineig etpu leh nitai aso nyak aien.

19 Jim amen itac acen vai nyak ak Ihova; namu auroauro aiek um atau imi nyak.

20 Namu imiatamaig nyak aiek va nautoga; im hesgak va nemda o kuri.

21 Namu imiatamaig nyak aiek va nipjineucse laion : as lep imicaho nyak aiek va nibat o rema.

22 Ekpu asuptecnaig nidam ainyak ehele ilpu etoak : ekpu imiahpas euc ainyak an nuhup o atimi.

23 Akumu imiahpas Ihova aijaua

SALM, 23, 24.

eka imtitai yin aijaua; akumu imiahpas yin aijaua asega, ak ilpu mapoi Jakob; akumu imtitai yin aijaua asega, ak ilpu mapoi Isreel.

24 Is eti amcel vai nohacred o natimi ohacred aien, um atidjin iran; is lep eti adinaig nesganimtan aien vai yin, ja is wat ahlaig vai yin aien is atahaijeg aien.

25 Ekpu imiahpas euc ainyak an nuhup o natimi et ahinag: ekpu ehnejid intas up yi asaig unyak ainyak an nuhup ura era imtitai yin ara.

26 Erupu hag a ilpu atimi upoupo um gaije: erupu imiahpas Ihova ara sji eigki era ahilek yin ara: etpu umumoh inliinmopomia aijaua ira iji mesese.

27 Erupu aktaktai natimi asega an nobohtan um adumoij pan ehele Ihova: erupu lep ago nalaigaheni an nuhup unyum a nup ira iji pece asega.

28 Et ohuun nobohtan a Ihova: et lep atimarid aien ira iji pece.

29 Erupu hag um ago nalaigaheni ara asega era esjilid an nobohtan ara: erupu atpuse an nuhup o un ara asega era asuol anli nobohtan ara: et eti ispan umoh tah va nenda o un.

30 Erupu aheca o un natimi an tak aopan; uhpu anvi nidara par ika ilpu atimi o Ihova.

31 Erupu ehcohos ara um asup-tecnaig nedo upene o un ehele atimi an tak aopan, mika is ago nedo ineigki aien.

SALM 23.

1 Et aminjinag nyak a Ihova et idivaig natimi asgei siip: inki ti ihkin natimi ainyak.

2 Et ika aien, ki asjeuc ainyak irai efelelicai upene: et atau irak aien ubutpotet pan u inwai eclim tup yah.

3 Et imiatamumoh nyak aien; et atau irak aien irai efalaig upene va nidan.

4 Ekuit atga ainyak an nihkanse aupat acen, inki ti imtitaig tah nitai has ainyak; na idim amen ehelek aiek; ek imiacitak inmopol unyum ainyak im nisek unyum.

5 Na ago nitai caig incak aiek, an nuhup o ilpu atimi tak atimi irak, na aspi nipek unyak aiek an naraki; et ohua nipjinitai unyak um elelse.

6 Etpu idim apitac nyak nedo upene im nedo aiheuc unyum ira iji adiat an numoh unyak; ekpu lep amen ainyak anliin neom o Ihova ira iji mesese.

SALM 24.

1 Et ohuun nobohtan a Ihova, im niji itai asega iran; im lep niji pece asega, in natimi amen iran:

2 Is ati ijinies an jop aien, um lep ago aktit ijinies irai wai.

3 Etpu aridjai an lolan nedoon o Ihova a di? etpu lep aiji an nuarin itaup o un a di?

4 Aien marom et upene nikman aien, um adicinadicin inliinmopon; um eti merit vai intakitai, um eti asan tas efaifa.

5 Etpu asan tas ces yi aloai yin a Ihova, etpu lep ago nedo aiheuc vai yin a Atua ineig et imiatamaig yin aien.

6 Natimi sji eigki era ahilek yin ara, era ahilek nesganimtam ara, ak Atua o Jakob. Sela.

7 Uhmu alcacse jai itai atapanes; uhmu lep alcacse jai itai atapanas ira iji mesese; etpu atga iran a Natimarid esjilid.

8 Et Atimarid esjilid a di? Ihova marom et emda aien um esjilid, Ihova ineig et emda aien an nedoa.

9 Uhmu alcacse jai itai atapanes;

SALM, 25, 26.

uhmu lep alcacse jai itai atapanes ira iji mesese; etpu atga iran a Natimarid esjilid.

10 Natimarid esjilid ineigki a di? Ihova o ilpu agelo marom, et Atimarid esjilid aien. Sela.

SALM 25.

1 Ak Ihova et aridjai inliinmopok ainyak ehelum.

2 Ak Atua unyak, ek asgeig iram ainyak inki ti ehcamai ainyak, eri eti esjilid irak a ilpu atimi tak atimi irak.

3 Erumu idim eti ehcamai ara sji eigki era asgeig iram ara: erumu ehcamai ara era ispara ago nedo has ara.

4 Ak Ihova, namu asjaaicnaig ehelek aiek an nefalaig unyum; esege imtak nedo unyum.

5 Atau irak an nedo inivaijec unyum, um esege imtak; ak Atua, na imiatamaig nyak aiek; ek asgeig iram ainyak an nadiat asega.

6 Ak Ihova, namu imiehva nedo aiheuc esjilid unyum aiek, im nedo upene unyum; as ago aiek itu acen um imihum pam an naopan ineig.

7 Jim imiehva nedo has an takuras unyak, im nedo imipalea unyak, namu imiehva nyak aiek, ak Ihova an naiheuc unyum im nedo upene unyum.

8 Et upene a Ihova um atoh nedo o un: va nitai ineigki etpu esege imi ilpu atimi auatatimi aien an nefalaig o un.

9 Etpu atau ira ilpu atimi upo-upo aien an nedo atoh; etpu lep asjaaicnaig an nefalaig o un aien imi ilpu atimi upoupo.

10 Et upere um inivaijec nedo asega o Ihova vai ra, era apos intas up yi asaig o un ara im intas alep o un.

11 Ak Ihova, namu iknipagki ne-

do has unyak aiek va nidam; et idim esjilid.

12 Et imtitai Ihova a di? etpu atau iran aien an nefalaig ineig et merit vaig aien.

13 Etpu amen upene nesgan; erupu lep ohuun nobohtan a ilpu mapon.

14 Et amen a Ihova ehele ra era imtitai yin ara, etpu asuptecnaig ehele ra aien intas up yi asaig o un.

15 Ek aktaktai Ihova ainyak ira iji adiat; etpu atipagki neduok aien an nopoig.

16 Namu aihidai euc pam ehelek aiek, um aiheuc vai nyak; ek echem amen ainyak um ohacred.

17 Et ahinag nohacred o inliinmopok ainyak: namu imiatamaig nyak aiek va niji ohacred unyak.

18 Namu almoi nohacred unyak aiek um iknipagki nedo has asega unyak.

19 Namu aktaktai ilpu atimi tak atimi irak aiek; era idim ahinag ara; era lep amcel vai nyak ara an nedemda alupas ura.

20 Namu aminjinaig nyak aiek, um imiatamaig nyak; inki ti ehcamai ainyak: ek idim asgeig iram ainyak.

21 Uhpu imiatamaig nyak va nedo inivaijec im nedo atoh unyak; ek idim asgeig iram ainyak.

22 Ak Atua, namu imiatamaig nupu Isreel aiek, va nohacred asega ura.

SALM 26.

1 Ak Ihova, namu aktaktai nyak aiek; kis atga an nedo atoh unyak ainyak: kis lep asgeig irai Ihova ainyak; inki ti ahnag ainyak.

2 Ak Ihova, namu ahilek inliinmopok aiek, um ato nyak; namu ago adicinadicin inliinmopok aiek im naktaktai unyak.

3 Et eteuc naiheuc unyum an

SALM, 27.

nuhup unyak : kis lep atga ainyak is idivaig intas inivaijec unyum.

4 Kis eti amen ainyak ehele ilpu atimi auatatimi, inki ti lep ehredo ainyak im ilpu atimi efaifa.

5 Ek amcel vai ilpu atimi ago nedo has asega ainyak ; inki ti lep amen ainyak ehele ilpu atimi auatatimi.

6 Ekpu yiri nikmak ainyak anliinmopok upene : ja par apan u natau unyum, ak Ihova :

7 Mika ki asan tas naaurineig ainyak, um asuptecnaig nauritai imiali asega unyum.

8 Ak Ihova, et aiyu inliinmopok ainyak vai nuarin ineig et amen iran neom unyum, im lep nuarin ineig et amen iran natimi alupas unyum.

9 Jim ati nesgak ehele ilpu atimi auatatimi, im nitai umoh iran unyak ehele ilpu atimi atgei atmas :

10 Era ago nedo has ira ikmara ara, et lep ohua inmatara an nimtan nedo efaifa ura.

11 Ja ekpu idim atga an nedo atoh unyak ainyak : namu imiicaho nyak aiek, um aiheuc vai nyak.

12 Et amen aktit neduok ainyak an nuarin marara : ekpu imiahpas Ihova ainyak an nuhup o atimi.

SALM 27.

1 Et itai lah unyak a Ihova, um itai imiatamaig nyak ; ekpu imtitai di ainyak ? et imiatamumoh emda nyak a Ihova ; ekpu ucjucjucaij vai di ainyak ?

2 Eris wat ahtag irak a ilpu atimi auatatimi, ilpu atimi edemda vai nyak, im ilpu atimi amcel vai nyak marom, par auahas nyak, eris ebehtau ara um eropse.

3 El era asjapicnaig vai nyak a ilpu ucsupo et ahinag, inyi ti imti- taig inliinmopok ainyak : el er ati

nedo vai nyak, ekpu amen upene ainyak va nitai ineigki.

4 Kis ugni nitai et ethi ainyak ehele Ihova, ekpu lep ahilek ainyak ; mika ki amen ainyak anli neom o Ihova ira iji adiat an numoh unyak.

5 Et wat eteuc nohacred etpu adinaig nyak aien an naiyu o un : etpu adinaig nyak aien an nuarin adinaig anli neom atga o un ; etpu ati nyak ijinies an hehteuc aien.

6 Uhpuc alcacse nidjinik mika ki esjilid ainyak irai ilpu atimi tak atimi irak era arahed irak ara : va nitai ineigki ekpu ahlap ainyak an neon atga o un um imiacitak ; ekpu acesaces nohranitai ainyak vai Ihova.

7 Ak Ihova, namu atahajeg intas unyak aiek ekuit ahlaig vai euc ainyak an nohrak : namu lep aiheuc vai nyak aiek um adai intas unyak.

8 As wat ika aiek, Akumu ahilek nesganimtak aijava ; is ika inliinmopok ainyak ehelum, Ak Ihova, ekpu ahilek nesganimtam ainyak.

9 Namu jim adinaig nesganimtam aiek vai nyak ; jim aticijaig pan naheca unyum an nedemda unyum : as atau imi nyak aiek ; jim ude nyak, um jim amen itac acen vai nyak, ak Atua imiatamaig nyak.

10 Eruit ude nyak a etmak im risik, etpu idim aiheuc vai nyak a a Ihova.

11 Ak Ihova, esege imtak nedo unyum, um atau irak an nefalaig atoh va ilpu atimi tak atimi irak.

12 Jim aticijaig nyak imi ilpu atimi edemda vai nyak : era mun atidai vai nyak a ilpu atimi asuptecnaig intas ahcil, im ilpu atimi ahvig nedo has.

13 El kis eti ika ainyak, ki almoi nedo aiheuc o Ihova ainyak an nobohtan, el kis auatialiidi ainyak.

14 Namu asgeig irai Ihova aiek: etmu jim auatialidi inliinmopom aiek; etpu ago emda inliinmopom aien: namu asgeig irai Ihova aiek.

SALM 28.

1 Ak Ihova inhehteuc unyak, ekpu ahlaig vai euc ainyak; jim ucsimrig vai nyak aiek; el et ucsimrig vai nyak aiek, ekpu idivaig ra sji eigki ainyak era asuol anli nehpanitai ara.

2 Namu atahajjeg intas ugni unyak aiek, ekuit ahlaig vai euc ainyak, um adaig jai nikmak an nuarin itaup unyum.

3 Namu jim ahiaig pan nyak yi tup ethi pan irai ilpu atimi ago nedo has, era tas eigpa ebele ilpu etoara ara, ja et aktaktai has inliinmopura ara.

4 Namu alupai ra neruvaig aiek et idivaig nauritai ura, um lep idivaig nedo has ura: namu aru ira ra aiek et idivaig nauritai ira ikmara; inyi idivaig nedo ura nimitan imi ra.

5 Era eti aktaktai nedo o Ihova ara im nauritai an nikman, va nitai ineigki etpu auahas ra aien, um eti imiatamaig ra.

6 Naaurineig vai Ihova, is idim atahajjeg intas ugni unyak aien.

7 Et nemda unyak a Ihova, um nitai atapen nyak; is asgeig iran inliinmopok ainyak, is lep atau imi nyak aien: et idim imiacitak alupas inliinmopok ainyak; ekpu lep imiahpas yin ainyak an nohranitai unyak.

8 Et nemda ura a Ihova, et lep imiatamaig yin aien is ati yin aien an nemda o un.

9 Namu imiatamaig ilpu atimi unyum aiek, um asan tas ces yi aloai ilpu atimi unyum: namu lep aminjinai ra aiek um imiaridjai ra ira iji mesese.

SALM 29.

1 Akumu imiahpas Ihova aijaua, ak ilpu atimi alupas, akumu imiahpas nemda esjilid o un aijaua.

2 Akumu alupai Ihova nimiahpas ineig aijaua et upene vai nidan: um atpuse an nuhup o Ihova an nuarin itaup esjilid o un.

3 Et amen nohrai Ihova ijinies an jop; et munuka a Atua esjilid: et amen a Ihova ijinies irai wai et ahinag.

4 Et emda nohrai Ihova; et lep esjilid acen nohrai Ihova.

5 Er ahtasvi nauicai sitar va nohrai Ihova; et idim ahtasvi nauicai sitar Libanon a Ihova.

6 Et lep aliaujai et idivaig inhakli kurimatau vai yin; um lep Libanon im Sirion et idivaig inhakli rema.

7 Et atiakoai nalaume u incop nohrai Ihova.

8 Et ucjucjaig namas acen va nohrai Ihova; et amaamai namas acen Ketes vai Ihova.

9 Era abad haint va nohrai Ihova, et lep rere nauicai an nese vaig: ja era tas va natimi alupas o un ara asega anli neom ahlap o un.

10 Et eteuc a Ihova ijinies an wai alupas; et idim eteuc a Ihova um Atimarid ira iji mesese.

11 Etpu alupai ilpu atimi o un nemda a Ihova etpu lep asa neigpa a Ihova ebele ilpu atimi o un.

SALM 30.

1 Ekpu imiahpas euc ainyak, ak Ihova; as imiatidai nyak aiek, era lep eti cediaig vai nyak a ilpu atimi tak atimi irak.

2 Ak Ihova Atua unyak, kis ahlaig vai euc ainyak, as lep ago cehcehe nyak aiek.

3 Ak Ihova, as atipagki nyak

SALM, 31.

aiek an nehpanitai : as imiatamumoh nyak aiek, va ki jim asuol anli nehpanitai ainyak.

4 Akumu acesaces nohoranitai vai Ihova aijaua ak ilpu atimi upene o un, um ago naaurineig akuit imiehva nedo upene o un aijaua.

5 Et eti elv amen nedemda o un ; er umumoh va naiheuc o un ; eh tigtaig an jupura, jam imiacitak an nuhialeg.

6 Kis ika ainyak, an namen upene unyak, inki ti amaamai ainyak iri iji mesese.

7 Ak Ihova, et amen aktit nedoon unyak va naiheuc unyum : as adinaig nesganimtam aiek, kis lep ohacred ainyak.

8 Ak Ihova, kis ahlaig vai euc ainyak ; kis lep ugni Ihova ainyak.

9 Et eti upene inmas unyak, ekuit asuol an nehpanitai ainyak ; Inyi ti imiahpas euc nobohtan ; um eti asuptecnaig intas inivaijec unyum.

10 Ak Ihova, namu atahaijeg intas unyak aiek, um aiheuc vai nyak : ak Ihova, namu atau imi nyak aiek.

11 Kis taigtaig ainyak jam lep imiacitak vai euc : as atipagki nape-lumai uhcai unyak aiek, um aso nyak an nimiactak ;

12 Va ekpu imiahpas euc ainyak anliinmopok, um eti ucsup. Ak Ihova Atua unyak, ekpu ago naaurineig vai euc ainyak ira iji adiat.

SALM 31.

1 Ak Ihova, ek asgeig iram ainyak ; ekmu jim lep ehcamai ainyak : namu imiatamaig nyak aiek an nedo upene unyum.

2 Namu atahaijeg intas unyak aiek ; auroauro um imiatamaig nyak : namu hehteuc emda unyak aiek, im neom atpuh iran unyak par imiata-maig nyak.

3 Na idim hehteuc unyak aiek,

im neom ipjin unyak ; namu aminjinaig nyak aiek um atau irak.

4 Namu apijadi nyak aiek an nopoig eris ati vai nyak ara jam eti asaig : na idim nemda unyak aiek.

5 Ek ati nesgak an nikhmam ainyak : as imiatamaig nyak aiek, ak Ihova Atua inivaijec.

6 Ek amcel vai ra ainyak era aktaktai intakitai ara ; ja ek asgeig irai Ihova ainyak.

7 Ekpu imiacitak ainyak um cedi-aig va naiheuc unyum : as aktaktai nerek inman irak aiek ; as lep ato nohacred u inliinmopok aiek ;

8 As lep eti aticijaig nyak aiek imi ilpu atimi edemda vai nyak : as ati neduok aiek an nuarin lah.

9 Ak Ihova, namu aiheuc vai nyak aiek, ek idim ohacred ainyak : et auatialidi neganimtak va nohacred unyak, im lep inliinmopok, im nohuk.

10 Ek ohacred ainyak ira iji adiat um taig ira iji mesese : et ti nemda unyak va nedo has unyak, et lep ohalohal niji eduok.

11 Era asan tas has vai nyak a ilpu atimi edemda vai nyak asega, im lep ilpu etoak ; era lep imtitaig nyak a ilpu etoak : era aha vai nyak a ilpu atimi ecet nyak.

12 Er eti imiehva nyak et idivaig natimi mas : ek idivaig nipjinitai ahtagre ainyak.

13 Kis atahaijeg intas has o atimi is ahinag ainyak : is ahtag irak niji itai er imtitaig vaig : eris tastas jipe vai nyak ara, um ika eri atgei nyak.

14 Ja kis asgeig iram ainyak, ak Ihova ; kis ika ainyak, na Atua unyak aiek.

15 Et amen nitai umoh iran unyak an nikhmam ; namu imiatamaig nyak aiek vai ilpu atimi tak atimi irak, im lep ra era atmas vai nyak ara.

16 Etmu naunau nesganimtam

SALM, 32, 33.

aiek vai naheca unyum: um imiata-
maig nyak va naiheuc unyum.

17 Ak Iхова, ekmu jim ehcamai
ainyak: kis ahlaig vai euc ainyak:
erumu ehcamai a ilpu atimi auata-
timi, erumu lep ucsup ara anli
nehpanitai.

18 Uhm ucsup nipjineucse ilpu
atimi ahcil; era asan tas ahcil ara
vai ilpu atimi upene, anliinmopura
ijinies im inliinmopura edemda.

19 Et esjilid acen nitai upene iji
eigki as ikni aiek vai ra era imtitai
euc ara; as ago aiek vai ra era
asgeig iram ara an nuhup o atimi.

20 Napu adina ra aiek an nuarin
adinaig an nuhup unyum va nedo
ijinies o atimi: napu adinaig ra
aiek anli neom atga unyum va nim-
iisjis itai o atimi.

21 Naaurineig vai Iхова: is ehvaig
ehlek aien nedo aiheuc imiali o un
an nuarin pece emda.

22 Kis auroauro ainyak um ika,
as aticijaig nyak aiek: ja as ata-
hajjeg intas ugni unyak aiek an
nahlaig unyak vai euc.

23 Ak ilpu atimi upene o un asega
etmu aiyu inliinmopomia aijaua vai
Iхова: et aminjinaig ilpu atimi
inivajec a Iхова, jam aru alupas
irai ilpu atimi ago nedo ijinies.

24 Jim auatialidi, etpu ago emda
inliinmopomia aien, ak ilpu atimi
sijnai Iхова asega.

SALM 32.

1 Et mun ahis moij a natimi
ineig eris iknipagki nedo has o un,
um lep adahpoi nedo imiapalea o un.

2 Et mun ahis moij a natimi
ineig et eti atijai iran nedo acalacal
a Iхова, um eti efaifa inliinmopon.

3 Kis wat eti tas ainyak, is au-
tialidi niji eduok va naunyauaig
nyak an nadiat asega.

4 Is opouc nikkam ijinies irak

ira adiat im nepeg: et ti nemda
unyak va nihlup an lidija. Sela.

5 Kis asuptecnaig nedo has un-
yak ainyak ehelum, kis lep eti ateri
nedo acalacal unyak ainyak. Kis
ika ainyak, ekpu asuptecnaig nedo
has unyak ehele Iхова ainyak, as
eti lep imiehva nauatatimi unyak
aiek. Sela.

6 Va nitai ineigki erupu ago
nalaigaheni vai euc a ilpu atimi
upene asega an naopan ineig uhpu
ecet euc: etuit abgarero alupas inyi
idim eti uhup pan yin inwai.

7 Na uarin adinaig unyak aiek;
napu imiicaho nyak aiek va noha-
cred; napu imiarahed nyak aiek
irai tas naaurineig va nimiatamaig
nyak. Sela.

8 Ekpu esege imtam ainyak um
asuptecnaig ehelum nefalaig ineig
napu atga iran aiek: ekpu aminji-
naig euc ainyak an nesganimtak.

9 Akumu jim idivaig hors aijaua,
im nifo, et ti lelra ara: er asjiraig
nipjieucsera irai bit im braitel, va
eri jim apan ubutpotet ehelum ara.

10 Inyi ahinag nohacred o ilpu
atimi auatatimi: ja etpu imiarahed
natimi ineig et asgeig irai Iхова
aien naiheuc o un.

11 Akumu imiacitak Iхова aijaua,
um cediaig, ak ilpu atimi upene:
akumu lep acesaces nohranitai aij-
aua um imiacitak, ak ilpu atimi et
inivajec inliinmopomia aijaua.

SALM 33.

1 Akumu imiacitak Iхова aijaua,
ak ilpu atimi upene: et upene eri
imiahpas yin a ilpu atimi upene.

2 Akumu imiahpas Iхова aijaua
irai harp, um acesaces nohranitai
vai yin irai saltri et amen iran inya
et ten.

3 Akumu acesaces nohranitai
aijaua an nohranitai mat; um aticej
upene um ahlaig ijinies.

SALM, 34.

4 Et upene intas o Ihova ; et lep iniviajec nisi auritai asega o un.

5 Et merit va nedo upene aien in nedo atoh : et ohua nedo aiheuc o Ihova an nobohtan asega.

6 Is ago nohatag a Ihova an tas o un ; im lep nisi itai asega iran an nohran nijineucsen.

7 Is asjapicnaig injop an tup-oahau aien, et idivaig nisi irai itai : is ati injop ubo aien irai uarin ikni itai iran.

8 Erumu imtitai Ihova natimi asega an nobohtan : erumu ucjucju-caij vai yin a nup ira iji pece asega.

9 Is tas aien, ja is par eteuc itai ; is tas alep aien, ja is par amen aktit itai.

10 Et auahas naktaktai u inliin-mopoi ilpu atimi aupat a Ihova, et lep ika aien yi takitai nanaclelen ura.

11 Et amen aktit intas o Ihova ira iji adiat, im naktaktai u inliin-mopon ira iji mesese.

12 Era mun ahis moij a nup iran pece ineig et Atua ura a Ihova ; im natimi iji eigki is ehtai ra aien mika eri ilpu atimi o un ara.

13 Et eas an nohatag a Ihova ; et almoi atimi asega aien.

14 Et eas pan ira atimi asega an nobohtan aien an nuarin amen o un.

15 Et ago inliinmopura aien ache ; et lep ato nisi auritai asega ura aien.

16 Er eti imiatamaig tah natimarid va ilpu ucsupo et ahinag : er lep eti imialep tah natimi emda va nemda o un.

17 Et takitai hors par imiatamaig atimi, inyi ti imiatamaig tah aien an nemda esjilid o un.

18 Et alumajicid ra a Ihova era imtitai yin ara, im lep ra era aij-naig naiheuc o un ara :

19 Um imialep ra va inmas, um imiatamaig ra va nauanadiat.

20 Et aijnaig Ihova inliinmopja akaija : et atau imi caija aien, um adahpoi caija.

21 Etmu imiacitak yin inliinmopja akaija ; inta asgeig an nidan upene akaija.

22 Ak Ihova, etmu amen naiheuc unyum irama, et idivaig egra asgeig iram aijama.

SALM 34.

1 Ekpu ago naaurineig vai Ihova ainyak irai iji adiat ; inyi ti atumop nijineucsek ainyak par imiahpas yin.

2 Etpu imiacitak Ihova inliin-mopok ainyak : erupu atahajjeg vaig a ilpu atimi upoupo, um lep cediaig.

3 Akumu ago nedo ecen vai Ihova aijaua et tup ethi ache pan irak, ti ehra imiahpas nidan akaija.

4 Kis ahilek Ihova ainyak, is lep atahajjeg intas unyak, um imiatamaig nyak va nimitaig asega unyak.

5 Eris aes pan yin ara um imiacitak : is lep eti ehcamai nesgan-imitara ara.

6 Is ahlaig a nihkin natimi ineigki, is lep atahajjeg intas o un a Ihova, um imiatamaig yin va nohac-red asega o un.

7 Et amen arahed irai ilpu atimi imtitai Ihova a nagelo o un um imiatamaig ra.

8 Akumu atemtem aijaua um ato mika et upene a Ihova : et mun ahis moij a natimi ineig et asgeig iran aien.

9 Akumu imtitaig Ihova aijaua, ak ilpu atimi upene o un : era eti ihkin natimi an tah nitai ara sji eigki era imtitai yin ara.

10 Et ehteleg ra inhakli laion, um ahvig nitai caig : ja eri eti ihkin natimi an tah nitai upene ara sji eigki era ahilek Ihova ara.

11 Ak ilpu hal unyak, akumu

SALM, 35.

apam aijaua um atahajjeg intas unyak : ekpu esege imi caua ainyak nedo ecen vai Ihova.

12 Natimi ineig a di et merit aien numoh vaig, um merit vai nadiat inyi ahinag iran, mika yi ato nitai upene aien ?

13 Etmu jim ahes an nipjineucsem intas has, um jim asan tas ahcil.

14 Ude nedo has, um ago nedo upene ; ehilek neigpa um apol iran.

15 Et alum ilpu atimi upene a Ihova, et lep atahajjeg nahlaig ura aien.

16 Et edemda a Ihova vai ra era ago nedo has ara, uhpu idim eti imiehva ra an nobohtan.

17 Era ahlaig a ilpu atimi upene, et lep atahajjeg intas ura a Ihova, um imiatamaig ra va nohacred asega ura.

18 Et amen ubutpotet ehele ra sji eigki a Ihova et ehtoplecoplec inliinmopura ara ; um imiatamaig ra et upoupu inliinmopura.

19 Et ahinag nohacred o ilpu atimi upene : ja et imiatamaig ra vaig asega a Ihova.

20 Et aminjinaig niji eduora asega aien ; er eti asvi tah et ethi.

21 Etpu auahas ilpu atimi auatimimi nedo has ura : uhpu lep aru irai ra sji eigki era amcel vai ilpu atimi upene ara.

22 Et imiatamaig ilpu atimi o un a Ihova ; uhpu eti aru iran tah ra era asgeig iran ara.

SALM 35.

1 Ak Ihova, namu imiisjis aiek, namu imiisjis aiek ehele ra sji eigki era imiisjis ehelek ara : um ago nedoa vai ra sji eigki era ago nedoa vai nyak ara.

2 Namu asjiraig nitai atapen im nitai adahpoi aiek, um atidai par atau imi nyak.

3 Namu lep leh inmopul aiek, um

atapanes nefalaig vai ra sji eigki era ahcadi nyak ara : um lep ika ehelek, ek imiatamaig euc ainyak.

4 Erumu ehcamai um imtac ara sji eigki era ahilek nyak ara par auahas nyak : uhmu imiadumoij um auad yi apidai ra era aktaktai has vai nyak ara.

5 Erumu idivaig narasi sito ara an nuhup o nimtinjop : etmu lep auad ra a nagelo o Ihova.

6 Etmu aupat um las nefalaig ura : etmu lep ahlo ra a nagelo o Ihova.

7 Eris ispara adinaig nopoig ura vai nyak ara anli nehpanitai eris ispara ucji vai nyak ara.

8 Etmu yet pam iran nitai auahas yin etuit eti ato aien ; etmu lep eccen aien an nopoig o un is adinaig aien : etmu idim eropse aien an nitai auahas yin yehki.

9 Ja etpu imiacitak Ihova inliinmopok ainyak : um cediaig va nimiatamaig nyak o un.

10 Etpu ika nohuk asega, ak Ihova, et idivai euc a di, na imiatamaig ilpu atimi ohacred aiek vai yin et esjilid ira ra aien, ilpu atimi ohacred im ilpu ihki atimi marom vai yin et ago nedo ipjin vai ra aien ?

11 Eris atidai a ilpu atimi asuptecnaig intas ahcil ; eris asai itai vai uyak ara kis eti ato ainyak.

12 Eris aru nedo upene unyak ara an nedo has, et ihkin natimi inliinmopok ainyak vai ra.

13 Ja eris wat emehe ara kis aso nyak ainyak an napelumai uhcai : kis atoakum ainyak um ago nedo upoupo ; is lep imivaijec nalaigaheni unyak vai ra.

14 Kis ago nedo vai yin ainyak et idiviaig nedo vai napah unyak im etoak : kis atpuse emda ainyak, et idivaig tah et imitaig risin aien.

15 Ja eris imiacitak nohacred unyak ara, um asjapicnaig, eris idim asjapicnaig vai nyak a ilpu atimi

atuh nyak, ja kis eti ato ainyak; eris ahpati nyak ara, um eti atumop.

16 Eris ataktit ijeira vai nyak ara, im lep ilpu atimi auyat ira akaro ura.

17 Ak Ihova, napu alum ra aiek um yet pan an nahopan? Namu imiatamaig nyak aiek va nedo has ura, im nesgak va laion iji eigki.

18 Ekpu ago naaurineig ainyak an nasjapicnaig esjilid o atimi: ekpu imiahpas euc ainyak an nuhup o atimi et ahinag.

19 Erumu jim imiacitak vai nyak ara sji eigki era ispara edemda vai nyak ara: erumu jim lep asvavnise nesgaimtara ara sji eigki era ispara amcel vai nyak ara.

20 Era eti asa neigpa ara: ja era aktaktai intas ahcil ara vai ra sji eigki era amen upene ara an pece.

21 Eris idim asalage alupas nippineucsera vai nyak ara, um ika, Aha, aha, inta mun ecetai akaija.

22 Ak Ihova, na mun ecetai aiek: jim ucsup: ak Ihova, jim amen itac acen vai nyak.

23 Namu atidai aiek, um aiji lahlah par tas alep vai nyak, im lep nedo unyak, ak Atua unyak, im Natimarid unyak.

24 Ak Ihova, Atua unyak, namu tas alep vai nyak aiek an nedo atoh unyum; erumu jim imiacitak vai nyak ara.

25 Erumu jim ika inliinmopura ara, Ah, nitai merit uja ineigki: erumu jim ika ara, Inta mun auahas yin akaija.

26 Erumu ehcamai um imtac ara sji eigki era imiacitak ara va nohacred unyak: erumu ehcamai um imtitaig ara et ijinies inliinmopura ara vai nyak.

27 Erumu acesaces nohranilai va nimiacitak ura, um cediaig ara sji eigki era atoa ara an nimisjis itai upene unyak: erumu lep ika ara ira iji adiat, Uhmum imiahpas Ihova,

et imiacitak namen upene o naheca o un aien.

28 Ekpu tas ainyak va nedo upene unyum, im nimiahpas unyum ira iji adiat asega.

SALM 36.

1 Et ika a natimi ago nedo has anliinmopon, ek eti imtitai Atua ainyak.

2 Et ago nefaiifa vai yin aien, um imihum pan an naopan yehki eri amcel vai nedo has o un.

3 Et has um efaifa intas an nippineucsen; is ude nedo arapakau aien, im nedo upene.

4 Et aktaktai nedo has aien an tinan; et aiji aien an nefalaig has; et eti amcel vai nedo has aien.

5 Ak Ihova, et eteuc naiheuc unyum an nohatag; et lep yet pan nedo inivaijec unyum an naupat an nohatag.

6 Et idivaig nedoon alupas nedo atoh unyum; et lep tupoahau esjilid nedo ated atimi unyum: ak Ihova, na imiatamaig natimi aiek im niji itai eclim edo irai pece.

7 Et idim esjilid acen nedo aiheuc unyum, ak Atua! va nitai ineigki era atumop upene natimi ithan naiyu an nehpan.

8 Erupu gaije alupas ara ira iji itai upene anli neom unyum; napu lep ika aiek eri umwig ara an nofowai upene unyum.

9 Et idim ahes ehelum nitai umoh iran: erupu lep ecetai inlah aijama va inlah unyum.

10 Etmu amen naiheuc unyum vai ra sji eigki era ato euc ara; im lep nedo atoh unyum vai ilpu atimi inivaijec inliinmopura.

11 Etmu jim ham ehelek nedui ilpu atimi ijinies inliinmopura, etmu jim lep ahlo nyak nikmai ilpu atimi auatatimi.

12 Era mun idim eropse a ilpu

SALM, 37.

atimi auatatimi: er auhaigse ra, eri ti lep emda ara par atidai.

SALM 37.

1 Jim edemda va nedo o ilpu atimi auatatimi, um jim auatitai vai ilpu atimi ago nedo has.

2 Uhpu auroauro um eucse ra et idivaig nefelelicai, erupu imlai ara et idivaig nefelelicai emelmat.

3 Asgeig irai Ihova, um ago nedo upene; napu amen upene an pece aiek, uhpu idim alaam itai.

4 Namu imiacitak Ihova aiek; etpu lep alupai euc nitai merit u inliinmopom aien.

5 Atijai nitai apos unyum irai Ihova, um lep asgeig iran; etpu ehejjid intas o un aien.

6 Etpu ehvaig nedo atoh unyum aien et idivaig inlah, im nedo upene unyum et idivaig nadiatadiat.

7 Namu ucsup aiek vai Ihova, um tup clim aijnai yin: jim edemda vaig tah et tup ahinag nitai o un, im natimi ineig et aktaktai nedo has aien.

8 Jim edemda, um jim atavai-taup: jim ehniv van jim ago tah nedo has aiek.

9 Uhpu iknipagki ilpu atimi ago nedo has; ja erupu ohuun nobohtan ara sji eigki era asgeig irai Ihova ara.

10 Erupu auroauro um ti a ilpu atimi auatatimi; napu aktaktai upene nuarin amen ura aiek, ja et ti.

11 Ja erupu ohuun inpece a ilpu atimi upoupo; um imiacitak niji itai upene et ahinag.

12 Et aktaktai itai vai ilpu atimi upene a natimi auatatimi um ataktit nejjen vai ra.

13 Etpu imilaav yin a Ihova: et ato aien mika etpu yet pam nadiat o un.

14 Eris aihiacse nautoga a ilpu

atimi auatatimi, um aiyihi inceen nefana ura par auhaigse ilpu atimi upoupo im ilpu ihki atimi, um lep atgei ilpu atimi et atoh nedo ura.

15 Etpu yet pan nautoga ura irai li mopura, uhpu lep asvi inceen nefana ura.

16 Et upene nitai tintin o un tah natimi upene irai padiaig alupas o ilpu atimi auatatimi et ahinag.

17 Uhpu asvi nikmai ilpu atimi auatatimi: ja et asjiraig ilpu atimi upene a Ihova.

18 Et ato nadiat irai ilpu atimi upene a Ihova; etpu lep amen niji itai ura ira iji mesese.

19 Eri ti ehcamai ara an naopan has: erupu lep gaije ara an naopaz umlaig has.

20 Erupu ememas a ilpu atimi auatatimi, erupu lep idivaig nagako irai hakli siip a ilpu atimi amcel vai Ihova; uhpu atnamud ra; erupu ti ara et idivaig nadran cop.

21 Era ugni itai a ilpu atimi auatatimi, jam eti aru: ja era aiheuc vai atimi a ilpu atimi upene um alupai ra itai.

22 Erupu ohuun nobohtan ara sji eigki et asan tas ces yi aloai vai ra aien; ja uhpu auahas ra sji eigki et asan tas ahlajaig vai ra aien.

23 Et ago aktit nedo o natimi upene a Ihova: et lep imiacitak nedo o un aien.

24 Etpu ebehtau aien inyi ti eropse upene aien: et idim asjiraig jai yin a Ihova an nikman.

25 Kis takuras ainyak, um lep afatimi; ja kis eti ecet natimi upene namelga vaig ainyak im ilpu hal o un nugni vaig nitai caig.

26 Et aiheuc vai atimi aien ira iji adiat um alupai ra itai; era lep ahis moi a ilpu hal o un.

27 Ude nedo has, um ago nedo upene; um amen ira iji mesese.

28 Et merit vai nedo atoh a Ihova, et lep eti ude ilpu atimi upene o un

SALM, 38.

aien; et aminjinai ra aien ira iji mesese: ja etpu auahas ilpu hal o ilpu atimi auatatimi aien.

29 Erupu ohuun inpece a ilpu atimi upene, um amen iran ira iji mesese.

30 Et ahes narapakau an nipjineucse ilpu atimi upene, era lep tas ara vai nedo atoh.

31 Et amen intas alep o Atua un anliinmopon; et lep eti ahnag aien.

32 Era imiiris natimi upene a ilpu atimi auatatimi, um ika eri atgei yin.

33 Inyi ti ude yin a Ihova an nikmara, um eti asaig nimitan imi yin uhuit tas alep vai yin.

34 Asgeig irai Ihova, um apos nedo o un, etpu lep imiatidai euc aien par ohuun inpece: uhuit auahas ilpu atimi auatatimi napu ecetai aiek.

35 Kis ecet natimi auatatimi ainyak im nemda alupas o un, is ranran aien et idivaig nauincai mat an nuarin amen o un.

36 Ja is ti pan aien, maiya, et idim ti aien: kis idim ahilek yin ainyak, jam eti ecet yin.

37 Aktaktai natimi upene, um almoi natimi inivaijec: inyi eigpa inmas o un.

38 Ja uhpu ehra auahas ilpu atimi auatatimi: uhpu auahas ilpu atimi ago nedo has.

39 Ja et imiatamaig ilpu atimi upene a Ihova: et nemda ura aien an naopan ohacred ura.

40 Etpu atau imi ra a Ihova um imiatamaig ra: etpu imiatamaig ra aien va ilpu atimi auatatimig va nasgeig iran vaig ura.

SALM 38.

1 Ak Ihova, jim ated nyak an nedemda unyum, um jim arodei nyak an tavaitaup alupas unyum.

2 Et mun ahcai nyak nefana

unyum, et lep opouc nikmam irak.

3 Et eti cehcehe tah nuarin nohuk va nedemda unyum; et lep eti eropse niji eduok va nedo has unyak.

4 Et taluopni pam nyak nedo has unyak: et opouc acen irak et idivaig nitai abelue opouc.

5 Et epiv um has inmocop irak va nedo ahnag unyak.

6 Ek ohacred ainyak; ek acva alupas ainyak; ek taig ainyak ira adiat asega.

7 Et esjilid acen nihlup an nipjinetgak: et lep ti cehcehe tah nuarin nohuk.

8 Ek arici ainyak um auatialiidi alupas: kis aunyauaig ainyak va nohacred u inliinmopok.

9 Ak Ihova, na ato nitai merit asega unyak aiek; er lep eti adinaig vai euc naunyauaig unyak.

10 Et mopmop inliinmopok ainyak, et ti nemda unyak, et lep aupat neganimtak ainyak.

11 Era eti aktaktai nemehe irak a ilpu etoak im ilpu apapa unyak; era lep amen itac acen a ilpu atimi ehpan irak.

12 Era lep ana ira opoig vai nyak ara sji eigki era ahilek inmas unyak ara: era lep asan tas has ara sji eigki era merit ara nago vaig nedo has vai nyak, um aktaktai nefaiifa ira adiat asega.

13 Ja ek idivaig natimi ucjipines intikgan ainyak um eti ahge itai; ek lep idivaig natimi pop ainyak et eti asalage nipjineucsen aien.

14 Ek idim idivaig natimi eti ahge itai ainyak, et lep eti ahes an nipjineucsen tah intas ated atimi.

15 Ak Ihova, ek asgeig iram ainyak: ak Ihova Atua unyak, napu atahaijeg intas unyak aiek.

16 Kis ika ainyak, Erumu jim imiacitak ara vai nyak: et wat auohyiat neduok, et ijinies inliinmopura ara vai nyak.

17 Ek ika ainyak ki ebehtau ain-

SALM, 39, 40.

yak, ek lep ohacred ainyak ira iji adiat.

18 Ekpu asuptecnaig nauatatimi unyak ainyak; ekpu lep taig va nedo has unyak ainyak.

19 Era umumoh a ilpu atimi tak atimi irak um emda: era lep ahinag ara sji cigki era ispara amcel vai nyak ara.

20 Era lep edemda vai nyak ara sji cigki era aru nedo upene ara an nedo has; va nedo unyak nikavaig ek apol an nitai upene ainyak.

21 Ak Ihova, jim ude nyak: ak Atua unyak, jim amen itac acen vai nyak.

22 Auroauro um atauimi nyak, ak Ihova, nitai umoh iran unyak.

SALM 39.

1 Kis ika ainyak, ekpu aminjinaig nedo unyak ainyak, va ki jim ago nedo has ainyak an nipjineucsek: ekpu aminjinaig nipjineucsek ainyak an nitai atapanes eruit amen a ilpu atimi auatatimi an nuhup unyak.

2 Kis idim ucsup ainyak, um eti tas va nisi itai upene; is lep esjilid nohacred unyak.

3 Is ihlup inliinmopok ainyak; kis wat aktaktai ainyak is ere incop: kis lep tas an nipjineucsek ainyak.

4 Ak Ihova, ehvaig ehelek naopan mas unyak, im nisi adiat irak, ini ehed; va ekpu ato nauatialiidi unyak ainyak.

5 As ika aiek yi idiviaig nasjaainaig ira ikma atimi nisi adiat irak; et lep eti idivaig tah nitai nisi mesese irak an nuhup unyum: era idim tak itai atimi asega an nemda ura. Sela.

6 Era idivaig tup nalmui itai natimi asega: et ehioehio inliinmopura ara vai intak itai: era ikni itai ara, jam eti ato natimi ineig ini ohuun aien.

7 Ak Ihova, ek aijinaig inhe ainyak? ek asgeig iram ainyak.

8 Imiatamaig nyak va nedo has asega unyak: erumu jim atuh nyak a ilpu atimi ahnag.

9 Kis ucsup ainyak, um eti tas; va nedo unyum nikavaig as ago aiek.

10 Atipagki nitai ated nyak unyum; ek auatialiidi ainyak va nauad nyak o nikman.

11 Naut ahugni atimi aiek an nedo ated unyum va nedo has, et lep ti inupene ura et idivaig inupene o inteijeg, era idim tak itai atimi asega. Sela.

12 Ak Ihova, namu atahaijeg intas alaigaheni unyak aiek, um atgeig pam intikgam va nahlaig unyak, namu jim ucsup aiek ekuit taig ainyak; ek tak atimi iram ainya', im natimi amen ehcid et idivaig ilpu retpok asega.

13 Etmu eropse inliinmopom aiek vai nyak, va ekpu leh nemda unyak ainyak, ja par apan, um lep ti.

SALM 40.

1 Kis aijnaig upene Ihova ainyak; is ahidaig pam yin ehelek aien, um atahaijeg nahlaig unyak.

2 Is aiyihi jai nyak aien an nehpanitai has, im lep an nobohtan osal, um ati neduok ijinies an hehteuc, um ago aktit natga unyak.

3 Is ati nohranitai mat an nipjineucsek aien, nimiahpas vai Atua uja marom; erupu ecetai natimi et ahinag, um imtitaig, um asgeig irai Ihova.

4 Et mun ahis moij a natimi ineig et asgeig ira Ihova aien; um eti apol irai ilpu atimi ijinies inliinmopura, im lep ra era ahidaig pan ra u nedo ahcil ara.

5 Ak Ihova Atua unyak, et ahinag nisi auritai imiali unyum as ago aiek, im naktaktai unyum vai cama:

SALM, 41.

et ehka par esvi upene ehelum; ek ika ainyak ki asuptecnaig ainyak um tas vaig, ja et ehka nesvi vaig va nahinag iran.

6 As eti merit aiek va niji itai ahlap im niji itai ahtai: as ehtigre intikgak aiek: as eti ugni niji itai ahlap atnamud aiek um niji itai ahlap va nedo has.

7 Ja kis ika ainyak, Ek idim ham ainyak: eris aged intas vai nyak an nitasvitai;

8 Ek imiacitak ainyak nago vaig nitai merit unyum, ak Atua unyak, et idim amen intas alep unyum anliinmopok.

9 Kis asuptecnaig nedo upene ainyak an nuhup o atimi et ahinag: kis idim eti ucsup ainyak, ak Ihova, na ato aiek.

10 Kis eti adinaig nedo upene unyum ainyak anliinmopok; kis asuptecnaig nedo inivaijeuc unyum ainyak, im nimiatamaig atimi unyum: kis eti ateri naiheuc esjilid unyum ainyak im nedo inivaijec unyum an nuhup o atimi et ahinag.

11 Ak Ihova, jim imiaij vai nyak nedo aiheuc unyum: etmu aminjinai nyak naiheuc unyum im nedo inivaijec unyum ira iji adiat.

12 Et arahed irak niji itai has et ahinag: et mun uhun nyak nedo has unyak, et lep ehka vai nyak par ias jai: et idim ahinag nedo has unyak irai umri idjinek: va nitai ineigki et auatialidi inliinmopok ainyak.

13 Ak Ihova, el et upene iram, namu imiatamaig nyak aiek: ak Ihova, auroauro um atau imi nyak.

14 Erumu ehra ehcamai um ohacred ara sji eigki era ahilek nyak ara par auahas nyak; uhmu ahlo pan itac ra era aktaktai has vai nyak ara, erumu lep ehcamai ara.

15 Erumu tup echem amen ara

sji eigki era ika ehlek ara, Aha, aha, va nehcamai ura.

16 Erumu imiacitak um cediaig vai euc ara asega era ahilek euc ara: eruit merit vai nimiatamaig ra unyum natimi, erumu ika ara ira iji adiat, Et esjilid a Ihova.

17 Ja ek upoupo ainyak um ihkin natimi; ja et aktaktai nyak a Ihova: na atau imi nyak aiek um imiatamaig nyak, ak Atua unyak, jim tup amen.

SALM 41.

1 Et mun ahes moij a natimi ineig et aktaktai natimi auatialidi aien; etpu imiatamaig yin a Ihova an naopan ohacred o un.

2 Etpu aminjinai yin a Ihova, um imiatamumoh yin; etpu amen upene an nobohtan aien; napu eti aticijai yin aiek imi ilpu atimi tak atimi iran.

3 Etpu aiheuc vai yin a Ihova etuit asjeuc aien va nemehe iran: napu aminjinai yin aiek etuit emehe aien.

4 Kis ika ainyak, ak Ihova, aiheuc vai nyak: ago cehcehe nyak; kis idim ago nedo has vai euc ainyak.

5 Era asan tas has vai nyak a ilpu atimi tak atimi irak, um ika, Etpu mas aien an nahopan, um lep ti nidan?

6 El et ham tah par ateghe nyak, et tas vai intakitai aien: et ikni itai has anliinmopon aien; etuit atga o un aien, et asuptecnaig aien.

7 Era ehra tas ehlohol vai nyak ara asega era edemda vai nyak ara: um ika,

8 Et apol iran nemehe has: et asjeuc aien, ja inyi ti lep atidai aien.

9 Is lep aha vai nyak a natimi ineig is etoak upene aien, kis asgeig iran ainyak, is lep asipiaig nitai caig unyak aien.

10 Ja namu aiheuc vai nyak aiek,

ak Ihova, um imiatidai nyak, mika ki aru ira ra ainyak.

11 Ek ato ainyak mika et upene inliinmopom aiek vai nyak, va nitai ineigki nikavaig inyi ti esjilid irak a natimi edemda vai nyak.

12 As lep atau imi nyak aiek an nedo atoh unyak, napu lep ati nyak aiek an nuhup unyum ira iji mesese.

13 Naaurineig vai Ihova Atua o nupu Isreel, ira iji mesese. Amen, im Amen.

SALM 42.

1 Ak Atua, et idivaig et ahvig inwai yah a natia, et um ucco et merit vai euc inliinmopok ainyak.

2 Et merit emda inliinmopok ainyak vai Atua, vai Atua umoh; ekpu apan ainyak um ehcohos an nuhup o Atua an nahopan?

3 Is itai caig unyak intaig unyak ira adiat im nepeg, eruit ika ehelek ara ira iji adiat, Atua unyum yuc eda?

4 Ekuit imiehva nitai iji eigki ainyak et auatialidi inliinmopok ainyak, kis apan ainyak anli neom o Atua, um asan tas imiacitak im naaurineig, im lep natimi is ahinag eris apos nadiat asjapicnaig ara.

5 Et auatialidi inliinmopok ainyak vanhe? et lep ehioehio vanhe? etmu asgeig irai Atua inliinmopok ainyak: ekpu idim imiahpas yin ainyak va nedo atau imi nyak o un.

6 Ak Atua unyak, et auatialidi inliinmopok ainyak: va nitai ineigki ekpu imiehva euc ainyak an pece Jortan, im inpece Hermon, im lep an lolan nedoon Maisar.

7 Et ahlaig intupoahau et ethi vai intaka tupoahau va inmotjan wai unyum: is taluopni nyak nepeau asega unyum im netokai unyum.

8 Etpu asaig naiheuc o un a Ihova iri iji adiat, etpu lep amen

nohranitai vai yin ehelek nihi epeg, ekpu lep ago nalaigaheni ainyak vai Atua ek umoh vai yin ainyak.

9 Ekpu ika ainyak ehele Atua inhehteuc unyak, na auri aiek par eti imiehva nyak? ek auri ainyak par atga um taig va nedo ipjin o natimi edemda vai nyak?

10 Et idivaig nautoga ira iji ed-uok intas has o ilpu atimi tak atimi irak; era eti atumop ara ira iji adiat um ika, Atua unyum yuc eda?

11 Et auatialidi inliinmopok ainyak vanhe? et lep ehioehio vanhe? etmu asgeig irai Atua inliinmopok ainyak; ekpu idim imiahpas yin ainyak, et Atua unyak aien, um atau imi nyak.

SALM 43.

1 Ak Atua, namu aktaktai nyak aiek, um imiisjis vai nyak ehele nup iran pece has: namu imiatamaig nyak aiek vai natimi efaifa im natimi has.

2 Na Atua o nemda unyak aiek: na auri aiek par aticijaig nyak? ek auri ainyak par atga um taig va nedo ipjin o natimi edemda vai nyak.

3 Etmu ahes ehelum inlah unyum im intas inivaijec unyum, par atau irak; etmu lep imiapan nyak an nedoon itaup unyum, im lep ira iji neom atga unyum.

4 Ja ekpu apan ainyak u natau o Atua, Atua ineig marom ek imiacitak alupas yin ainyak: ekpu imiahpas euc ainyak a harp, ak Atua, Atua unyak.

5 Et auatialidi inliinmopok ainyak vanhe? et lep ehioehio vanhe? etmu asgeig irai Atua inliinmopok ainyak: ekpu idim imiahpas yin ainyak, et Atua unyak aien, um atau imi nyak.

SALM 44.

1 Ak Atua, ecris atahajeg irai tikgama aijama, eris asaig ehelema a ilpu retpoma, nauritai unyuman naopan amen ura, itu acen.

2 As ahlo ilpu atimi aupat aiek an nikmam, um ikni aktit ra, as ah-tagre natimi iji ehki aiek, um ahlo pan itac ra.

3 Eris eti ohuun inpece ara va nij va atimi ura, is lep eti imiata-maig ra nikmara: inmatam ache, im nikmam, im inlah an nesganim-tam, va naiheuc unyuman vai ra.

4 Ak Atua, na Atimarid unyak aiek: namu asaig aiek mika uhpu imiatamaig Jakob.

5 Ecrupu auad ilpu atimi tak atimi vai cama aijama vai euc: ecrupu lep atga ijinies ira ra sji eigki aijama era atidai vai cama ara va nidam.

6 Inki ti asgeig an ceen nafana unyak ainyak, inyi ti lep imiatamaig nyak naitaga unyak.

7 Ja as imiatamaig cama aiek vai ilpu atimi tak atimi irama, as lep ati nehcamai aiek irai ilpu atimi edemda vai cama.

8 Era imiahpas Atua aijama ira adiat asega, ecrupu lep ago naauri-neig vai nidam aijama ira iji mesese. Sela.

9 Ja as aticijaig cama aiek, um ati nehcamai irama; um eti ahced ilpu ucsupo unyuma.

10 Na imiadumojj cama aiek va ilpu atimi tak atimi irama: era lep atoraliak itai a ilpu atimi amcel vai cama.

11 As ikni cama aiek et idivaig siip eh caig; um imiterimterim cama ehele ilpu atimi aupat.

12 Na ahtai nup iran pece unyuman aiek vai takitai, um eti ikni itai va nimitara.

13 Na ikni cama aiek mika eri asan tas has vai cama a ilpu atimi eblaam nem unyuma, um lep amcel um imiafak ahcil cama ara sji eigki era arahed irama ara.

14 Na ikni cama aiek mika eri tas auyat vai cama a ilpu atimi aupat, er lep auohaig nidjina vai cama natimi.

15 Et eteuc nerek inman irak an nuhup unyak ira iji adiat, et mun lep taluopni pam nyak nehcamai unyak.

16 Va nohran et atuh nyak aien um asan tas has; im lep natimi edemda, im natimi auatatimi.

17 Et mun yet pam irama nitai iji eigki asega; ja egra imiehva euc aijama, egra lep eti efaifa u intas up yi asaig unyuman aijama.

18 Et eti adumojj inliinmopoma aijama, egra lep eti ude nefalaig unyuman aijama;

19 Ja as imiasuoi cama aiek an nuarin amen iran nimyiv, um taluopni pam cama an naupat o inmas.

20 El egra eti imiehva nidai Atua aijama, um adaig jai nikmama vai intak atua;

21 Etpu ahilek nitai ineigki a Atua; et idim ato aien niji itai adinaig anliinmopoi atimi.

22 Er auahas cama ira adiat asega vai euc; Er ika vai cama egra siip aijama eri atgei.

23 Ak Ihova, namu aiji lahlah aiek; na auri aiek par umjeg? atidai aiek, um jim aticijaig cama ira iji mesese.

24 Na auri aiek par adinaig neganimitam, um eti imiehva nohaced unyuma im nerek inman irama?

25 Et asuol pan u nobohtan inliinmopoma aijama; et lep apol iran nohuma.

26 Atidai aiek: um atau imi cama, um imiatamumoh cama va naiheuc unyuman.

SALM 45.

1 Et ehlohos intas upene anliin-mopok : Ek tas ainyak va nitai iji eigki kis ago ainyak ehele Natimarid : et idivaig nitai aged o natimi aged upene namak.

2 Na iklim upene aiek um esjilid ira atimi ; er ati intas upene an nipjineucsum ; va nitai ineigki et asan tas upene vai euc a Atua ira iji mesese.

3 Namu alicaijiraig nautoga unyupun aiek an nahaijem, ak Atua emda, va inupene unyupun im natimi alupas unyupun.

4 Um athut upene irai hors an natimi alupas unyupun va intas inivai-je, im nedo eigpa, im nedo upene ; etpu ehvaig ehelum niiji itai imiali inmatam.

5 Et arig nafana unyupun irai li mopoi ilpu atimi edemda vai natimarid ; era eropse natimi an nuhup unyupun.

6 Ak Atua et eteuc dorona unyupun irai iji mesese : et mopul atoh inmopul an nelcau unyupun.

7 Na merit vai nedo upene aiek, jam amcel vai nedo has : va nitai ineigki is aspi euc an naraki imiacitak a Atua, Atua unyupun marom, mika an esjilid aiek irai ilpu etoam.

8 Et aua nipi mara, im alos, im kusia napelumai asega unyupun, ira iji emnem atimi aivore, na imiacitak vaig aiek.

9 Era amen ehele ilpu takata esga atimi unyupun a ilpu halav atahaig o ilpu atimarid : et amen natimarid takata an matam er aso yin a colt irai Ofir.

10 Ak inhalav atahaig, namu atahaijeg aiek, um aktaktai, um atgeig pam intikgam ehelek ; jim imiehva inpece unyupun, im lep ra an nemnem o etmam :

11 Va nitai ineigki etpu merit

alupas vai nupene unyupun a natimarid : et idim Natimarid unyupun aien ; namu imiahpas yin aiek.

12 Etpu amen eahki inhalav atahaig irai Taurus, erupu lep imiahpas euc a ilpu atimi ikni itai ira iji pece.

13 Et iklim upene inhalav atahaig o natimarid ; er ago colt ira apelumai o un.

14 Uhpun imiapam yin ehele natimarid ira apelumai esjilid : uhpun lep imiapam ehelum ilpu atahaig era amen ehelen ara um apitac yin.

15 Uhpun imiapam ra an nimiacitak um cedaig : erupu apan ara anli nemnem atimi o natimarid.

16 Erupu esjipigmoig ilpu retpora a ilpu hal unyupun ; napu lep ikni ra aiek mika eri ilpu atimi alupas ara an nobohtan asega.

17 Ekpu ika ainyak eri imiehva nidam ira iji mesese : va nitai ineigki erupu imiahpas euc natimi ira iji mesese.

SALM 46.

1 Et uarin adinaig uja a Atua im nemda uja, et lep atau upene imi caija aien an naopan ohacred uja.

2 Va nitai ineigki intupu eti imtitaig akaija, et wat amaamai nobohtan, um lep erekhaigse niiji edoon anliin jop ;

3 Um lep auoc alupas injop, um lep ucjucjaig niiji edoon va nepeau iran. Sela.

4 Et eteuc nofowai et ethi, er imiacitak vai rai wai iran an nuarin pece o Atua, nuarin itaup et amen iran niiji eom atga o Atua esjilid acen

5 Et amen iran a Atua ; inyi idim eti amaamai : etpu auroauro a Atua um atau iran.

6 Eris ehniv a ilpu atimi aupat, eris lep ehioehio nup ira iji elcau : is efek tas aien, is lep updak nobohtan.

7 Et amen ehelaija a Ihova o ilpu agelo; et uarin adinaig uja a Atua o Jakob. Sela.

8 Apam, um almoi niji auritai o Ihova, et amas acen nobohtan vaig.

9 Et ika aien eri ahni nedoa, an nobohtan asega; et asvi ineen nafana aien, um acaldei inpopul; et atnanmud nitai atga an cop aien.

10 Akumu ucsup aijaua, um ato mika ek Atua ainyak; ekpu esjilid ainyak an nuhup o ilpu atimi aupat, ekpu lep esjilid ainyak an nobohtan.

11 Et amen ehelaija a Ihova o ilpu agelo; et uarin adinaig uja a Atua o Jakob. Sela.

SALM 47.

1 Akumu ohpohpoi nikhama aijaua, ak natimi asega; um ahlaig vai Atua an nohramia imiacitak.

2 Et upene eri imitai Ihova injinies acen; et Atimarid esjilid aien an nobohtan asega.

3 Etpu auahas atimi vai caija aien im nup ira iji pece ithan neduaija.

4 Etpu anvai nuarin amen uja aien, is imiacitak vaig a Jakob is aiyu inliinmopon aien vai yin. Sela.

5 Is aridjai a Atua an nahlaig o atimi, im Ihova an nohran taho.

6 Uhmu acesaces nohrai itai vai Atua, um imiahpas yin; uhmu acesaces nohrai itai vai Natimarid, um imiahpas yin.

7 Et Atimarid a Atua an nobohtan asega: akumu acesaces nohrai itai aijaua irai li mopomia lah.

8 Et atimarid o nup ira iji pece a Atua: et eteuc aien a dorona itaup o un.

9 Era mun asjapicnaig a ilpu atimi alupas ira iji pece, ilpu atimi o Atua o Ebrahim: et ohuun ilpu atimi aminjinaig nobohtan a Atua: et esjilid acen aien.

SALM 48.

1 Et esjilid a Ihova, et lep upene mika eri imiahpas alupas yin an nuarin pece o Atua uja, an lolan nedoon itaup o un.

2 Et iklim upene nijinies u nedoon Saion er imiacitak vaig an nobohtan asega; et eteuc nuarin pece o Natimarid esjilid an nahaijen nord.

3 Er ato Ihova irai iji eom esjilid iran mika et uarin adinaig uja aien.

4 Eris idim asjapicnaig a ilpu atimarid, eris lep ehraas atga ura ara.

5 Eris ecetai ara um imiali; eris etehto ara um aha.

6 Eris imtitaig ara um ohacred, et idivaig intakata ineig et apos inhal o un aien.

7 Na auhoig yi agrei niji elcau Tarsis aiek an natoga.

8 Inta mun ecetai akaija et idivaig intis atabajeg akaija, an nuarin pece o Ihova o ilpu agelo, nuarin pece o Atua uja: etpu ati aktit a Atua iri iji mesese. Sela.

9 Ak Atua, ecriis aktaktai naiheuc esjilid unyum aijama, anli neom ahlap unyum.

10 Ak Atua, er imiahpas euc an nobohtan asega va nidam: et ohua nedo atoh an matam.

11 Et upene eri imiacitak an lolan nedoon Saion, erumu lep cediaig a nupu Jerusalem, va nedo ated atimi unyum.

12 Akumu ahparahed Saion aijaua, um arahed iran; um esvi niji uarin amen o ilpu eucsupo.

13 Akumu aktaktai upene natatahau o un aijaua, um imiali niji eom esjilid o un; va akupu asuptecnaig aijaua ehele atimi an tak aopan.

14 Et Atua unyima a Atua ineig-

ki ira iji mesese : etpu atau irama aien um yet pan an naopan mas unyima.

SALM 49.

1 Akumu atahajeg intas ineigki aijaua ak nup ira iji pece asega : akumu atgeig pam intikgamia aijaua, ak natimi asega an nobohtan ;

2 Ilpu atimi upoupo im ilpu atimi esjilid, ilpu atimi ikni itai im ilpu ihki atimi.

3 Ekpu asan tas arapakau ainyak : etpu lep amararo naktaktai u inliinmopok.

4 Ekpu atahajeg intas eucse pece an tikgak ainyak : ekpu aihiaupdicraig intas adinaig unyak ainyak a harp.

5 Ek auri ainyak par imtitaig an naopan ohacred unyak, etuit arahed irak nedo has ?

6 Era asgeig irai padiag ura atimi, um imiacitak nikni itai esjilid ura ;

7 Ja et ehka vaig tah ra par imiatamaig etoan, ka alupai Atua nimitan vai yin.

8 (Et idim ehka nimitan numumoh vaig, ja inyi ti ira iji mesese :)

9 Mika yi umoh aien ira iji mesese, um eti asuol anli nehpanitai.

10 Et ato aien mika era ememas a ilpu atimi arapakau, era lep ti a ilpu atimi ahnag im ilpu atimi auatatimi, um aticijaig nikni itai ura imi tak atimi.

11 Et aktaktai inliinmopura ara mika inyi ti lep ti nihi eom ura, um ika, etpu amen nuarin amen ura ira iji mesese ; era anvi nidai nihi uari obohtan ura par ika nilpun nidara.

12 Ja era eti amen aktit an nupene ura natimi : era idivaig nihi itai eclim edo irai pece ara era ememas ara.

13 Et ahnag nedo ineigki ura, ja era imiacitak intas ura a ilpu mapora. Sela.

14 Er ikni ra anli nehpanitai et idivaig siip ; etpu caig ra inmas ; erupu lep anroauro a ilpu atimi upene um esjilid ira ra ; etpu ti nemda ura : inyi uarin amen ura nehpanitai.

15 Ja etpu imiatamaig nyak a Atua va nemda an nehpanitai etpu idim leh nyak aien. Sela.

16 Namu jim imtitaig aiek etuit ikni itai tah, um lep esjilid natimi alupas o ilpu atimi ehpan iran ;

17 Eruit mas aien inyi ti leucse pan tah nitai aien : inyi ti apitac yin natimi alupas o un.

18 Is wat umoh aien is imiahpas yin aien : erupu lep imiahpas euc natimi, nauit ago nedo upene vai euc aiek.

19 Etpu yet pan aien ehele ilpu retpon ; eri ti lep ecetai inlah ara.

20 Era idivaig nihi itai eclim edo irai pece er auahas ra natimi et upene namen ura, jam eti ato itai.

SALM 50.

1 Et tas a Atua emda, Ihova marom, um ahlaig vai nobohtan um ahes an ridjai o nagesega um yet pan an nette o un.

2 Et naunau a Atua an nedoon Saion, nuarin esjilid acen.

3 Etpu yet pam a Atua uja, um eti ucsup : etpu atnamud itai incop an nuhup o un ; inyi esjilid acen um arahed iran.

4 Etpu ahlaig aien vai nohatag ijinies, im lep nobohtan, ja par asuptecnaig nimitan imi ilpu atimi o un.

5 UhmU asjapicnaig pam ehelek ilpu atimi upene unyak ; ra sfi eigki marom eris asan tas up yi asaig ehelek ara um ahlap vaig.

SALM, 51.

6 Er ehvaig nedo upene o un an nohatag : et idim atimi alupas a Atua. Sela.

7 Ak ilpu atimi unyak, akumu atahajjeg aijaua, ekpu tas ainyak ; ak napu Isreel, ekpu lep tas vai caua ainyak : ek Atua ainyak, Atua unyimia marom.

8 Inki ti ated euc ainyak va niji itai ahlap unyum, im niji itai ahlap atnamud unyum, an nuhup unyak ira iji adiat.

9 Inki ti leh tah kurimatau atamaig ainyak anli neom unyum, ka tah nanin atamaig irai li irahed unyum.

10 Et unyak niji itai eclim edo irai pece asega an nese, im kurimatau irai lola edoon et ahinag.

11 Ek ato ainyak niji man asega irai lola edoon : et lep unyak niji itai eclim edo irai pece aleg.

12 El et ehtelev nyak ainyak el ek eti asaig ehelum ainyak : et unyak nobohtan, im niji itai iran.

13 Ja ek eti caig nohui kurimatau atamaig ainyak, um eti umni inja irai anin.

14 Ago naaurineig vai Atua ; um ehgeijid intas up yi asaig unyum vai Atua esjilid acen.

15 Ahlaig vai nyak an naopan ohacred : ekpu imiatamaig euc ainyak, napu lep imiahpas nyak aiek.

16 Ja et ika a Atua ehele ilpu atimi auatatimi, Eka auri aijaua par asuptecnaig intas alep unyak, um lep tas va intas up yi asaig unyak ?

17 Eka idim amcel vai nesege aijaua, um erekhaig pan itac intas unyak.

18 Naut ecet natimi ehneg itai aiek, na ahced yin aiek ; um lep asipiaig nedo o ilpu atimi ago ingaijid.

19 Et ahes intas has an nipjin-

eucsem, et lep aktaktai intas efai-fa namam.

20 Na ateuc aiek um tas vai etoam ; na asan tas has aiek vai inhalav atamaig o risum.

21 As ago nitai iji eigki aiek, ja kis eti tas ainyak ; as aktaktai aiek mika kis idivai euc ainyak : ja ekpu ated euc ainyak um ahugni lelum vaig.

22 Akumu aktaktai nitai ineigki aijaua, eka eti imiehva Atua aijaua, va ki jim ahpati caua ainyak, ja inyi ti imiatamaig caua tah.

23 Aien et ago naaurineig aien et imiahpas nyak aien : etpu lep ato nitai imiatamaig atimi o Atua aien et ago nedo upene aien.

SALM 51.

1 Ak Atua unyak, namu aiheuc vai nyak aiek, et idivaig naiheuc unyum ; um jim imiehva nedo has unyak et idivaig naiheuc unyum.

2 Namu yiri upene nyak aiek va nauatatimi unyak, um ago adicinadin nyak va nedo has unyak.

3 Ek ato nedo ahnag unyak ainyak ; et lep eteuc nedo has unyak an nuhup unyak irai iji adiat.

4 Kis ago nedo has ainyak vai euc, vai euc marom, um ago nitai has ineigki an nuhup unyum : etpu atoh nedo unyum naut tas aiek, etpu lep upene nedo unyum naut ated nyak aiek.

5 Eris atupun nyak an nedo has ; is lep apos nyak a risik an nauatatimi unyak.

6 Na merit va nedo inivaijec aiek anliinmopoi atimi : namu esege imtak narapakau aiek an nuarin adinaig.

7 Namu ohoaig nyak aiek a hisop, va ekpu adicinadin ainyak ; um yiri nyak va etpu esjilid nahi irak irai hion.

8 Namu ika aiek mika ki ato nimiacitak ainyak im incediaig; etpu lep imiacitak niji eduok as asvi aiek.

9 Namu jim almoi nedo has unyak aiek, um jim imiehva nedo ahnag unyak.

10 Ak Atua, namu ago upene inliinmopok aiek; um lep ati ehelek inliinmopok emda.

11 Namu jim ahlo pan nyak ehelum aiek, um jim atipagki Nesgam Upene ehelek.

12 Namu lep alupai nyak nimiacitak aiek va nimiatamaig nyak unyum; um atau ini nyak an Nesgam Upene.

13 Ja ekpu esege nedo unyum ainyak imi ilpu atimi imipalea; erupu lep adumoj pan ehelum a ilpu atimi auatatimi.

14 Ak Atua, namu imiatamaig nyak aiek: ekpu lep acesaces nohranital emda ainyak an nipjineucsek va nedo atoh unyum.

15 Ak Ihova, namu asalage nipjineucsek aiek, ekpu lep imiahpas euc ainyak an tas unyak.

16 El et merit vai itai ahlap aiek el ek alupai euc ainyak: et eti upene iram nitai ahlap er atnamud.

17 Nitai ahlap vai Atua ineigki inliinmopja taigtaig va nedo has; ak Atua, na eti esjum aiek va inliinmopja taigtaig va nedo has, im inliinmopja upoupo.

18 Namu ago nedo upene vai Saion aiek an tup naiheuc unyum; um uctaig nathatahau Jerusalem.

19 Ja etpu upene iram niji itai ahlap upene, niji itai ahlap er atnamud, im niji itai ahlap er atnamud ehni; erupu idim ahlap ara irai kurimatau an nefata unyum.

SALM 52.

1 Ak natimi emda, na auri aiek par imiacitak nedo has? et ago nedo aiheuc a Atua ira iji adiat.

2 Et aktaktai nedo has namam; et lep idivaig nautoga arig, um efaifa nedo o un.

3 Et aiyu inliinmopom aiek vai nedo has, jam eti aiyu vai nedo upene: et lep aiyu inliinmopom aiek vai intas ahcil jam eti aiyu vai intas inivaijec. Sela.

4 Et merit vai intas adinaig asega namam efaifa.

5 Etpu auahas euc a Atua ira iji mesese, etpu atipagki euc aien, um atoraliak euc an nuarin amen iran unyum, um ehreucvan euc an nobohtan.

6 Erupu lep ecetai a ilpu atimi upene, um imtitaig, um imilaav yin.

7 Almoi natimi ineig et eti ahes ehele Atua nemda o un; ja et asgeig aien an nikni itai o un et ahinag; et lep esjilid nedo has o un.

8 Ek idivaig nauincai oliv emelmat ainyak anli neom o Atua, ek asgeig ainyak an naiheuc o Atua ira iji mesese.

9 Ekpu imiahpas euc ainyak ira iji mesese, as idim ago nitai ineig aiek: ekpu asgeig an nidam ainyak; et idim upene an nuhup o ilpu atimi upene unyum.

SALM 53.

1 Et ika anliinmpon natimi ineig et ahnag aien, Et eti eteuc tah Atua. Era has ara, eris ago nedo has esjilid ara: et eti ago nedo upene tah.

2 Is ias sepam a Atua an nohagtag ira atimi, par almoi kit eris ato itai tah ra um ahilek Atua, ka o'o?

3 Eris ahnag ara asega, eris

ehras ehés has ara asega : et eti ago nedo upene tah, et idim ti.

4 Era ato itai a ilpu atimi auatatimi ka o'o ? era auahas ilpu atimi unyak ara et idivaig era caig nareto ara, um eti ahlaig vai Atua.

5 Is esjilid acen nimitaig ura, is wat ti nitai imtitaig vaig : is idim imiterimterim nedui natimi iji eigki a Atua eris ati nedoa vai euc ara : erupu ehcamai ara, et idim amcel vai ra a Atua.

6 Etmu ahés Saion nitai imiatamaig nupu Isreel ! Etuit imiadumojj ilpu atimi o un a Atua eris leucse pan ra, erupu imiacitak a ilpu mapoi Jakob, erupu lep cediaig a nupu Isreel.

SALM 54.

1 Ak Atua, namu immiatamaig nyak aiek va nidam, um imialep nyak an nemda unyum.

2 Ak Atua ; atahajjeg nalaigaheni unyak ; um aktaktai intas an nijineucsek.

3 Eris atidai vai nyak a nup irai tak uarin, era lep ahilek inmas unyak a ilpu atimi atmas vai nyak : era eti ati Atua an nuhup ura ara.

4 Et idim atau imi nyak a Atua : et amen a Ihova ehele ra sji eigki era leh imi nyak ara.

5 Etpu alupai ilpu atimi edemda vai nyak nimtan has aien, namu auahas ra aiek va intas inivaijec unyum.

6 Ekpu ahlap vai euc ainyak anliinmopok upene : ak Ihova, ekpu imiahpas nidam ainyak ; et idim upene.

7 Is imiatamaig nyak aien va nohacred asega unyak : kis lep alumajidcid ilpu atimi tak atimi irak ainyak.

SALM 55.

1 Ak Atua, namu atahajjeg nalaigaheni unyak aiek ; um jim adinai euc va intas ugni unyak.

2 Aktaktai nyak, um atahajjeg intas unyak ; ek taigtaig ainyak um ohacred um aunyauaig ;

3 Va nohrai ilpu atimi tak atimi irak, im nedo ipjin o ilpu atimi auatatimi : era atijai nedo has irak ara, um amcel vai nyak an nedemda ura.

4 Et ohacred alupas inliinmopok ainyak : et mun yet pam irak nimitaig va inmas.

5 Ek imtitaig ainyak um ucjucjucaij, et mun lep taluopni pam nyak netehto.

6 Kis ika ainyak, ah ! ek merit ainyak vai nehpaek et idivaig nucip mika ki ae pan an tak aurin ainyak um atumop.

7 Ekpu apan itac acen ainyak, um amen an namas acen. Sela.

8 Ekpu auroauro ainyak um aha va nimitinjop alupas im nehio.

9 Ak Ihova, namu auahas ra aiek, um atiakoai jipe intas ura : kis idim ecetai nehtauro ainyak im nimiisjis itai an nuarin pece.

10 Era arahed iran ara ijinies ira athatahau o un ira adiat im nepeg : et lep amen iran nedo ahnag im nohacred.

11 Et amen nedo has iran : et lep ti nedo ahcil im nedo efaifa ira iji efalaig iran.

12 El is atuh nyak a natimi tak atimi irak, el ek eti aktaktai ainyak : el is amcel vai nyak aien is atidai vai nyak aien, el ek atpuh vai yin ainyak.

13 Ja as ago aiek, ak napah unyak, im nahajjek, im etoak.

14 Intis tastas upene sjipe akaijau, um ehras apan an neom o Atua.

15 Etmu yet pam inmas ira ra,

erumu lep asuol uma atmas ara: et amen nedo has ehelera ira iji uarin amen ura.

16 Ja ekpu idim ahlaig vai Atua ainyak; etpu lep imiatamaig nyak a Ihova.

17 Ekpu ago nalaigaheni ainyak um ahlaig ijinies an jupura, im nuhiale, im nadiat adiat: etpu lep atahajjeg nohrak aien.

18 Is imiatamaig nyak aien va nedoa eris ati vai nyak, um asa neigpa, eris idim ahinag ara ehelek.

19 Etpu atahajjeg a Atua, um aru ira ra, aien marom is eteuc aien ira iji mesese. Sela. Era eti amaamai ara, era idim eti imtitaig Atua ara.

20 Is atgeig yi apidi nikman aien vai ra eris tup eclim amen ehelen ara: is eti ehgeijid intas up yi asaig o un aien.

21 Is esjilid nupdak u intas o un irai butter, ja is amen nedoa anliinmopon: is esjilid nupdak u intas o un ira araki, jam lep idivaig nauitoga arig.

22 Atijai nitai ahelwei unyum irai Ihova, etpu lep atau imi euc aien: etpu idim aminjinaig ilpu atimi upene aien va eri jim amaamai ara.

23 Ja napu imiasuol ra aiek, ak Atua, anli nehpanitai has: erupu umumoh ira ahiji adiat ira ra ache a ilpu atimi atgei atmas im ilpu atimi efaifa; ja ekpu asgeig iram ainyak.

SALM 56.

1 Ak Atua, namu aiheuc vai nyak aiek: era merit atimi par atleg nyak era atmas vai nyak ara ira iji adiat um ago nedo ipjia vai nyak.

2 Era ika a ilpu atimi tak atimi irak eri atleg nyak ira iji adiat: ak Atua esjilid acen, era ahinag ara sji eigki era ago nedoa vai nyak ara.

3 Ekuit imtitaig ainyak, ekpu asgeig iram ainyak.

4 Ekpu imiahpas Atua ainyak va intas o un, ek asgeig irai Atua ainyak; inki ti imtitaig tah nitai ainyak era ago vai nyak atimi.

5 Era asaig acal intas unyak ara ira iji adiat: et has naktaktai asega ura vai nyak.

6 Era asjapicnaig ara, era atpuh ara, era alumaijidcid nedo unyak ara, era atpoijinaig nyak ara par atgei nyak.

7 Era eclim amen ara va nedo has ura; ak Atua, namu imiasuol natimi iji eigki aiek an tavaitaup unyum.

8 Na esvi natga sjipe unyak aiek: ati nidi imtak an hubej unyum: et lep amen an nitasvitai unyum.

9 Ekuit ahlaig vai euc ainyak, erupu adumoij a ilpu atimi tak atimi irak: ek ato nitai ineigki ainyak, et idim amen ehelek a Atua.

10 Ekpu imiahpas Atua ainyak va intas o un: ekpu imiahpas Ihova ainyak va intas o un.

11 Ek asgeig irai Atua ainyak; inki ti imtitaig tah nitai ainyak era ago vai nyak atimi.

12 Ak Atua et amen irak intas up yi asaig unyak ehelum: ekpu imiahpas euc ainyak.

13 As imiatamaig nyak aiek va inmas: namu lep aminjinaig neduok aiek va ki jim ebehtau ainyak, va ekpu atga ainyak an nuhup o Ihova an lah an nobohtan.

SALM 57.

1 Aiheuc vai nyak, ak Atua, aiheuc vai nyak: et asgeig iram inliinmopok ainyak: ekpu. amen upene ainyak ithan naiyu an nehpanum um imihum pan an naopan yehki etpu ti nohacred iji eigki.

2 Ekpu ahlaig vai Atua esjilid

acen ainyak; vai Atua ineig et ago itai vai nyak aien.

3 Etpu ika aien an nohatag eri imiatamaig nyak va intas has o un et merit aien nauahas nyak vaig. Sela. Etpu ehvaig naiheuc o un a Atua im nedo inivaijec o un.

4 Ek amen ehele laion ainyak: ek asjeuc ainyak ehele ra sji eigki et ere intavaitaup ura, natimi iji eigki marom, et mopul um afana neijsira, et lep autoga arig namara.

5 Namu esjilid aiek, ak Atua ijinies an nohatag; etmu lep esjilid natimi alupas unyum an nobohtan asega.

6 Eris ati nopoig va neduok ara; et auatjalidi inliinmopok ainyak: eris ucji nehpanitai an nuhup unyak ara, ja eris eropropse anliin ara. Sela.

7 Et amen aktit inliinmopok ainyak, ak Atua, et amen aktit inliinmopok ainyak: ekpu acesaces nohranitai ainyak um imiahpas euc.

8 Etmu aiji lahlah inliinmopok ainyak, etmu aiji lahlah salteri im harp: ekpu lep auroauro ainyak um aiji lahlah.

9 Ak Ihova, ekpu imiahpas euc ainyak an nuhup o atimi: ekpu acesaces nohranitai vai euc ainyak an nuhup o nup ira iji pece.

10 Et idim esjilid naiheuc unyum um yet pan an nohatag, et lep yet pan nedo inivaijec unyum an napat an nohatag.

11 Namu esjilid aiek, ak Atua, ijinies an nohatag, etmu lep esjilid natimi alupas unyum an nobohtan asega.

SALM 58.

1 Ak ilpu atamaig, eka idim eti asan tas atoh aijaua, ak ilpu hal o atimi eka eti tastas alep upene aijaua.

2 Eka aktaktai nedo has anliin-

mopomia aijaua; eka ago nedo ipjin ira ikmamia aijaua an nobohtan.

3 Era ahnag a ilpu atimi auatatimi an naopan apos ra, era ahnag ara an halav ura, um asan tas ahcil.

4 Et idivaig nitai acen an ninyiv nitai acen ura: era idivaig ninyiv ara et ucjipines intikgan um eti ahge itai.

5 Era eti atahajjeg nohrai ilpu atimi alpai ra ara, eruit alpai upene ra ara.

6 Ak Atua, namu ahti neijsira aiek an nippineucsera; Ak Ihova, namu ahtasvi nibat esjilid o inhakli laion aiek.

7 Erumu auroauro ara um ti et idivaig inwai et yah ira iji adiat; etuit aiyihi nafana o un aien, uhmu esjelde sjipe ra.

8 Erumu emesmas ara asega et idivaig intikia et auroauro um updak, um lep idivaig inhalav et areuctikgan iran a risin, um eti almoi nagesega.

9 Inyi ti fi ehri nippura unyimia an cop irai rai cai, ja etpu ahlada ra aien an naaup yi atmas, an numumoh vaig ura, an tavaitaup o un.

10 Erupu imiacitak a ilpu atimi upene eruit almoi neruvaig nedo has ura: etpu yiri neduon aien an ja irai ilpu atimi auatatimi.

11 Erupu lep ika atimi, et idim eteuc nimitan imi ilpu atimi upene: et idim eteuc a Atua um tastas alep va atimi an nobohtan.

SALM 59.

1 Ak Atua unyak, namu imiatamaig nyak aiek vai ilpu atimi tak atimi irak: aminjinai nyak vai ra era atidai vai nyak ara.

2 Namu imiatamaig nyak aiek vai ilpu atimi ago nedo has, um imiicaho nyak vai ilpu atimi atgei atmas.

SALM, 60.

3 Era idim ahpoijinai nyak ara par atgei nyak; eris asjapicnaig vai nyak a ilpu atimi emda; ja is ti nedo imipalea unyak, um ti nedo has unyak, ak Ihova.

4 Era athut jipe ara um atidai vai nyak ja et ti nedo has unyak: namu aiji lahlah aiek par ehtet irak, um almoi.

5 Ak Ihova, Atua o ilpu agelo, im Atua o nupu Isreel, namu aiji lahlah aiek um ateghe ilpu atimi aupat asega: um jim aiheuc vaig tah natimi auatatimi. Sela.

6 Era adumoij an jupura ara: era aunyauaig ara et idivaig kuri um arahed an naurin pece.

7 Et ahinag intas ura; et amen nautoga irai ipjieucsera: era ika ara et atahajjeg a di?

8 Ja napu imilaav ra aiek, ak Ihova; napu imiafak ahcil ilpu atimi aupat asega aiek.

9 Ekpu apol iram ainyak va nemda o un: et idim itai atapanes va nyak a Atua.

10 Etpu uhup irak a Atua ineig et aiheuc vai nyak aien; etpu ika a Atua ki almoi nitai merit unyak ainyak irai ilpu atimi tak atimi irak.

11 Namu jim atgei ra aiek, va eri jim eti imiehva a nup iran pece unyak: imiterimterim ra an nemda unyum: ak Ihova, nitai atapanes vai cama, namu imiasuol ra aiek.

12 Nedo has an nipjineucsera ineigki intas et ahes iran; uhmu anai ra inliinmopura ijinies: im lep intas has im intas ahcil era asaig ara.

13 Namu auahas ra aiek an tavaitaup unyum, auahas ra mika eri atti ara: erumu ato ara an nobohantan asega mika et atimarid o Jekob a Atua.

14 Erumu adumoij pam injupura ara; erumu lep aunyauaig ara et idivaig kuri, um arahed an nuarin pece.

15 Erumu atga sjipe ara va nitai

caig, erumu lep aunyauaig ara el era ti gaije ara.

16 Ekpu acesaces nohranitai ainyak va nemda unyum; ekpu imiahpas alupas naiheuc unyum ainyak an nuhialeg: as aminjinaig nyak aiek um imiatamaig nyak an naopan ohacred unyak.

17 Ekpu acesaces nohranitai vai euc ainyak, ak nemda unyak: et itai atapanes vai nyak a Atua, um lep Atua aiheuc vai nyak.

SALM 60.

1 Ak Atua, as aticijaig cama aiek, as imiterimterim cama aiek, is edemda inliinmopom aiek: namu ahidaig pam euc ehelema aiek.

2 As ika aiek yi ucjucjaig nobohantan; as ehtoplecoplec aiek; asa neigpa iran: et idim amaamai.

3 As ehvaig niji itai ehka ehele ilpu atimi unyum aiek: as alumama waina aiek er ahnag vaig.

4 As alupai ilpu atimi imtitai euc nitahlaig aiek, va uhpu atijai, va intas inivaijec unyum. Sela.

5 Va uhpu imiatamaig ilpu atimi unyum et aiyu inliinmopom aiek vai ra; namu imiatamaig cama aiek an matam um atahajjeg intas unyak.

6 Is tas a Atua an nuarin itaup o un: ekpu imiacitak ainyak, ekpu ahaig Sikem ainyak, um akaro sjipe nihkanse Sukkod.

7 Ek ohuun Ciliet ainyak, et unyak Manasi; et lep nemda esjilid unyak Ifreim; et ahes intas alep unyak Juta.

8 Et elcau ereuc iran unyak Moab; ekpu ethaig su unyak ainyak ijinies irai Itom: etmu imiacitak vai nyak Filistia.

9 Etpu imiapan nyak an nuarin pece esjilid a di? Etpu atau pan irak Itom a di?

10 Aiek marom, ak Atua, as aticijaig cama aiek; aiek, ak Atua, as eti ahced cama aiek u nedoa.

SALM, 61, 62, 63.

11 Imiatamaig cama va nohacred: et tak itai nimiatamaig cama o atimi.

12 Ecrupu emda aijama vai Atua; etpu idim atga ijinies aien irai ilpu atimi tak atimi irama.

SALM 61.

1 Ak Atua, atahaijeg nahlaig unyak; aktaktai nalaigaheni unyak.

2 Etuit ohacred inliinmopok ainyak ekpu ahlaig vai euc ainyak an tid an nobohtan: namu atau pan irak aiek u inhehteuc et ijinies acen vai nyak.

3 As aiyu vai nyak aiek, im nuarin amen upene unyak, va ilpu atimi tak atimi irak.

4 Ekpu amen ainyak an neom atga unyum ira iji adiat; ekpu atpuh ainyak ithan naiyu an nehpan Sela.

5 Ak Atua, as atahaijeg intas up yi asaig unyak aiek: as alupai nyak ilpu atimi imtitaig nidam aiek mika ki ohuun ra ainyak.

6 Napu ika aiek yi ahinag nadiat irai natimarid: im lep ahinag niji mesese iran.

7 Etpu amen aien an nuhup o Atua ira iji mesese: namu imiatamaig yin aiek an nedo aiheuc im nedo inivaijec unyum.

8 Ja ekpu imiahpas nidam ainyak ira iji mesese, um ehgeijid intas up yi asaig unyak ira iji adiat.

SALM 62.

1 Et idim aijnaig Atua inliinmopok ainyak, et ahes ehelen nitai imiatamaig nyak.

2 Et hehteuc unyak aien ache im nitai imiatamaig nyak; et itai atapanes vai nyak aien; inki ti imtitaig alupas ainyak.

3 Akupu aktaktai nedo has vai natimi aijaua um yet pan an nahopan? uhpu atgei caua asega: akupu

idivaig nirahed iji eejeuc aijaua, um lep idivaig nah mutit.

4 Era idim tastas ara mika eri auahas natimi alupas o un ara: era imiacitak intas ahcil ara: era asan tas upene an nipjineucsera ara, ja era asan tas has ara. Sela.

5 Etmu aijnaig Atua ache inliinmopok ainyak; et ahes ehelen nitai iji eigki ek merit vaig ainyak.

6 Et hehteuc unyak im nitai imiatamaig nyak aien ache; et itai atapanes vai nyak aien; inki ti imtitaig ainyak.

7 Et ahes ehele Atua nitai imiatamaig nyak im natimi alupas unyak: et hehteuc esjilid unyak a Atua im naiyu unyak.

8 Akumu asgeig iran aijaua, ira iji adiat; ak ilpu atimi akumu asup-tecnaig inliinmopomia aijaua an nuhup o un: et aiyu vai caija a Atua. Sela.

9 Era idim tak itai a ilpu ihki atimi, era lep ahcil a ilpu atimi alupas: uhuit ikni ra an nitai asjaaicnaig era idivaig tak itai ara.

10 Jim asgeig an nedo ipjin, um jim ijinies inliinmopomia va natoraliak vaig itai: el et ahinag inpadiaig unyimia etmu jim apol iran inliinmopomia aijaua.

11 Is ec ethi tas a Atua; kis ec ero atahaijeg nitai ineigki ainyak; mika et emda a Atua.

12 Ak Atua, et lep amen naiheuc vai atimi ehelum: na idim aru ira atimi aiek et idivaig nauritai ura.

SALM 63.

1 Ak Atua, na Atua unyak aiek; ekpu auroauro ainyak um ahilek euc: et merit vai euc inliinmopok ainyak, et lep mas vai euc nohuk an pece mese um imlai, et ti inwai iran:

2 Par almoi nemda unyum im natimi alupas unyum, et idivaig kis

SALM, 64, 65.

alum euc ainyak an nuarin itaup.

3 Et esjilid naiheuc unyum irai itai umoh iran, va nitai ineigki, ekpu imiahpas euc ainyak an nipjineucsek.

4 Ekpu idim asan tas upene vai euc ainyak an numoh unyak : ekpu adaigjai nikmak ainyak an nidam.

5 Etpu gaije inliinmopok ainyak va nitai caig upene : ekpu imiahpas euc ainyak an nipjineucsek um cediaig :

6 Ekuuit imiehva euc ainyak an tinak, um aktaktai euc an nepeg asega.

7 As atau imi nyak aiek, va nitai ineigki, ekpu imiacitak ainyak ithan naiyu an nehpan.

8 Et apol emda iram inliinmopok ainyak : et asjiraig nyak inmatam.

9 Ja erupu apan ira iji uarin ubou an nobohtan ara sji eigki era ahilek nesgak ara par auahas.

10 Erupu ememas va nautoga ara : erupu itai alaai alope ara.

11 Ja etpu imiacitak Atua a nati-marid, erupu cediaig ara asega era asan tas aktit ara vai yin : ja uhpu atapanes nipjineucse ra sji eigki era asan tas ahcil ara.

SALM 64.

1 Ak Atua, atahajjeg nohrak an nalaigaheni unyak : aminjinaig nyak va ki jim imtitaig natimi edemda vai nyak ainyak.

2 Adinaig nyak va intas efaifa o ilpu atimi auatatimi ; im lep nehtauo o ilpu atimi ago nedo has.

3 Era ati neiji namara ara et idivaig nautoga, um aiyihi nafana ura, intas acen marom.

4 Mika eri aticijaig nafana ura ara an nuarin adinaig vai natimi upene ; era auroauro ara um aticijaig nafana ura vai yin, um eti imtitaig.

5 Era emda an nedo has ara : era tastas jipe ara mika eri ana irai

opoig asa ; era ika ara, Etpu alum caija a di ?

6 Era ahilek nedo has ara ; era ahilek emda ara ahilek emda ara um ago ehni ; et ubo naktaktai u inliinmopura ara asega.

7 Ja etpu aticijaig nafana o un vai.ra a Atua ; uhpu auroauro um ahcai ra.

8 Et um ucco etpu yet pam ira ra intas ura : erupu aha ara asega era ecet ra ara.

9 Erupu imtitaig natimi asega, um asuptec naig nauritai o Atua ; erupu lep aktaktai upene nedo o un ara.

10 Erupu imiacitak Ihova a ilpu atimi upene, um asgeig iran ; erupu lep cediaig a ilpu atimi inivajjec inliinmopura.

SALM 65.

1 Ak Atua, er imiahpas euc Saion ; uhpu lep ehgejid intas up yi asaig ehelum.

2 Na atahajjeg intas alaigaheni aiek, erupu ahtag pam ehelum nati-mi asega.

3 Et esjilid irak nedo has : ja napu adahpoi nedo has unyima aiek.

4 Et mun ahes moiij a natimi ineig na ehtai yin aiek, um ika yi apam ubutpotet ehelum, mika yi amen aien anli nekaro unyum : ecrupu gaije aijama an nupene an neom unyum, neom ahlap unyum marom.

5 Ak Atua imiatamaig cama, napu adai intas unyima aiek an nedo imiali ; er asgeig iram an nobohtan asega im lep ra itac acen an jop.

6 Is ikni aktit niij edoon aien an nemda o un, et esjilid nemda o un :

7 Et ahpu neigpa an modjan jop aien, im inmodjan nepeau iran, im nehtauo o natimi.

8 Era lep imtitaig niij itai asja-

SALM, 66.

sicnaig unyum ara sji eigki era amen ara an tid an nobohtan, na ika aiek eri imiacitak an ridjai o un um yet pan an nette o un.

9 Na ateghe nobohtan aiek, um ohoag; na ago upene aiek an nofo-wai o Atua et amen iran inwai alupas: na auritai iran aiek ja par ika yi ededel sito incara.

10 Na ohoag alupas nacijitai aiek: na ika aiek yi asuol incopda ira aui wai: na ago updak aiek irai isjisji: na asan tas upene aiek va inji itai ededel iram.

11 Et esjilid nedo upene unyum an lidiya im inmesese; et ahes niji itai upene an natga unyum.

12 Er ecetai ira iji uarin an namas acen: er lep imiacitak irai lola edoon tintin ira iji uarin asega.

13 Era ahinag acen siip an pece; et lep adahpoi niji ihkanse sito; et eteuc nimiactak iran, um lep incediaig.

SALM 66.

1 Akumu ahlaig ijinies vai Atua aijaua, ak nup ira iji pece asega.

2 Akumu acesaces nohranitari aijaua vai nidam upene: um imiahpas natimi alupas o un.

3 Akumu ika ehele Atua aijaua, Er imtitaig alupas nauritai unyum! erupu atpuse an nuhup unyum a ilpu atimi tak atimi iram va nemda unyum.

4 Erupu imiahpas euc a nup ira iji pece asega, um acesaces nohranitari vai euc; erupu acesaces nohranitari ara vai nidam. Sela.

5 Apan um almoi nauritai o Atua; et itai imiali nedo o un vai atimi.

6 Is ika aien yi ame injop: eris atga ara an niblan jop; intis imiacitak eahki akaija vai yin.

7 Et atimarid aien va nemda o un ira iji mesese; et almoi nup ira iji pece aien an nesganimtan; etmu

jim ijinies inliinmopoi ilpu atimi imipalea.

8 Ak nup irai pece akumu ago naaurineig vai Atua uja aijaua, uhmu atahaijen, nohran nimiahpas yin:

9 Et atapanes inmas vai caija aien, um ika yi jim amaamai nedu-aija.

10 Ak Atua, as alumaijidcid cama aiek: as ago upene cama aiek et idivaig er ago upene silver.

11 As imiapam cama aiek anli nopoig, as atijai nohacred aiek an cehema.

12 As ika aiek eri atga ijinies iraija a ilpu atimi atga a hors; ecris atga an jop aijama im lep an wai: ja as imiapam cama aiek an nuarin upene.

13 Ekpu apan ainyak anli neom unyum um apos niji itai ahlap atnamud: ekpu ehneijid intas up yi asaig unyak ehelum ainyak.

14 Is ahes an nipjineucsek, kis lep asaig ainyak an naopan yehki kis ohacred ainyak.

15 Ekpu ahlap vai euc ainyak ira iji itai ahlap atnamud upene, im lep nagako irai siip atamaig; ekpu ahlap ainyak irai kurimatau atamaig im lep nanin. Sela.

16 Ak ilpu atimi imtitai Atua asega, apam um atahaijeg, ekpu asuptecnaig, nitai ineigki ainyak is ago vai nyak Ihova.

17 Kis ahlaig vai yin ainyak an nipjineucsek, kis lep imiahpas yin ainyak.

18 El ek apos tah nedo has anliinmopok ainyak, inyi ti atahaijeg intas unyak a Ihova:

19 Ja is idim atahaijeg intas unyak a Atua: is aktaktai intas an nalaigaheni unyak aien.

20 Naaurineig vai Atua, is eti esjum aien vai nalaigaheni unyak, um eti atipagki naiheuc o un vai nyak.

SALM 67.

1 Etmu aiheuc vai cama a Atua, um asan tas ces yi aloai cama ; etmu lep upene nesganimtan vai cama. Sela.

2 Va uhpu ato nefalaig unyum an nobohtan ; im nedo imiatamaig atimi unyum ira iji pece asega.

3 Ak Atua, erumu imiahpas euc natimi, erumu imiahpas euc natimi asega.

4 Erumu imiacitak a nup ira iji pece um acesaces nohranitai va nimiacitak ura : napu tas alep atoh aiek vai atimi, um atau irai nup ira iji pece an nobohtan. Sela.

5 Ak Atua, erumu imiahpas euc natimi ; erumu imiahpas euc natimi asega.

6 Ja etpu ohoai itai upene an nobohtan ; etpu lep asan tas ces yi aloai cama a Atua, Atua unyima marom.

7 Etpu asan tas ces yi aloai cama a Atua ; erupu lep imtitai yin a nup ira iji pece asega.

SALM 68.

1 Etmu atidai a Atua, erumu terimterim a ilpu atimi tak atimi iran : erumu lep aha an nuhup o un a ilpu atimi amcel vai yin.

2 Et idivaig et ahladaig nadran cop, et um ucco namu ahlo ra aiek : et idivaig et updak nidincai va incop, et um ucco erumu ati a ilpu atimi auatatimi an nuhup o Atua.

3 Erumu imiacitak a ilpu atimi upene ; erumu imiacitak ara an nuhup o Atua : erumu imiacitak alupas ara.

4 Akumu acesaces nohranitai aijaua, um imiahpas nidan : akumu imiahpas yin aijaua et atga ijinies an nohatag aien an nidan Jah, um cediaig an nuhup o un.

5 Et etmai ilpu umnij a Atua um aktaktai ilpu takata eris ememas a ilpu atumn ura an nuarin itaup o un.

6 Et alupai ilpu atimi amen ehcid nuarin amen ura a Atua : et aihiyi ra sji eigki aien eris arore ra irai atau hat : ja era amen an pece mese a ilpu atimi auatatimi.

7 Ak Atua as wat atga aiek an nuhup o ilpu atimi unyum, as wat atga aiek an namas acen. Sela.

8 Is ucjucjucaij nobohtan, is lep toreliek nohatag an nuhup o Atua ; is idim amaamai Sainai an nuhup o Atua, Atua o nupu Isreel.

9 Ak Atua, as atladoi incopda alupas aiek, as lep ago emda ilpu atimi unyum aiek an nauatialidi ura.

10 Eris amen an pece a ilpu atimi unyum : ak Atua, as ikni itai aiek an naiheuc unyum vai ilpu ihki atimi.

11 Is asan tas a Ihova : eris ahinag ara sji eigki eris imiapahni intas ara.

12 Eris idim aha a ilpu atimarid o ilpu eucsupo ; eris lep ahaig sjipe inpadiaig eris atoraliaik ara sji eigki eris amen irai emnem ura.

13 Akuit asjeuc aijaua irai li irahed o siip, akupu idivaig nehpa nucip aijaua er adahpoi a silver, im nalau iran et naunau et idivaig colt.

14 Is wat imiterimterim ilpu atimarid a Atua emda, is ahi et idivaig hion Salmon.

15 Et idivaig nedoon Besan nedoon o Atua ; nedoon ijinies et idivaig nedoon Besan.

16 Eka imiisjis inhe aijaua, ak niji edoon ijinies ? et merit a Atua namen vaig an nedoon ineigki ; etpu idim amen iran a Ihova ira iji mesese.

17 Et ahinag niji itai atga o Atua, era ahinag acen a ilpu agelo o un ;

[SALM, 69.

et amen ehele ra a Ihova, et idivaig an lolan nedoon Sainai an naurin itaup.

18 As aridjai aiek, as atau ira atimi is ahinag aiek eris leucse ra an nedoa, as leucse niiji itai tup ahtai aiek ehele atimi; ilpu atimi auatati marom, va etpu amen ehele ra a Ihova Atua uja.

19 Naaurineig vai Ihova ira iji adiat, er atijai nitai ahelwei iraija; ja et Atua imiatamaig caija aien. Sela.

20 Et Atua imiatamaig atimi a Atua uja; et atapanes inmas a Ihova Atua uja.

21 Etpu ehtoplecoplec nidjini ilpu atimi tak atimi iran a Atua, im nipek o natimi ineig et imiisjis aien um ago nedo has.

22 Is ika a Ihova, ekpu imiadumoij ilpu atimi unyak Besan ainyak, im lep an niblan jop:

23 Va etpu icop neduom an ja irai ilpu atimi tak atimi iram, um eluon iran kuri unyum.

24 Eris almoi natga unyum ara, ak Atua; natga o Atua unyak, Natimarid unyak, an nuarin itaup.

25 Eris atga uhup a ilpu atimi acesaces nohrai itai, eris apitac a ilpu atimi ahlai itai: eris amen ehele ra a ilpu atahaig um aticei timbril.

26 Akumu ago naaurineig vai Atua aijaua, Ihova marom, ira asjapicnaig unyimia, ak ilpu mapoi Isreel.

27 Et amen eahki a Benjamin inharei natimi alupas ura, im lep ilpu atimi alupas Juta im ilpu dualep ura, im ilpu atimi alupas Naftali.

28 Is asaig nemda unyum a Atua: ak Atua, namu ago aktit nitai ineig aiek as auritai vai cama.

29 Erupu imiapen ehelum niiji itai tup ahtai a ilpu atimarid va neom aklap unyum Jerusalem.

30 Namu ated niiji itai eclim edo irai pece aiek irai ieg, ilpu atimi alupas et ahinag im ilpu hal ura, va erupu atpuse ara um apos inuari silver: namu imiterimterim natimi iji eigki aiek era imiacitak nedoa ara.

31 Erupu ahes Ijipt a ilpu atimi alupas esjilid; erupu adaig jai nikmara ehele Atua a nupu Idiopia.

32 Akumu acesaces nohranilai vai Atua aijaua ak nup ira iji pece an nobohtan; akumu acesaces nohrai itai vai Ihova aijaua:

33 Vai yin marom et atga aien an nohatag ijinies acen is eteuc ira iji mesese; et tas aien, et lep emda nohran.

34 Akumu ika aijaua et emda a Atua; et atimi alupas o nupu Isreel, aien, et lep amen nemda o un ijinies an nohatag.

35 Ak Atua, na esjilid aiek ira iji uarin itaup unyum: et alupai ilpu atimi o un nemda im natimi alupas a Atua o nupu Isreel. Naaurineig vai Atua.

SALM 69.

1 Ak Atua, namu imiatamaig nyak aiek; et mun yet pam inwai anliinmopok.

2 Ek ette an nosal ubo ainyak, et ti tah nuarin naiji vaig iran: ek mun yet pam ainyak an wai ubo, et lep taluopni pam nyak inwai alupas.

3 Ek auatialidi ainyak va intaig: et mese inhujgopul unyak: et aupat nesganimtak ainyak va naijgaig Atua unyak.

4 Era ahinag irai numri nidjinik ara sji era ispara amcel vai nyak ara: era emda ara sji eigki era merit ara nauhas nyak vaig, era lep ispara edemda vai nyak ara: kis lep aru nitai iji eigki ainyak kis eti atoraliaik ainyak.

5 Ak Atua, na ato nedo ahnag

SALM, 69.

unyak aiek ; er eti lep adinaig nedo has unyak vai euc.

6 Ak Ihova, Atua o ilpu agelo, erumu jim ehcamai vai nyak ara sji eigki era aijnai euc ara : ak Atua o nupu Isreel, erumu jim ehcamai vai nyak ara sji eigki era ahilek euc ara.

7 Er asan tas has vai nyak va nidam ; er lep ecetai nehcamai an nesganimtak.

8 Ek up an taka uarin ainyak, irai ilpu etoak, im intak atimi irai ilpu hal o risik.

9 Ek mas ainyak va inmerit unyak va neom unyum ; et mun lep yet pam irak intas has ura eris asan tas has vai euc ara.

10 Kis wat taig ainyak um atoa-kam, eris lep imiafak ahcil ara.

11 Kis aso nyak ainyak an nape-lumai ucai, eris lep imiafak ahcil nyak ara.

12 Era tas vai nyak ara sji eigki era ateucara an neucse nathatahau ; eris lep acesaces nohranitai vai nyak a ilpu atimi umni kava.

13 Ja ek ago nalaigaheni vai euc ainyak, ak Ihova, an naopan upene : ak Atua, atahajjeg intas unyak aiek an naiheuc esjilid unyum, va nedo inivaijec unyum.

14 Atipagki nyak an nosal, va ki jim ette ainyak : imiatamaig nyak va ilpu atimi amcel vai nyak, im lep irai wai ubo.

15 Eruit ahgarero etmu jim talu-opni pam unyak inwai, etmu jim lep atleg nyak inwai ubo, etmu jim atapanes neucsen nehpanitai irak.

16 Ak Ihova, namu atahajjeg intas unyak aiek ; et esjilid naiheuc unyum : aihidaig pam euc ehelek aiek et idivaig naiheuc upene unyum et ahinag.

17 Jim adinaig nesganimtam vai naheca unyum ; ek ohacred ainyak ;

auroauro um atahajjeg intas unyak.

18 Apam ubutpotet ehelek, um imiatamumoh nyak : imiatamaig nyak va ilpu atimi edemda vai nyak.

19 Na ato intas has vai nyak aiek, im nehcamai unyak, im nihkin natimi unyak : era amen an nuhup unyum a ilpu atimi edemda vai nyak asega.

20 Et ohacred inliinmopok ainyak ; et lep auatialdi acen : kis aijnai ilpu atimi aiheuc vai nyak ainyak, ja is ti tah ; im ilpu atimi ago emda inliinmopok, jam eti ecet tah.

21 Eris lep alupai nyak nohoan icai acen incak ; kis wat ahvig wai ainyak eris alupai nyak vinecar lumak.

22 Etmu itai oop ra nitai caig ura : etmu itai anai ra niji ahlap naaurineig ura.

23 Etmu aupat nesganimtara va eri jim alum itai ara, etmu lep ucjujucaij niji eduok ura ira iji adiat.

24 Namu atladoi intavaitaup unyum ira ra aiek, etmu lep asjirai ra nedemda esjilid unyum.

25 Etmu aheyu neom esjilid ura ; erumu jim amen tah ira iji eom atga ura.

26 Era edemda ara vai yin as ated yin aiek ; era lep tas ara vai yin as auad yin aiek.

27 Etmu esjilid acen neruvaig imi ra ; erumu jim asipiaig inupene unyum ara.

28 Uhmu atipagki ra an nitasvitai va ilpu atimi umumoh, um jim aged ra tup ethi pan irai ilpu atimi upene.

29 Ek ihkin natimi ainyak um ohacred : ekmu amen upene ainyak, ak Atua, va nimiatamaig nyak unyum.

30 Ekpu imiahpas nidai Atua ainyak an nohranitai, ekpu asan tas eccen vai yin ainyak an naaurineig.

31 Inyi upene ineig an nuhup o Ihova irai kurimatau atamaig alupas ka haklin et eteuc nibat o un im neduon.

32 Erupu almoi a ilpu atimi npoupo inliinmopura um imiacitak : etpu lep umumoh inliinmopomia aijaua ak ilpu atimi ahilek Atua.

33 Et atahaijeg intas o ilpu ihki atimi a Atua, um eti amcel vai ra sji eigki er arore ra.

34 Etmu imiahpas yin nohatag, im nobohtan, im injop im niji itai asega et umumoh iran.

35 Etpu imiatamaig Saion a Atua, um ago neom ira iji uari pece Jutaia : va erupu amen eahki ara, um ohuun.

36 Erupu lep ohuun a ilpu mapoi ilpu aheca unyum : erupu lep amen iran ara et aiyu inliinmopura ara vai nidam.

SALM 70.

1 Ak Atua, auroauro um imiatamaig nyak ; auroauro um atau imi nyak, ak Ihova.

2 Erumu ehcamai um imtitaig ara sji eigki era ahilek nyak ara par atgei nyak : uhmu ahlo um auad yi apidai ra sji eigki era merit ara nauahas nyak vaig.

3 Erumu adumoij va nehcamai ura ara sji eigki era ika ara, Aha, aha.

4 Erumu imiacitak um cediag vai euc ara sji eigki asega era ahilek euc ara : erumu lep ika ara sji eigki era merit va nitai imiatamaig atimi unyum ira iji adiat, Etmu esjilid a Atua.

5 Ja ek auatialidi ainyak im nihkin natimi : ak Atua, auroauro um apam ehelek : na atau imi nyak aiek im imiatamaig nyak ; ak Ihova, jim atumop.

SALM 71.

1 Ak Ihova, ek asgeig iram ainyak ; ekmu jim ehcamai ainyak.

2 Namu ahiyi nyak aiek an nedo upene unyum um imicaho nyak : atgeig pam intikgam ehelek um imiatamaig nyak.

3 Namu hehteuc emda unyak aiek, ekpu apan o un ainyak ira iji adiat : as asaig aiek mika uhpu imiatamaig nyak ; na hehteuc unyak aiek im neom ipjin unyak.

4 Ak Atua unyak, imicaho nyak va nikmai natimi auatatimi, nikmai natimi ineig et impalea aien um edemda.

5 Ak Ihova Atua unyak, ek asgeig iram ainyak ; kis asgeig iram ainyak an takuras unyak um imi hum pam an naopan ineig.

6 As aminjinaig nyak aiek an naopan yehki eris apos nyak um imihum pam an naopan ineig : as atipagki nyak aiek an nipjinetgai risik : ekpu imiahpas euc ainyak ira iji mesese.

7 Era imiali nyak natimi et ahinag ; ja na uarin atpuh iran emda unyak aiek.

8 Ekmu imiahpas alupas euc an nipjineucsek ainyak an nadiat asega.

9 Namu jim aticijaig nyak aiek an nafatimi unyak ; jim ude nyak an nauatialidi unyak.

10 Era tas vai nyak a ilpu atimi edemda vai nyak : era lep tastas jipe ara sji eigki era atpoijinai nyak ara par atgei nyak,

11 Um ika, Is ude yin a Atua : ahau yin um arop iran ; et idim eti eteuc tah par imiatamaig yin.

12 Ak Atua, jim amen itac acen vai nyak : Ak Atua unyak, namu auroauro aiek um atau imi nyak.

13 Erumu ehcamai um ememas ara sji eigki era edemda vai nyak

ara ; erumu lep ehcamai alupas um akli atmas ara sji eigki era merit ara nauahas nyak vaig.

14 Ja ekpu asgeig iram ainyak ira iji adiat, um lep imiahpas alupas euc:

15 Ekpu asuptecnaig nedo upene unyum ainyak im nitai imiatamaig atimi unyum ; ja et ehka nesvi vaig.

16 Ekpu ham ainyak an nemda o Ihova Atua unyak : ekpu asuptecnaig nedo upene unyum ainyak, unyum ache.

17 Ak Atua, as esege imtak aiek an halav unyak um imihum pam an naopan inieg : kis idim asuptecnaig niji auritai imiali unyum ainyak.

18 Ak Atua, ek afatimi ainyak um uhluco an naopan ineig jam jim ude nyak ; ekpu lep ehvaig nemda unyum ainyak ehele atimi an naopan inieg, im nemda unyum ehele atimi an tak aopan.

19 Ak Atua, as ago niji itai ehka aiek, et lep esjilid nedo atoh unyum : ak Atua, et idivai euc a di !

20 As atijai irak nohacred et ahinag um esjilid, ja napu lep imiatamumoh nyak aiek, um imiatidai nyak va niji uarin ubo an nobohtan.

21 Etpu lep esjilid natimi alupas unyak vai euc, napu lep asan tas upene vai nyak aiek ira iji itai asega.

22 Ak Atua unyak, ekpu imiahpas nedo inivaijec unyum ainyak irai saltari ; ak Atua upene ache o nupu Isreel, ekpu acesaces nohran-itai vai euc ainyak irai harp.

23 Etpu imiacitak alupas nipjin-eucsek ainyak ekuit acesaces nohran-itai vai euc ainyak ; im lep inliinmopok as imiatamaig aiek.

24 Ekpu tas ainyak va nedo upene unyum an nadiat asega : era imtitaig um ehcamai ara sji eigki ero merit ara nauahas nyak vaig.

SALM 72.

1 Ak Atua, namu ati intas alep unyum aiek ehele natimarid, im nedo upene unyum ehele inhal o natimarid.

2 Etpu tas alep aien vai ilpu atimi unyum an nedo upene o un, im lep vai ilpu atimi ohacred unyum an nedo atoh o un.

3 Erupu amen eigpa natimi ira iji au, im lep ira iji edoon tintin, va nedo atoh o un.

4 Etpu aktaktai ilpu atimi ohacred aien ira atimi, etpu imiicaho ilpu ihki atimi aien, etpu lep ahtagrei ilpu atimi aga has ira ra aien.

5 Erupu imtitai euc ara an namen asega o nagesega im inmohoc, im lep ilpu mapora asega.

6 Etpu asuol sepam aien et idivaig incopda irai efelelicai er eucse : um lep idivaig nisjisji et mulmul nobohtan vaig.

7 Erupu esjilid a ilpu atimi upene an naopan umoh o un, etpu lep eteuc neigpa esjilid um yet pan an naopan yehki etpu ti inmohoc.

8 Etpu ahes nelcau o un an jop um yet pan an jop, etpu lep ahes an nofowai um yet pan an tid an nobohtan.

9 Erupu atpuse an nuhup o un ara sji ehki era amen an namas acen ara ; erupu lep eluun nobohtan a ilpu atimi tak atimi iran.

10 Erupu imiapan ehelen niji itai tup ahtai a ilpu atimarid Tarsis, im lep niji pece an jop : erupu lep ikni niji itai tup ahtai imi yin a ilpu atimarid Seba im Siba.

11 Erupu idim atpuse a nuhup o un a ilpu atimarid asega ; erupu lep aheca o un a nupu ira iji pece asega.

12 Etpu imiatamaig ilpu ihki atimi aien eruit ahlaig vai yin ara :

SALM, 73.

im lep ilpu atimi ohacred etuit eti
atau imi ra tah.

13 Etpu aiheuc vai ilpu atimi
ohacred aien im ilpu ihki atimi,
etpu lep imiatamaig ilpu ihki atimi
aien.

14 Etpu imiatamaig ra aien va
nafaifa im nedo has; et itai esjilid
inja ira ra an nuhnp o un.

15 Etpu umoh aien, uhpu lep
alupai yin colt an pece Siba: uhpu
lep ago nalaigaheni vai yin um eti
atumop; uhpu imiahpas yin ira iji
adiat.

16 Inyi eteuc sito an nahaijen
nikma atimi et ethi an nobohtan
ijinies irai lolo edoon; inyi ama-
amai nohoan et idivaig Lebanon;
erupu lep umumoh upene a nup an
nuarin pece, et idivaig nefelelicai an
nobohtan.

17 Etpu amen nidan ira iji mes-
ese: etpu amen nidan et idivaig
namen o nagesega: erupu imiacitak
natimi vai yin; erupu ika a nupu
ira iji pece asega, et mun ahes moij
aien.

18 Naaurineig vai Ihova Atua,
Atua o nupu Isreel, et ago niji itai
imiali aien ache.

19 Uhmu imiahpas nidan esjilid
ira iji mesese; uhmu imiahpas alupas
nidan an nobohtan asega; Amen,
im Amen.

20 Et mun ti intas alaigaheni o
Tevit inhal o Jesse.

SALM 73.

1 Et idim upene nedo o Atua
vai nupu Isreel asega, va ra sji
eigki marom et upene inliinmopura
ara.

2 Ja kis ubutpotet u nebehtau
vaig ainyak; kis ubutpotet u nata-
lahas unyak ainyak.

3 Kis auatitai ainyak vai ilpu
atimi ahnag, kis wat ecetai namen
upene o ilpu atimi auatatimi ainyak

4 Era eti ato nohacred ara an
mas ura: ja et amen aktit nemda
ura.

5 Era eti ato nohacred ara et
idivaig tak atimi; era eti erekinman
ira ra ara et idivaig tak atimi.

6 Etahnai ra inliinmopura ijinies
et idivaig nitahnaig: er aso ra an
nauatatimi ura et idivaig napelumai.

7 Et asjeuc asega nesganimtara:
era esjilid ara irai itai merit u inliin-
mopura.

8 Era has ara um tas has va nedo
auatatimi: et ijinies intas ura.

9 Era tas vai nohatag ara, et lep
atga intas ura an nobohtan asega.

10 Va nitai ineigki era adumoij
pam igcaki a ilpu atimi o un: et
lep alupas inwai lumara.

11 Era ika ara, Et ato a Atua um
auauo? et ato itai a Atua esjilid
acen, ka o'o?

12 Era atimi auatatimi ara sji eigki
era amen upene ara an nobohtan;
era lep ikni itai alupas ara.

13 Kis ago adicinadicin inliinmo-
pok ainyak vai intakitai, um yiri
nikmak va nedo upene unyak.

14 Kis ohacred ainyak an nadiat
asega, er;s lep ated nyak ira iji
uhialeg.

15 El ek ika ainyak, inyi ucce
intas unyak: ekpu idim auahas
inliinmopoi ilpu hal unyum ainyak.

16 Kis wat ika ainyak, ki ato
nitai ineigki ainyak, is idim ehka
vai nyak:

17 Ja kis wat apan ainyak an
nuarin itaup o Atua, kis ato nadiat
apitac ura ainyak.

18 As idim ikni ra aiek irai iji
uarin umlas; as imiasuol ra aiek
um auahas ra.

19 Et auroauro nerekinman ira ra
et idivaig nasvopni nesganimta ati-
mi: era emesmas ehni ara va nim-
titaig nra.

20 Et idivaig numjeg ahnag o un
tah et wat aiji aien, et um ucco, ak

SALM, 74.

Ihova, nait aiji aiek napu amcel vai nalmura aiek.

21 Is ijinies inliinmopok ainyak um has naktaktai unyak.

22 Kis ahnag ainyak um eti ato itai : kis idivaig nitai eclim edo irai pece ainyak an nuhup unyum.

23 Ja ek amen ehelum ainyak ira iji adiat : as asjiraig nyak aiek an matam.

24 Napu atau irak aiek an tas unyum, ja par apitac um imiapan nyak an nuarin esjilid unyum.

25 Et amen an nohatag a di vai nyak, aiek ache? ek lep eti merit vaig tah an nobohtan ainyak, vai euc ache.

26 Et auatialidi nohuk ainyak im lep inliinmopok : et hehteuc va inliinmopok a Atua, im nuarin unyak ira iji mesese.

27 Erupu ememas a ilpu atimi amen itac acen vai euc : as auahas ra sji eigki asega aiek era ude euc ara.

28 Ja et upene vai nyak par apan ubutpotet ehele Atua : kis asgeig irai Ihova Atua unyak ainyak, va ekpu asuptecnaig niji auritai asega unyum ainyak.

SALM 74.

1 Ak Atua, na auri aiek par ude cama ira iji adiat? et ere intavaitaup unyum vai siip anli nirahed unyum.

2 Aktaktai ilpu atimi unyum, as aua nimtara aiek itu acen; natimi iji eigki as ikni aiek vai euc, um imiatamaig ra; nedoon Saion ineigki as amen iran aiek.

3 Namu apam aiek an nuarin ineig et amas acen; eris idim auahas niji itai asega an nuarin itaup unyum a ilpu atimi tak atimi iram.

4 Era ehtauo ehele ilpu atimi unyum a ilpu atimi tak atimi iram; era atijai niji itai asjaaicnaig ura mika yi itai asjaaicnaig.

5 Er ato ra et idivaig tah et alcacse inbas aien par acaldei nauicai an nese.

6 Era idim auahas niji itai eris aged iran irai bas im hammer.

7 Eris ahli nauarin itaup unyum ara, eris auhas nuarin is amen nidam iran ara um alacopdicraig ehni.

8 Eris ika inliinmopura ara, intumu auahas ehni akaija: eris ahli niji eom alaigaheni asega o Atua ara an pece.

9 Inta eti ecetai niji itai asjaaicnaig uja akaija: et eti lep eteuc tah naprofeta: et lep eti ato tah ehelaija mika etpu ti an nahopan.

10 Ak Atua, etpu asan tas has a natimi edemda vai caija um yet pan an nahopan? etpu amcel vai nidam a natimi edemda vai caija ira iji mesese, ka o'o?

11 Na auri aiek par imiaij nikmam, inmatam marom? namu atipagki aiek an ritum.

12 Is Atimarid unyak a Atua itu acen um imibum pam an naopan ineig, um auritai an nobohtan par imiatamaig atimi.

13 As atiakoai injop aiek an nesda unyum: as ahtagre nijini numu alupas aiek an jop.

14 As ahtagre ehni nidjini livaiedan aiek, um alupai nup an namas acen incara.

15 As auad nimtana wai aiek im nofowai: asika aiek yi ame nofowai esjilid.

16 Et unyum nadiat, et lep unyum nepeg: as ago inlah aiek im nage-sega.

17 As asjaaicnaig intid an nobohtan asega aiek: as ati inlidija aiek im inmesese.

18 Ak Ihova, namu imiehva aiek mika is asan tas has a natimi edemda vai euc, eris lep asan tas itaup vai nidam a ilpu atimi ahnag.

19 Jim aticijaig nalopa unyum imi ilpu atimi saatatimi, im lep ilpu

SALM, 75, 76.

atimi ohacred unyum ira iji adiat.

20 Aktaktai intas up yi asaig unyum aiek: et idim ohua nihi uarin aupat an nobohtan an nedo auatatimi.

21 Erumu jim adumoij um ehcaimai a ilpu atimi er ago nedo ipjin vai ra: erumu imiahpas nidam a ilpu atimi ohacred im ilpu atimi auatatimi.

22 Ak Atua, atidai aiek, um imiisjis nihi itai unyum: aktaktai nedo o ilpu atimi ahnag nikavaig era asan tas has vai euc ara ira iji adiat.

23 Jim eti imiehva nohrai ilpu atimi tak atimi iram: et esjilid acen nehtauo o ra sji eigki era atidai vai euc ara ira iji adiat.

SALM 75.

1 Ak Atua, egra ago naaurineig vai euc aijama, egra idim ago naaurineig vai euc aijama: et ubutpotet nidam, er asuptecnaig nihi auritai imiali unyum.

2 Uhuit ati nyak ekpu tas alep atoh ainyak.

3 Et idivaig inwai nobohtan im lep natimi asega iran: ek ikni ipjin noboatau iran ainyak. Sela.

4 Kis ika ainyak ehele ilpu atimi ahnag, Jim ago nedo ahnag: im lep ehele ilpu atimi auatatimi, Etmu jim ijinies nedo unyimia aijaua.

5 Etmu jim ijinies nedo unyimia aijaua: um jim tas an nauinwamia ipjin.

6 Et eti ahes nimiaridjai o atimi an ridjai o un, im lep nette o un, im lep namas acen.

7 Ja et tas alep a Atua: et imiasuol natimi et ethi aien, um imiaridjai intak atimi.

8 Et amen nipjinitai an nikmai Ihova, et icop waina iran; er ahpi-laig alupas itai iran; et atladoi aien: ja erupu ahtajiraig nahren iran a

ilpu atimi auatatimi asega an nobohtan um umni.

9 Ja ekpu tas ainyak ira iji adiat; ekpu acesaces nohranitai ainyak vai Atua o Jakob.

10 Ekpu lep acaldei nihi bat asega o ilpu atimi auatatimi ainyak, ja uhpu imiaridjai nihi bat o ilpu atimi upene.

SALM 76.

1 Er ato Atua Jutaa: et esjilid nidam an pece Isreel.

2 Et lep eteuc neom atga o un Salem, im neom amen iran o un Saion.

3 Is auahas nidjan nafana eahki aien, im nitai atapen, im nautoga, im nedoa. Sela.

4 Ak natimi alupas, na esjilid aiek irai iji edoon er ahrincai iran.

5 Era ememas a ilpu atimi emda inliinmopura, era umjeg se ara: era eti lep ecetai nikmara a ilpu atimi esjilid.

6 Ak Atua o Jakob, era idim umjeg se hors im nihi itai atga va nedo ated ra unyum.

7 Et upene mika eri imtitai euc ache: naut edemda aiek et emda a di par atidai an nuhup unyum.

8 Eris atahajeg nedo ated atimi unyum an nohatag; eris imtitaig atimi an nobohtan um tup amen,

9 Is wat atidai a Atua par aru ira atimi, um imiatamaig ilpu atimi upoupo asega an nobohtan. Sela.

10 Uhpu imiahpas euc va intavaitaup ura: napu atapanes nahajen tavaitaup ura.

11 Akumu asan tas up yi asaig unyimia aijaua ehele Ihova Atua unyimia um ehgeijid: erumu imiapau nihi itai tup ahtai imi yin et upene eri imtitai yin ara asega era arahed ehelen ara.

12 Etpu imiasuol inliinmopoi ilpu atimi alupas aien: era imtitai yin a ilpu atimarid an nobohtan.

SALM 77.

1 Kis ahlaig vai Atua ainyak an nohrak, vai Atua marom an nohrak; is atahajjeg intas unyak aien.

2 Kis ahilek Ihova ainyak an naopan ohacred unyak: kis adaig jai nikmak ainyak an nepeg um eti atumop: is ehka par ago eropse inliinmopok.

3 Kis imiehva Atua ainyak um ucjucjucaij: kis aktaktai ainyak ja is auatialidi inliinmopok ainyak. Sela.

4 As atapanes numjeg unyak aiek: et ehka vai nyak intas vaig va nohacred unyak.

5 Kis aktaktai nadiat iji ehki itu acen ainyak, im inmesese iji ehki is ti pan itac.

6 Ek imiehva nohranilai unyak ainyak an nepeg: et aktaktai inliinmopok ainyak; et lep ahilek emda inliinmopok ainyak.

7 Etpu aticijaig nyak a Ihova; um eti lep aiheuc vai nyak ira iji mesese, ka o'o?

8 Et mun ti naiheuc o un ka o'o? inyi auatiatili intas up yi asaig o un ira iji mesese, ka o'o?

9 Et eti imiehva a Atua par aiheuc vai nyak; et lep ti naiheuc o un va intavaitaup o un, ka o'o? Sela.

10 Kis ika ainyak, nohacred unyak ineigki, ira iji mesese an matai Atua esjilid acen.

11 Ekpu imiehva niji auritai o Ihova ainyak; ekpu idim imiehva nedo imiali unyum ainyak itu acen.

12 Ekpu lep aktaktai nauritai asega unyum ainyak, um tas va nedo unyum.

13 Ak Atua, et upene nedo unyum: et Atua esjilid a di et idivaig Atua uja?

14 Na Atua ago nedo imiali aiek:

as ehvaig nemda unyum aiek ehele atimi.

15 As imiatamaig ilpu atimi unyum aiek an nikmam, ilpu mapoi Jakob im Josef marom. Sela.

16 Eris ecet euc inwai, ak Atua, eris ecet euc inwai: eris imtitaig ara: is lep ehioehio intupoahau.

17 Is ahes inwai an naupat: is aticiteuc inmunuka an nohatag: is lep ae nidjan nafana unyum.

18 Is eteuc inmodjan munuka unyum an nohatag: is ucjucjucaij nobohtan um amaamai.

19 Is eteuc nefalaig unyum an jop, im natga unyum irai wai alupas, er lep eti ecetai nugnam.

20 As atau irai ilpu atimi unyum aiek is idivaig siip irai ikmai Moses im Eron.

SALM 78.

1 Ak ilpu atimi unyak, atahajjeg intas alep unyak; atgeig pam intikgamia u intas an nipjineucsek.

2 Ekpu asan tas eucse pece ainyak: ekpu asan tas eti ahajjeg itu acen ainyak:

3 Intis atahajjeg akaija um ato, eris lep asuptecnaig ehelaija a ilpu retpoja.

4 Intupu eti adinaig vai ilpu mapora akaija, jam asuptecnaig ehele atimi an tak aopan, nimiahpas vai Ihova, im nemda o un, im nedo imiali is ago aien.

5 Is alupai ilpu mapoi Jakob intas asuptecnaig o un aien, um ati intas alep o un ehele nupu Isreel, is lep asaig ehele ilpu retpoja aien, mika eri esege imi ilpu hal ura ara:

6 Mika eri ato natimi an tak aopan, ilpu hal ura marom eri apos ra; um atidai um asuptecnaig ehele ilpu hal ura:

7 Va erupu asgeig irai Atua ara, um imiehva niji auritai o Atua, um apos intas alep o un.

SALM, 78.

8 Um eti idivaig ilpu retpora, eris ilpu atimi ipjin um imipalea ara: eris ilpu atimi eti yucre upene inliinmopura ara; is lep eti amen aktit inliinmopura ara ehele Atua.

9 Eris apos nafana a ilpu mapoi Ifreim, jam aha an naopan ago nedoa.

10 Eris eti apos intas asuptecnaig o Atua ara, eris lep esjum ara par imiaiji intas alep o un;

11 Um eti imiehva niji auritai o un, im nedo imiali o un is ehvaig ehele ra aien.

12 Is ago nedo imiali aien an nuhup o ilpu retpora an pece Ijipt an nuarin pece Soan.

13 Is atiakoai injop aien, um imiatga ra an niblan; is ika aien yi aridjai injop et idivaig nedoon.

14 Is lep atau ira ra aien an nauapat an nadiat, im lep an cop alahala an nepeg asega.

15 Is auad inhehteuc aien an namas acen, is lep alumara inwai alupas acen aien.

16 Is ika aien yi ahes inraiwai an hehteuc, um lep ika yi yah inwai et idivaig nofowai.

17 Ja eris lep ago nedo has vai yin ara, um auahas inliinmopoi Atua esjilid acen an namas acen.

18 Eris oop Atua anliinmopura ara, um ugni nitai caig eris ahvig ara.

19 Eris idim tas vai Atua ara: eris ika ara, et emda a Atua par ago nitai caig an namas acen ka o'o?

20 Is idim auad inhehteuc aien, ja is ahlau ohua inwai iran, is lep alupas inraiwai; Et lep emda aien par alupai caija nitai caig, um inki niji itai eclim edo irai pece incai ilpu atimi o un ka o'o?

21 Is atahajeg a Ihova, um edemda alupas, is ere incop vai ilpu mapoi Jakob, is lep yet pam intavaitaup o un irai upu Isreel;

22 Eris eti imiisjis ninivajec Atua

ara, um eti asgeig iran mika yi imiatamaig ra aien.

23 Is tas vai naupat ijinies aien, um asalage intapanes an nohatag,

24 Is imiasuol mana ira ra aien incara, is lep alupai ra sito an nohatag aien.

25 Eris caig nitai caig o ilpu agelo natimi: is alupai ra nitai caig is ahinag aien.

26 Is ika aien yi atoga; is imiapam nuari toga aien an nemda o un.

27 Is lep imiasuol inman ira ra is idivaig inmoh an nobohtan, im inman esjilid is idivaig nauanhavig an nohmun jop.

28 Is ika aien yi erop an nuarin amen ura, ira iji eom ura um arahed mihtag.

29 Eris hag ara, um gaije; is alupai ra nitai merit ura aien.

30 Eris eti ude nitai merit ura ara: Ja is wat amen nitai caig an nipjineucsera,

31 Is yet pam ira ra intavaitaup o Atua, um auahas ilpu atimi emda ira ra, um auad ilpu atimi alupas o nupu Isreel.

32 Ja eris lep imiisjis ara um ago nedo has, um eti imiisjis ninivajec va nedo imiali o un.

33 Va nitai ineigki eris ago takitai ara ira iji adiat, eris lep ohacred ara ira iji mesese.

34 Is wat atgei ra aien eris ahilek yin ara: eris ahidai ra ara um auroauro um ahodai emda Atua.

35 Eris imiehva ara mika is hehteuc ura a Atua, um lep imiatamaig ra a Atua esjilid acen.

36 Eris imiahpas yin ara an nipjineucsera, eris lep asan tas ahcil ehelen ara ira amara.

37 Is eti upene inliinmopura ara vai yin, eris lep eti apol aktit an tas o un ara.

38 Ja is esjilid acen naiheuc o un, is eti imiehva nedo has ura aien, um eti auahas ra: is ecahinag ata-

SALM, 79.

panes intavaitaup o un aien, um eti edemda alupas.

39 Is aktaktai aien mika eris tup atimi ache ara; nimtinjop et yet pan, um lep ti.

40 Eris ecahinag imiipalea yin ara an namas acen, um auahas inliinmopon an tup auun!

41 Eris idim adumoj ara um oop Atua, eris lep auahas inliinmopoi Atua upene o nupu Isreel ara.

42 Eris eti imiehva nikman ara, im lep nadiat yehki is imiatamaig ra aien vai nohacred ura.

43 Is ago niiji itai asjaaicnaig aien an pece Ijpt, im nedo imiali an nuarin pece Soan:

44 Is ika aien yi ja niiji ofowai ura; im inwai ura va eri jim umni ara.

45 Is ikni niiji ubutpot lag ehelera aien eris aces ra; im lep rane eris auahas ra.

46 Is alupai nimyiv nohoaitai ura aien, im lep inheled nauritai ura.

47 Is auahas vaine ura aien irai hion ipjin, im nauciai saikamor ura an nara.

48 Is lep ikni kurimatau ura aien u hion ipjin, im siip ura ui nauainapit.

49 Is abraig pan ehele ra ilpu agelo has aien, um atladoi ira ra intavaitaup, im nedemda, im nehniv, im nohacred alupas o un.

50 Is ago nefalaig va intavaitaup o un; is eti imiatamaig ra aien va inmas, ja is ikni ra aien u inmas.

51 Is auad inmetto asega aien an pece Ijpt; ilpu atimi emda marom irai li eom atga o Ham.

52 Is iknipagki ilpu atimi o un aien is idivaig siip, um atau ira ra an namas acen is idivaig niiji itai eclim edo irai pece auata upene.

53 Is atau ira ra upene aien, eris eti imtitaig ara: ja is taluopni ilpu atimi tak atimi ira ra injop.

54 Is imiapan ra aien an nuarin

itaup o un, is atorialiak aien an matan.

55 Is ahlo ilpu atimi aupat aien an nuhup ura, um ahaig sjipe inpece ira ra, um ika eri amen a ilpu mapoi Isreel irai li eom atga ura.

56 Ja eris oop Atua esjilid acen ara um auahas inliinmopon, um eti apos intas asuptecnaig o un:

57 Jam adumoj, um ago nedo efaifa et idivaig ilpu retpora: eris ahidai ra ara et idivaig inceen nafana ahcil.

58 Eris imiapam intavaitaup o un ira ra ara va niiji uarin ijinies ura, im nedemda o un va natamasimai ura.

59 Is wat atahajeg a Atua, is eh-niv aien um amcel vai nupu Isreel.

60 Is lep ude natabernakel Sailo aien, neom atga yehki is ati ehele atimi aien.

61 Is aticijaig nemda o un aien mika eri leucse pan ra, im natimi alupas o un an nikmai ilpu atimi tak atimi ira ra.

62 Is aticijaig ilpu atimi o un aien an nedoa, is lep edemda aien vai ilpu atimi is ehtai ra imi yin aien.

63 Is auahas ilpu takuras ura incop: eris lep eti asa natmehgan ura a ilpu atahaig.

64 Eris ememas a ilpu atimi ahlap ura va nautoga; eris lep eti imitaig ra a ilpu ehgara.

65 Is aiji lahlah a Ihova et idivaig tah an numjeg o un, um lep idivaig tah natimi emda et ahlaig ijinies aien va waina.

66 Um auad ilpu atimi tak atimi iran an cehera: is alupai ra nitai ehcamai vaig aien ira iji adiat.

67 Is esjum aien vai natabernekel o Josef, um eti merit vai ilpu mapoi Ifreim:

68 Ja is ehtai ilpu mapoi Juta aien, nedoon Saion yehki is aiyu inliinmopon aien vaig.

SALM, 79, 80.

69 Is ago nuarin itaup o un aien is idivaig neom esjilid, um lep idivaig, nobohtan is ati aktit aien ira iji mesese.

70 Is lep ehtai Tevit naheca o un aien, um atipagki yin an nuarin amen o siip:

71 Is aminjinaig siip aien eris opouc ara, ja is atipagki yin aien par alaai ilpu mapoi Jakob, im lep nupu Isreel o un.

72 Is idim alaa ra aien anliinmopon inivaijec: um atau ira ra an nikman arapakau.

SALM 79.

1 Ak Atua eris ham a ilpu atimi aupat an nuarin unyum; eris auahas neom ahlap itaup unyum ara; eris uhpoditai Jerusalem ara.

2 Eris ikni nohui ilpu aheca unyum ara eris emesmas ara incai inman an nohatag, im nohui ilpu atimi upene unyum incai niji itai eclim edo irai pece.

3 Eris atgei ra ara is idivaig inwai inja ira ra Jerusalem um arahed mihtag; is eti etcuc tah par atelmoi ra.

4 Era asan tas auyat vai cama a ilpu atimi eblaam nem unyima, era lep amcel um imiafak ahcil cama a ilpu atimi arahed irama.

5 Ak Ihova, napu edemda vai cama aiek um yet pan an nahopan? inyi ira iji mesese, ka o'o? etpu ere intavaitaup unyum et idivaig incop, ka o'o?

6 Namu atladoi intavaitaup unyum aiek irai ilpu atimi aupat era eti ato euc ara, im lep irai nup irai elcau iji eigki eris eti ahlaig vai euc ara.

7 Eris caig ilpu mapoi Jakob ara, um auahas nuarin amen o un.

8 Namu jim imiehva nedo has unyima itu acen aiek: etmu ehtet

ira ma naiheuc esjilid unyum; eca idim auatialidi aijama.

9 Ak Atua, imiatamaig cama, namu atau imi cama aiek va nidam esjilid: um imiatamumoh cama, um adahpoi nedo has unyima va nidam.

10 Era auri ilpu atimi aupat par ika, Atua ura yuc eda? erumu ato yin a ilpu atimi aupat an nuhup unyima an neruvaig inja irai ilpu aheca unyum eris atgei ra.

11 Etmu aridjai an nuhup unyum intaig o ilpu atimi eris arora ra; aminjinaig ra sji eigki aiek eris asaig inmas ura an nemda esjilid unyum;

12 Namu eceseven aru aiek irai ilpu atimi eblaam nem unyima va intas has ura eris asaig vai euc ara, ak Ihova.

13 Ecrupu lep ago naaurineig vai euc aijama ilpu atimi unyum, im siip unyum na alaama aiek ira iji mesese: ecrupu asan tas imiahpas euc aijama ira iji mesese.

SALM 80.

1 Namu atahajjeg aiek, ak Atua aminjinaig nupu Isreel, um atau irai ilpu mapoi Josef et idivaig siip; namu emehmina aiek, na amen aiek juju an niblai jerubim.

2 Namu ahugni nemda unyum aiek an nuhup o Ifreim im Benjamin im Manasi, um apam um imiatamaig cama.

3 Ak Atua, namu imiadumojj cama aiek, etmu lep emehmina nesganimtam aiek: va uhpu imiatamaig cama.

4 Ak Ihova Atua o ilpu agelo, napu edemda aiek va nalaigaheni o ilpu atimi unyum um yet pan an nahopan.

5 Na alaara nitai caig aiek an nidi imtara incara; na lep alumara alupas aiek nidi imtara.

6 Na ikni cama aiek mika eri ehtauo vai cama a ilpu atimi eblaam nem unyima : era lep imiafak ahcil a ilpu atimi edemda vai cama.

7 Ak Atua o ilpu agelo, namu imiadumojj cama aiek, etmu lep emehmina nesganimtam aiek ; va uhpu imiatamaig cama.

8 As atipagki vaine an pece Ijijt aiek : as ahlo ilpu atimi aupat aiek, um ahoaig.

9 As auorohos o un aiek, is eteuc nicvan upene, is lep ohua inpece vaig.

10 Is taluopni niji edoon naiyu iran, is lep idivaig nauincai sitar o Atua inran.

11 Is atgeig sjipe inran um yet pan an jop, im lep an nofowai.

12 As auri aiek par auahas nirahed o un, mika eri aldei nohoan ara asega era ahtaregde ara.

13 Et atga iran picad aleg an nese et lep caig niji itai eclim edo irai pece aleg.

14 Ak Atua o ilpu agelo, ecrupni euc aijama mika an adumojj aiek ; namu ias se pam an nohatag aiek, um almoi, um ateghe vaine ineigki ;

15 Im nikaro vaine as ahoaig aiek an matam, im inran as ago ipjin aiek.

16 Eris acalde um atnamud an cop, era ememas ara va nedo ated ra unyum an nuhup unyum.

17 Etmu amen inmatam ijinies an natimi an matam, inhal o natimi as ago emda yin aiek imi euc.

18 Ecrupu eti ude euc aijama : namu imiatamumoh cama aiek, ecrupu lep ahlaig vai nidam aijama.

19 Ak Atua o ilpu agelo, namu imiadumojj cama aiek, etmu upene nesganimtam aiek va cama ; va uhpu imiatamaig cama.

SALM 81.

1 Akumu acesaces nohranitai ijinies vai Atua nemda uja aijaua : etmu lep cediag nohramia vai Atua o Jekob.

2 Leh nohranitai, um aticei timbrel, harp upene, im lep salteri.

3 Ahlai intaho an nup yi ehet, an naopan yehki eris aniv, an nadiat asjapicnaig uja.

4 Nedo o nupu Isreel ineigki, im intas alep o Atua o ilpu mapoi Jekob.

5 Is ati nedo ineigki aien ehele ilpu mapoi Josef is wat atga aien an pece Ijijt : kis atahajjeg intas eahki ainyak kis eti ato ainyak.

6 Kis atipagki nitai ahelwei ainyak an nuhlira ; is lep aticijaig naburabura nikmara.

7 As ahlaig aiek an nohacred unyum kis lep imiatamaig euc ainyak ; kis adai intas unyum ainyak irai uarin adinaig is munuka iran : kis ahilek inliinmopomia ainyak ui wai Meriba. Sela.

8 Akumu atahajjeg aijaua, ak ilpu atimi unyak, ekpu lep tas ehele-mia ainyak ; ak nupu Isreel, akumu atahajjeg intas unyak aijaua ;

9 Etmu jim amen ehele-mia tah atua et eche ; um jim ago nalaig-aheni vaig tah atua et eche.

10 Ek Ihova ainyak Atua unyum, kis iknipagki caua ainyak an pece Ijijt : asalege alupas nipjineucsem, ekpu alaam alupas ainyak.

11 Ja eris eti atahajjeg nohrak a ilpu atimi unyak ; eris lep esjum vai nyak a nupu Isreel.

12 Va nitai ineigki kis aticijai ra ainyak mika eri ago nitai merit o inliinmopura ara : eris lep ago nedo ineig ara eris ispara aktaktai ara.

13 El eris atahajjeg intas unyak a ilpu atimi unyak, el eris lep ahced nefalaig unyak a nupu Isreel !

SALM, 82, 83.

14 El kis auroauro ainyak um imiasuol ilpu atimi tak atimi ira ra, um arahpan va nikmak ira ilpu atimi edemda vsi ra :

15 El eris upoupo ira ra a ilpu atimi amcel vai Ihova ; el era lep amen upene ara ira iji mesese.

16 El is alaa ra sito esjilid acen aien : el ek lep alupai euc hune an hehteuc ainyak.

SALM 82.

1 Et amen a Atua an nasjapic-naig o ilpu atimi o Atua, et tas alep aien ehele ilpu atua.

2 Akupu tas alep has aijaua um yet pan an nahopan, um aiheuc vai ilpu atimi auatatimi? Sela.

3 Ago nedo upene vai ilpu atimi auatialiidi im ilpu umnij : um ago nedo atoh vai ilpu atimi ohacred im ilpu ihki atimi.

4 Imiatamaig ilpu atimi auatialiidi im ilpu ihki atimi : um iknipagki ra an nikmai ilpu atimi auatatimi.

5 Era eti ato itai ara, um eti aktaktai ; era atga an naupat ara : et amaamai intinai nobohtan asega.

6 Kis ika ainyak, Eka ilpu atua aijaua ; eka lep ilpu hal o Atua esjilid acen aijaua asega.

7 Ja akupu emesmas aijaua et idivaig natimi, um asuol et idivaig tah irai ilpu atimarid.

8 Ak Atua, namu atidai aiek, um tas alep vai atimi an nobohtan : napu idim ohuun nisi pece asega aiek.

SALM 83.

1 Ak Atua, namu jim ucsup aiek : um jim ucsumrig, um jim tup amen, ak Atua.

2 Era idim ehtauo a ilpu atimi tak atimi iram : et lep ijinies nidjini natimi iji eigki era amcel vai euc ara.

3 Eris aktaktai nedo efaifa ara vai ilpu atimi unyum, um tastas jipe vai ilpu atimi adinaig unyum.

4 Eris ika ara, Apam, um auahas ra, va eri jim amen an pece ara ; va uhpu eti lep imiehva nidai nupu Isreel.

5 Eris ehra tastas jipe ara ; et tup ethi ache iniinmopura ara vai euc :

6 Natimi amen irai li eom atga Itom, im ilpu mapoi Ismael ; nupu Moab, im ilpu mapoi Hecar ;

7 Nupu Cebal, im nupu Ammon, im nupu Amalek ; nupu Filistia im lep nupu Tairus ;

8 Eris lep apol ira ra a nupu Assur : eris atau imi ilpu mapoi Lot ara. Sela.

9 Namu ago ira ra aiek et idivaig ira upu Mitian ; im lep irai Sisera, im lep irai Jebin an ran wai Kison :

10 Eris auahas ra Entor : eris idivaig nohok ara an nobohtan.

11 Erumu lep idivaig Oreb im lep Siib a ilpu atimi alupas ura : um lep idivaig Siba im Salmuna ilpu atimarid ura :

12 Eris ika ara, Intumu atoraliak nisi eom o Atua akaija um ohuun.

13 Ak Atua, erumu idivaig nitai arahed ara ; um lep idivaig narasi itai an nuhup o nimitinjop.

14 Et idivaig et atnamud incai incop, um lep cas nisi edoon nala-ume u incop ;

15 Et um ucco, namu ahau ra aiek an nehio unyum, erumu lep imtitaig ara va naup yi atmas unyum.

16 Erumu ehcamai alupas ara ; va erupu ahilek nidam ara, ak Ihova.

17 Erumu ehcamai ara um ohacred ira iji mesese ; erumu idim ehcamai ara um emesmas :

18 Va uhpu ato, mika an esjilid acen aiek va nidam Ihova an nobohtan asega.

SALM 84.

1 Ak Ihova o ilpu agelo, et upene acen nuarin amen unyum !

2 Et merit vai nikaro o Ihova inliinmopok ainyak, et idim mas vaig : et ahlaig vai Atua umoh inliinmopok ainyak im lep nohuk.

3 Is ecetai neom imi yin nalopa, is lep ago nasieom imi yin nahoop-cop mika yi ahad iran, natau unyum marom, ak Ihova o ilpu agelo, Natimarid unyak, im Atua unyak.

4 Era mun ahes moij ara sji eigki era amen anli neom unyum ara : erupu imiahpas euc ara. Sela.

5 Era mun ahes moij ara et amen ehelera nemda unyum : era lep merit vai nefalaig unyum ara.

6 Era atga ara an nihkanse Beka, um ago nehpanwai iran : et lep ahga netpen va incopda.

7 Era atga ara et lep esjilid nemda ura, era ehcohos Saion ara an nuhup o Atua.

8 Ak Atua o ilpu agelo, namu atahaijeg intas alaigaheni unyak aiek ; ak Atua o Jakob, namu aktaktai nyak aiek. Sela.

9 Ak Atua imiatamaig cama, namu almoi aiek um aktaktai yin as ati yin aiek.

10 Et esjilid nadiat et ethi anli nikaro unyum ira adiat et ahinag. Ek merit alupas ainyak naiji vaig an neucse neom o Atua unyak, jam eti merit namen vaig anli neom o ilpu atimi auatatimi.

11 Et agesega a Ihova Atua uja im nitai aibuthan ; et ahes ehele Ihova naiheuc vai atimi im natimi alupas ura : inyi ti imiaij tah nitai upene vai ra sji eigki aien era ago nedo atoh ara.

12 Ak Ihova o ilpu agelo, et mun ahes moij a natimi ineig et asgeig iram aien.

SALM 85.

1 Ak Ihova, is upene inliinmopom aiek vai nup iran pece unyum : as lep imiadumoij pam ilpu mapoi Jakob aiek eris leucse pan ra.

2 As iknipagki nedo has o ilpu atimi unyum aiek, as adohpoi nedo has ura aiek. Sela.

3 As iknipagki nedemda asega unyum aiek : et lep ti intavaitaup esjilid unyum.

4 Ak Atua imiatamaig cama, namu imiadumoij cama aiek, etmu lep ti nedemda unyum vai cama.

5 Napu edemda vai cama aiek ira iji mesese ka o'o ? etpu lep yet pan nedemda unyum ira atimi ira iji mesese ka o'o ?

6 Namu lep imiatamumoh cama aiek, va erupu imiacitak euc a ilpu atimi unyum.

7 Ak Ihova, ehvaig ehelema naiheuc unyum, um imiatamaig cama.

8 Ekpu atahaijeg ainyak intas ineig etpu asaig a Ihova Atua unyima : etpu asan tas eigpa aien ehele ilpu atimi o un aien, im lep ehele ilpu atimi upene o un : ja erumu jim adumoij pan u nedo ahnag ara.

9 Et idim ubutpotet nitai imiatamaig o un ehele ra sji eigki era imtitai yin ara ; va etpu amen inlah o un an pece.

10 Eh mun ehtet sjipe naiheuc im intas inivaijec o un, ehmun aijumni sjipe nedo atoh im neigpa o un.

11 Etpu ahes nedo inivaijec an nobohtan : etpu lep amen nedo atoh an nohatag um ias sepam.

12 Etpu alupai caija niji itai upene a Ihova, etpu lep ededel upene itai an nobohtan.

13 Etpu atga um uhup iran nedo atoh ; um asjaaicnaig an nefalaig o un imi caija.

SALM 86.

1 Ak Ihova, namu atgeig pam intikgam aiek um atahaijeig intas unyak; ek auatialidi ainyak um ihkin natimi.

2 Namu aminjinaig nyak aiek, ek upene ainyak: Ak Atua unyak namu imiatamaig naheca unyum aiek, et asgeig iram aien.

3 Ak Ihova, namu aiheuc vai nyak aiek; ek ahlaig vai euc ainyak ira iji adiat.

4 Namu ati nimiacitak anliinmopoi naheca unyum aiek: et aktaktai euc inliinmopok ainyak, ak Ihova.

5 Ak Ihova, na upene aiek, um eti fi aru nedo has; et lep esjilid naiheuc unyum vai ra asega era ahlaig vai euc ara.

6 Ak Ihova, namu atahaijeg intas alaigaheni unyak aiek; im intas ugni unyak.

7 Ekpu ahlaig vai euc ainyak an naopan ohacred unyak; napu lep adai intas unyak aiek.

8 Ak Ihova, et eti eteuc tah et idivai euc irai ilpu atua; et lep eti idivaig nisi auritai unyum tah nauritai.

9 Ak Ihova, erupu ahtag pam a nupu irai iji pece as ago ra aiek um atpuse an nuhup unyum; um imiahpas nidam.

10 Na esjilid aiek, um ago nisi auritai imiali: na Atua aiek ache.

11 Ak Ihova, namu esege imtak nedo unyum aiek; ekpu atga an tas inivaijec unyum ainyak: ekmu imtitaig nidam ainyak anliinmopok ethi ache.

12 Ekpu ago naaurineig vai euc ainyak, ak Ihova Atua unyak anliinmopok asega; ekpu lep imiahpas nidam ainyak ira iji mesese.

13 Et esjilid naiheuc unyum vai

nyak: as imiatamaig nyak aiek va nuarin has ubou acen.

14 Ak Atua, eris atidai vai nyak a ilpu atimi ijinies, eris lep ehra ahilek nyak a ilpu atimi auatatimi mika eri atgei nyak; era eti aktaktai euc ara.

15 Ak Ihova, na Atua aiheuc vai atimi aiek um tak eris ira ra: um eti auatiemda nedo unyum: et esjilid naiheuc unyum im nedo ini-vaijec unyum.

16 Namu ahidaig pam euc ehelek aiek, um aiheuc vai nyak; namu alupai naheca unyum nemda unyum aiek, um imiatamaig inhal o naheca atahaig unyum.

17 Namu ehvaig ehelek aiek, tah nitai asjaaicnaig upene mika eri almoi a ilpu atimi amcel vai nyak um ehcamai: ak Ihova, as atau imi nyak aiek, um ago emda nyak.

SALM 87.

1 Et eteuc intinai Saion irai lola edoon itaup.

2 Et esjilid naiyu o inliinmopoi Ihova vai neucse nathatahau Saion irai naiyu u inliinmopon vai iji eom asega o ilpu mapoi Jekob.

3 Er asan tas upene vai euc, ak nuarin pece o Atua. Sela.

4 Ekpu aniv Rehab ainyak in Babulon ehele ra era ato nyak ara: almoi Filistia, im Tairus, im lep Idiopia; eris apos natimi ineigki eahki.

5 Uhpui tas vai Saion um ika, eris apos nisi atimi iran: etpu lep ati aktit Saion a Atua esjilid acen.

6 Etpu esvi a Ihova etuit aged atimi aien mika eris apos natimi ineigki eahki. Sela.

7 Erupu lep amen eahki a ilpu atimi acesaces nohrai itai im ilpu atimi imiacitak; et amen iran in-wai ahlau ohua jai asega unyak.

SALM 88.

1 Ak Ihova Atua imiatamaig nyak, kis ahlaig ainyak an nuhup unyum ira adiat im nepeg.

2 Etmu yet pan ehelum nalaig-aheni unyak : atgeig pam intikgam u nahlaig unyak.

3 Et ohacred alupas inliinmopok ainyak : ek ubutpotet u inmas unyak ainyak.

4 Er esvi nyak et tup ethi pan ehele ra era asuol anli nehpanitai ara : ek idivaig tah natimi ainyak et ti nemda o un :

5 Um tup amen ehele ilpu atimi ememas, um idivaig ilpu atimi asjeuc irai li ehpai itai, an eti lep imiehva ra aiek : as lep auahas ra aiek an nikmam.

6 As ati nyak aiek anli nehpanitai ubo acen, an naupat, an namilivai ubo.

7 Et amen alupas intavaitaup unyum irak, ek lep ohacred ainyak va nepeau asega unyum. Sela.

8 As ikni ilpu etoak itac acen vai nyak aiek : as ati nyak aiek mika eri amcel vai nyak ara : er idim atapanes nyak, et lep ehka vai nyak par alau ijo.

9 Et aupat neganimtak ainyak va nohacred unyak : ak Ihova kis ahlaig vai euc ainyak ira iji adiat, kis adaig jai pan nikmak ainyak ehelum.

10 Napu ago nedo imiali aiek vai ilpu atimi ememas ka o'o? erupu nusjai a ilpu atimi ememas um imiahpas euc, ka o'o?

11 Uhpu asuptecnaig nedo aiheuc unyum an nehpan itai, ka o'o? im nedo aiheuc unyum an pece er eti imiehva itai iran.

12 Uhpu ecetai nedo imiali unyum an naupat, ka o'o? im nedo aiheuc unyum an pece er eti imiehva itai iran.

13 Ak Ihova, kis ahlaig vai euc ainyak ; etpu leparidjai nalaigaheni unyak an nuhup unyum an nuhialeg.

14 Ak Ihova, na auri aiek par amcel vai nyak? na auri aiek par adinaig nesganimtam vai nyak?

15 Ek ohacred ainyak, kis lep ubutpotet u inmas unyak ainyak an takuras unyak um imihum pam an naopan ineig : ek leucose nohacred esjilid ainyak um erek inman irak vaig.

16 Et mun yet pam irak intavaitaup esjilid unyum ; et mun lep auahas nyak nedo imiali unyum.

17 Is arahed nyak is idivaig inwai an nadiat asega ; is lep taluopni pam nyak.

18 As ikni ilpu atimi aiheuc vai nyak im ilpu etoak itac acen vai nyak, im ilpu atimi imjijeuc vai nyak an naupat.

SALM 89.

1 Ekpu acesaces nohranitai ainyak va naiheuc o Ihova ira iji mesese ekpu lep asuptecnaig nedo inivaijec unyum ainyak an nipjineucsek ehele atimi an tak aopan.

2 Kis ika ainyak, Etpu amen naiheuc unyum ira iji mesese : napu ati aktit nedo inivaijec unyum an nohatag.

3 Kis asan tas up yi asaig unyak ainyak ehelen kis ehtai yin ainyak, kis lep asan tas aktit unyak ainyak ehele Tevit naheca unyak.

4 Ekpu ikni aktit ilpu mapom ainyak ira iji mesese, um uctai dorona unyum ira iji mesese. Sela.

5 Ak Ihova, uhpu imiahpas nedo imiali unyum an nohatag ; im nedo inivaijec unyum an nasjapicnaig o ilpu atimi upene.

6 Et eti idivaig Ihova tah an nohatag ; et lep eti idivaig Ihova tah ira ilpu atimi emda.

7 Et upene mika eri imtitaig

alupas Atua an nasjapicnaig o ilpu atimi upene; et lep upene mika eri ago nedo ecen vai yin ara asega ehelen.

8 Ak Ihova Atua o ilpu agelo, et idivaig euc a di? na emda aiek, ak Ihova, et arahed iram nedo inivaijec unyum.

9 Na tas alep aiek va nijinies u injop; etuit elege nepeau iran, na ika aiek yi esjaigse.

10 As ahtagre Rehab aiek is idivaig tah eris atgei yin: as imiterim-terim ilpu atimi tak atimi iram aiek an nikman emda.

11 Et unyum nohatag, et lep unyum nohohtan: as lep ati aktit nobohtan aiek im niji itai asega iran.

12 As ago nord im saud aiek: uhpu imiacitak nidam Tebor im Herman.

13 Et emda nikmam: et idim emda nikmam, et lep esjilid inmatam.

14 Et eteuc dorona unyum an nedo atoh im nedo upene: etpu lep amen nedo aiheuc in nedo inivaijec an nuhup unyum.

15 Era mun ahes moij natimi iji eigki era ato intas upene ara: ak Ihova, erupu atga ara an lah an nesganimtam.

16 Erupu imiacitak ara va nidam an nadiat asega: erupu lep aridjai ara va nedo atoh unyum.

17 Uhpu imiahpas euc va nemda asega ura: uhpu lep imiaridjai nemda unyima va naiheuc unyum.

18 Et itai atapanes cama a Ihova; et lep atimarid unyima a Atua upene o nupu Isreel.

19 As tas aiek ehele natimi upene unyum an numjeg ahnag o un, um ika, kis ati tah ainyak et emda aien par atau imi atimi; kis ehtai tah et ethi ehele atimi ainyak um imiaridjai yin.

20 Kis ecet Tevit ainyak naheca unyak; kis aspi yin ainyak an naraki itaup unyak:

21 Etpu amen aktit ehelen nikmak ainyak: etpu lep emda aien va nikmak.

22 Inyi ti imiedohalav yin a natimi tak atimi iran; inyi ti lep auahas yin a natimi auatatimi.

23 Ekpu auad ilpu atimi tak atimi iran ainyak an nuhup o un, um auahas ra era amcel vai yin ara.

24 Ja ekpu ago nedo inivaijec im nedo aiheuc vai yin ainyak: uhpu lep imiaridjai nemda o un va nidak.

25 Ekpu lep ati nikman an jop ainyak, im lep inmatan ira ofowai.

26 Etpu ahlaig vai nyak aien um ika, Na etmak aiek, Atua unyak, im inhehtec par imiatamaig nyak.

27 Ekpu ati yin ainyak mika yi metto aien um esjilid ira ilpu atimarid an nobohtan.

28 Ekpu aiheuc vai yin ainyak ira iji mesese, etpu lep amen aktit ehelen intas up yi asaig unyak.

29 Erupu amen a ilpu mapon ira iji mesese, im lep dorona o un et idivaig namen o nohatag.

30 El era ude intas alep unyak a ilpu hal o un, um eti atga an nedo atoh unyak;

31 El era auahas intas alep unyak ara, um eti apos intas unyak;

32 Ekpu ated ra ainyak va nedo impalea ura, um arodei ra va nedo has ura.

33 Ja inki ti atipagki naiheuc unyak ehelen ainyak, inyi ti lep ahcil nedo inivaijec unyum.

34 Inki ti auahas intas up yi asaig unyak ainyak, inyi ti lep eche intas is ahes an nipjineucsek.

35 Kis ecethi asan tas aktit unyak ainyak an nedo upene unyak, mika inki ti ahcil ehele Tevit ainyak.

36 Erupu amen a ilpu mapon ira iji mesese, im lep dorona o un et idivaig nagesega an nuhup unyak.

37 Etpu amen aktit et idivaig inmohouc ira iji mesese, um lep

SALM, 90.

idivaig itai asuptecnaig inivaijec an nohatag. Sela.

38 Ja as ude nyak aiek um amcel vai nyak, na edemda aiek vai yin as aspi yin aiek.

39 As eti ehgeijid intas up yi asaig unyum aiek ehele naheca unyum; as auahas korona o un an nobohtan.

40 As auahas nirahed asega o un aiek; as lepechedeliekse niiji eom ipjin asega o un aiek.

41 Era atoraliak niiji itai o un ara asega era atga an nefalaig ara: era lep imiafak ahcil yin a ilpu atimi eblaam nem o un.

42 As imiaridjai inmatai ilpu atimi tak atimi iran aiek: as ikni ilpu atimi edemda vai yin aiek mika eri imiacitak ara.

43 As lep ahidaig nidjan nautoga o un aiek: is eti aiji aktit aien an nedoa.

44 As atipagki natimi alupas o un aiek, um ethaigse dorona o un an nobohtan.

45 As ika aiek yi ipjidipjid intakuras o un, is taluopni pam yin nehcamai o un. Sela.

46 Ak Ihova, napu adinai euc aiek um yet pan an nahopan? etpu ere intavaitaup unyum et idivaig incop, ka o'o?

47 Namu aktaktai aiek mika et ipjidipjid numoh unyak: et takitai nagovaig natimi asega unyum.

48 Natimi ineig yeuc eda etpu umoh aien um eti ato inmas, etpu imiatamaig yin aien va nehpanitai, ka o'o? Sela.

49 Ak Ihova, naiheuc unyum itu acen eda as up yi asaig ehele Tevit aiek an nedo inivaijec unyum.

50 Ak Ihova, namu aktaktai aiek intas has vai ilpu aheca unyum; ek apos anliinmopok ainyak intas has o natimi et ahinag:

51 Eris atuh nyak iran a ilpu

atimi tak atimi iram, ak Ihova; eris lep apitac Mesaia unyum ara um atuh yin iran.

52 Naaurineig vai Ihova ira iji mesese. Amen, im Amen.

SALM 90.

1 Ak Ihova, as uarin amen unyima aiek ira iji mesese asega.

2 An naopan yehki is pam eti eteuc niiji edoon, um eti eteuc nobohtan im inpece, as Atua aiek ira iji mesese um yet pan ira iji mesese.

3 Na lep imiadumoj pan natimi u nobohtan; um ika, akumu adumoj pan o un aijaua, ak ilpu hal o atimi.

4 Et idivaig ianiv is ti pan itac inmesese et dausant et ethi an nuhup unyum, um lep idivaig nuarin nepeg et ethi er aiji iran.

5 Na ahre ra aiek et idivaig an wai alupas; era umjeg ara; era idivaig nefelelicai et ededel an nuhialeg ara.

6 Et umoh um ededel an nuhialeg; ja er elde an jupura et lep imlai.

7 Ecra ememas ehni aijama va nedemda unyum, ecra lep ohacred aijama va intavaitaup unyum.

8 As ikni nedo has unyima aiek an nuhup unyum, im nedo has adinaig unyima an lah an nesgan-
imtam.

9 Et idim ti pan itac niiji adiat asega irama an tavaitaup unyum: et lep ti pan itac niiji mesese irama et idivaig tup intas.

10 Et yet pan irai mesese et sevente niiji adiat ira ma; ja el et yet pan irai mesese et eete va nemda o atimi, et idim ohacred im intakitai nemda ura; et auroauro um ti, ecra lep ae pan aijama.

11 Et ato nemda u intavaitaup unyum a di? et idivaig er imitai euc et um ucco nedemda unyum.

SALM, 91, 92.

12 Esege imi cama par esvi niji adiat irama, va crupu leh narapakau aijama anliinmopoma.

13 Ak Ihova, namu adumoij pam aiek,um yet pan nahopan? etmu lep eche inliinmopom aiek vai ilpu aheca unyum.

14 Ecrumu auroauro aijama um gaije va naiheuc unyum; va crupu imiacitak aijama um cediaig ira iji adiat.

15 Ecrumu imiacitak aijama um idivaig nadiat iji ehki as ati nohacred irama aiek, im niji mesese ecris ato itai has iran aijama.

16 Ehvaig nauritai unyum aiek ehele ilpu aheca unyum, im natimi alupas unyum ehele ilpu hal ura.

17 Etmu amen irama naiheuc o Ihova Atua unyima; namu lep ago aktit nauritai ira ikmama; maiya, namu ago aktit nauritai ira ikmama aiek.

SALM 91.

1 Aien et eteuc aien an nuarin adinaig o Atua esjilid acen, etpu amen aien ithan naiyu o un et emda aien.

2 Ekpu ika vai Ihova ainyak, et uarin adinaig unyak aien,im neom ipjin unyak: Atua unyak; ekpu asgeig iran ainyak.

3 Etpu idim imiatamaig euc aien va nopoig o natimi ahilek man, im lep nemehe has.

4 Etpu aibuthan euc aien an nalau iran, napu amen upene aiek ithan nehpan: inyi itai atapen im nitai ahid unyum intas inivajec o un.

5 Napu eti imtitaig aiek nitai er imtitaig vaig an nepeg; im lep nidjan nafana et ae an nadiat;

6 Im lep nemehe et atga an nau-pat; im lep inmas et auahas atimi an nadiat adiat.

7 Erupu eropse natimi inyi ahinag an nahaijum, im lep natimi inyi ahinag acen an matam.

8 Napu almoi an nesganimtam aiek um ato nimtan imi ilpu atimi auatatimi.

9 Na idim uarin adinaig unyak aiek, ak Ihova; as lep ika aiek, et uarin amen unyum a Atua esjilid acen.

10 Inyi ti yet pam iram tah nitai has, inyi ti lep yet pam tah nitai auahas atimi an nuarin amen unyum.

11 Etpu tas alep ehele ilpu agelo o un aien vai euc, mika eri amin-jinai euc an nedo asega unyum.

12 Erupu apos jai euc ara ira ikmara van jim atgeig yi oplec neduom aiek an hat.

13 Napu atga aiek irai laion im nimyiv: napu lep atga aiek irai inhakli laion im trekon.

14 Et aiyu inliinmopon aien vai nyak va nitai ineigki ekpu imiatamaig yin ainyak: ekpu imiaridjai yin ainyak, et idim ato nidak aien.

15 Etpu ahlaig vai nyak aien, ekpu lep adai intas o un ainyak: ekpu amen ehelen ainyak an nohacred o un; ekpu imiatamaig yin ainyak um ika eri ago nedo ecen vai yin.

16 Inyi ahinag acen nadiat iran, ekpu lep ehvaig ehelen ainyak nitai imiatamaig atimi unyak.

SALM 92.

1 Et upene par ago naaurineig vai Ihova, um acesaces nohranitai vai nidam, ak Atua esjilid acen;

2 Um asuptecnaig naiheuc unyum an nuhialeg, im nedo invajec unyum ira iji epeg.

3 An nitai et amen inya et ten iran, im salteri, im harp an nohran upene.

4 As idim ati nimiacitak anliin-

SALM, 93, 94.

mopok aiek, ak Ihova, va nauritai unyum : ekpu imiacitak ainyak va nauritai an nikmam.

5 Ak Ihova, et esjilid acen nauritai unyum : et lep ubo acen naktaktai unyum.

6 Et eti ato a natimi aleg ; et lep eti ahajjeg natai ineig a natimi ahnag.

7 Era ededel et idivaig nefelelicai a ilpu atimi ago nedo has ; ja uhpu auahas ra ira iji mesese :

8 Ja na esjilid aiek, ak Ihova, ira iji mesese.

9 Ak Ihova, erupu ememas a ilpu atimi tak atimi iram, erupu idim ememas a ilpu atimi tak atimi iram ; uhpu interimterim ilpu atimi ago nedo has asega.

10 Ja napu imiaridjai nibat unyak aiek et idivaig yehki irai rema ; uhpu aspi nyak an naraki upene.

11 Ekpu almoi nitai merit unyak ainyak an nesganimtak ira ilpu atimi tak atimi irak, ek lep atahajjeg nitai merit unyak ainyak an tikgak ira ilpu atimi auatatimi era atidai vai nyak ara.

12 Erupu umumoh upene a ilpu atimi upene et idivaig nauincai paam : erupu ededel ara et idivaig nauincai sitar Lebanon.

13 Ara eris ahoai ra anli neom o Ihova erupu ededel ara an nimmim o Atua uja.

14 Erupu ohoai itai ara an nafatimi ura ; erupu emda ara um umumoh ;

15 Uhpu ato mika et upene a Ihova : et hehteuc unyak aien, et lep ti nedo has ehelen.

SALM 93.

1 Et atimarid a Ihova, et aso yin aien an natimi alupas o un ; et aso yin a Ihova an nemda o un et idivaig nitai ahid ; et lep amen aktit nobohtan, et eti amaamai.

2 Eris ati aktit dorona unyum itu acen : as eteuc aiek ira iji mesese.

3 Is ijinies inmodjan wai, ak Ihova, is ijinies acen inmodjan wai alupas ; et lep elege nepeau an jop.

4 Et esjilid a Ihova ijinies acen irai modjan wai et ahinag, im lep nepeau alupas an jop.

5 Et ipjin intas asuptecnaig unyum ; ak Ihova, et upene nedo upene, an neom unyum ira iji mesese.

SALM 94.

1 Ak Ihova, na Atua aru nedo has aiek ; ak Atua aru nedo has, namu ehvai euc aiek.

2 Namu atidai aiek, um tas alep va nobohtan : aru ira ilpu atimi ijinies inliinmopura.

3 Ak Ihova, erupu imiacitak a ilpu atimi auatatimi um yet pan an nahopan, erupu imiacitak a ilpu atimi auatatimi um yet pan an nahopan ?

4 Era tas ara um asan tas ijinies ; era lep imiacitak a ilpu atimi auatatimi asega.

5 Era ehtoplecoplec ilpu atimi unyum ara, ak Ihova, um ehcercai nup iran pece unyum.

6 Era atgei ilpu takata ara eri ememas a ilpu atumu ura, im ilpu atimi et eche, era lep atgei ilpu umnij ara.

7 Ja era ika ara, Inyi ti ato a Ihova, inyi ti lep aktaktai a Atua o ilpu mapoi Jekob.

8 Akumu ato itai aijaua, ak ilpu atimi aleg ira atimi : akupu arapakau aijaua an nahopan, ak ilpu atimi ahnag ?

9 Et idim ahge itai aien is ago intikgajja aien ; et idim alum itai aien is ago nesganimtaija aien.

10 Aien et arodei ilpu atimi aupat aien, etpu idim ated caua aien ;

aien et esege imi atimi narapakau et ato itai aien.

11 Et ato naktaktai o atimi a Ihova, mika et takitai.

12 Ak Ihova, et mun ahis moij a natimi ineig na ated yin aiek um esege imi yin intas alep unyum :

13 Va etpu atumop aien va nadiat ohacred o un, um yet pan an naopan yehki eri ucji nehpanitai va ilpu atimi auatatimi.

14 Inyi idim eti aticijaig ilpu atimi o un a Ihova, inyi ti lep ude nup iran pece o un aien.

15 Inyi idim atoh nedo o un ; etpu lep apitac iram a ilpu atimi inivaijec inliinmopura asega.

16 Etpu atidai ehelek a di vai ilpu atimi auatatimi? etpu atau imi nyak a di vai ilpu atimi ago nedo has?

17 El is eti atau imi nyak a Ihova, el kis auroauro ainyak um amen an nuarin u inmas.

18 Kis wat ika ainyak, et alahas neduok ainyak ; as asjiraig jai nyak aiek, ak Ihova, an naiheuc unyum.

19 Et ahinag naktaktai u inliinmopok ainyak ; ja et imiacitak inliinmopok ainyak va niji itai upene unyum.

20 Etpu amen ehelum donora o ilpu atimi auatatimi, era tastas alep has ara ka o'o?

21 Era ehtelohtelo pan ara irai ilpu atimi et ti nedo has ura um asaig inmas o ilpu atimi upene.

22 Ja et imiatamaig nyak a Ihova ; et lep hehteuc aiyu unyak a Atua unyak.

23 Etpu lep atijai ira ra aien nedo has ura ; etpu auahas ra an nedo has ura ; etpu auahas ra a Ihova Atua uja.

SALM 95.

1 Ti apan akaija, um acesaces nohranitai vai Ihova : intumu ahlaig akaija vai inhehteuc imiatamaig caija.

2 Intumu apan akaija an nuhup o un um ago naaurineig, um acesaces nohranitai vai yin irai Salm.

3 Et Atua esjilid a Ihova, um Atimärid esjilid irai ilpu atua asega.

4 Et amen an nikman niji uarin ubo an nobohtan : et lep ohuun niji uarin ijinies irai lola edoon aien.

5 Et o un injop, is idim ago aien : is lep ago nobohtan aien an nikman.

6 Ti apan akaija um ago nalaig-aheni um atpuse : intumu atpuse an nuhup o Ihova akaija is ago caija aien.

7 Et Atua uja aien ; inta lep ilpu atimi iji eigki akaija et alaa caija aien, im lep siip an nikman. El eka atahajeg nohran inpeig aijaua,

8 Etmu jim ipjin inliinmopomia aijaua, et idivaig Meriba, um lep idivaig Massa an naopan yehki an namas acen :

9 Eris wat imisjis ehelek a ilpu retpomia, um oop nyak, um almoi nauritai unyak.

10 Eris auahas inliinmopok natimi an naopan yehki irai mesese is forte, um ika, Et ahnag inliinmopoi natimi iji ehki, era lep eti ato nedo unyak ara :

11 Kis asan tas up yi asaig ehele ra ainyak an tavitaup unyak mika eri ti apan ara an nuarin atumop unyak.

SALM 96.

1 Akumu acesaces nohranitai vai Ihova aijaua an nohranitai mat : akumu acesaces nohranitai vai Ihova aijaua asega an nobohtan.

2 Akumu acesaces nohranitai vai Ihova aijaua, um imiahpas nidan: akumu asuptecnaig nitai umoh iran ineig aijaua et ahes ehelen ira iji adiat.

3 Akumu asuptecnaig natimi alupas o un aijaua ehele ilpu atimi aupat, im nedo imiali o un ehele atimi asega.

4 Et esjilid a Ihova, et upene par imiahpas alupas yin: et lep upene eri imtitai yin jam eti imtitai ilpu atua asega.

5 Era tak itai ilpu atua asega o nup ira iji pece aupat: ja is ago nohatag a Ihova.

6 Et uhup iran natimi alupas o un: et lep amen nemda o un im inupene o un an nuarin itaup o un.

7 Ak atimi an nobohtan, akumu imiahpas natimi alupas o Ihova aijaua im nemda o un.

8 Akumu imiahpas nidai Ihova aijaua; akumu apos nitai ahlap aijaua um apam anli nikaro o un.

9 Akumu atpuse an nuhup o Ihova aijaua an nuarin itaup upene: akumu imtitai yin aijaua asega an nobohtan.

10 Akumu asaig aijaua ehele ilpu atimi aupat mika et atimarid a Ihova; etpu lep amen aktit nobohtan um eti amaamai; etpu asuptecnaig nimitan imi atimi aien an nedo atoh o un.

11 Etmu imiacitak nohatag, um lep cediaig nobohtan; etmu yia in-jop im niji itai asega iran.

12 Etmu imiacitak nobohtan im niji itai asega iran: etpu lep cediaig naucal asega ira ese,

13 An nuhup o Ihova: et idim ham aien, et ham aien par asuptecnaig nimitan an nobohtan: etpu asuptecnaig nimitan imi atimi an nobohtan aien an nedo atoh o un, im nedo inivajec o un.

SALM 97.

1 Et atimarid a Ihova; etmu imiacitak nobohtan; etmu lep cediaig niji pece ahinag an jop.

2 Et arahed iran nepeg im nau-pat; et amen aktit dorona o un an nedo atoh im nedo upene.

3 Et atga um uhup iran incop, um atnamud arahed irai ilpu atimi tak atimi iran.

4 Is lah nobohtan va nauainapit o un, eris ecetai an nobohtan um ucjucjucaij.

5 Is updak um idivaig nidin-icai niji edoon an nuhup o Ihova, an nuhup o Natimarid an nobohtan asega.

6 Er ecetai nedo atoh o un an nohatag, era lep almoi natimi alupas o un natimi asega.

7 Erumu ehcamai ara asega era aheca u natmasimai er ucse ara, um imiacitak intakitai, akumu aheca o un aijaua, ak ilpu atua asega.

8 Eris atahajjeg Saion um imi-acitak; eris lep cediaig a ilpu halav atahaig Jataia, ak Ihova, va nedo ated atimi unyum.

9 Ak Ihova, na esjilid acen aiek an nobohtan asega; na esjilid acen aiek irai ilpu atua asega.

10 Akumu amcel vai nedo has aijaua et aiyu inliinmopomia vai Ihova: et aminjinaig nesgai ilpu atimi upene o un aien; et imiata-maig ra aien va nikmai ilpu atimi auatatimi.

11 Er ahoaig inlah vai ilpu atimi upene, im nimiacitak vai ilpu atimi et inivajec inliinmopura ara.

12 Akumu imiacitak Ihova aijaua ak ilpu atimi upene; um ago naau-rineig va nimiehva nedo upene o un.

SALM 98.

1 Akumu acesaces nohranitai vai Ihova aijaua an nohranitai mat; is idim ago nisi itai imiali aien: et esjilid aien vai ilpu atimi tak atimi iran va inmatan, im nikman upene.

2 Is ehvaig nedo imiatamaig atimi o un a Ihova, is asuptecnaig upene nedo atoh o un aien an nuhup o nup ira iji pece.

3 Is imiehva naiheuc o un aien im intas inivaijec o un ehele nupu Isreel: eris almoi nitai imiatamaig atimi o Atua uja an nobohtan asega.

4 Uhmua ahlaig vai Ihova an nobohtan asega: ahlaig ijinies um imiacitak, um acesaces nohranitai.

5 Acesaces nohranitai vai Ihova irai harp; irai harp marom, im nohranitai an nohramia.

6 Akumu imiacitak aijaua an nuhup o Ihova natimarid an nohran taho, im nohrai kornet.

7 Etmu yia injop, im nisi itai asega iran; im lep nobohtan, im natimi amen irau.

8 Etmu imiacitak nisi ofo wai; etmu lep ehra cediag nisi edoon,

9 An nuhup o Ihova: et ham aien par tas alep vai nobohtan: etpu tas alep aien vai nobohtan an nedo atoh o un, im lep va atimi an nedo upene o un.

SALM 99.

1 Et Atimarid a Ihova; erumu ucjucjucaij atimi: et eteuc juju an niblai jerubim aien; etmu amaamai nobohtan.

2 Et esjilid an lolan nedoon Saion a Ihova: et lep esjilid aien ira atimi asega.

3 Erumu imiahpas nidam esjilid er imtitaig vaig; et idim upene.

E

4 Et lep merit vai nedo atoh nemda o natimarid; na ika aiek yi amen aktit nedo atoh, na ago nedo atoh aiek im nedo upene vai ilpu mapoi Jakob.

5 Akumu imiahpas Ihova Atua uja aijaua um atpuse u nitai atijai neduon iran; et idim upene aien.

6 Erus amen a Moses im Eron ehele ilpu atimi ahlap o un, im lep Samuel ehele ra eris ahlaig vai nidan ara; eris ahlaig vai Ihova ara, is adai intas ura aien.

7 Is tas ehele ra aien an nobohtan aupat: eris apos intas asuptecnaig o un ara, im lep intas alep is alupai ra aien.

8 Ak Ihova Atua unyima as adai intas ura aiek: as Atua ikni-pagki nedo has ura aiek; ja as ago neruvaig nedo has ura aiek.

9 Akumu imiahpas Ihova Atua uja aijaua, um ago nalaigaheni an nedoon itaup o un; et idim upene a Ihova Atua uja.

SALM 100.

1 Akumu ahlaig ijinies vai Ihova aijaua an nobohtan asega.

2 Akumu aheca o Ihova aijaua um imiacitak: apam an nuhup o un um acesaces nohranitai.

3 Akumu ato Ihova aijaua mika et Atua aien: is ago caija aien, um ohuun caija: inta ilpu atimi o un akaija, im siip anli nikaro o un.

4 Akumu atga aijaua an neucse nirahed o un um ago naaurineig, im lep anli nikaro o un um imiahpas yin: ago naaurineig vai yin, um asan tas upene vai nidan.

5 Et upene a Ihova; et eteuc naiheuc o un ira iji mesese; im intas inivaijec o un irai iji taka aopan asega.

SALM 101.

1 Ekpu acesaces nohranitai ainyak vai nedo aiheuc im nedo atoh : ekpu acesaces nohranitai ainyak vai euc, ak Ihova.

2 Ekpu ago nedo arapakau ainyak an nefalaig upene. Napu apam ehelek aiek an nahopan ? ekpu atga ainyak anliinmopok upene an nuhup o ilpu hal unyak.

3 Inki ti ati tah nitai has ainyak an nuhup unyak : ek amcel vai nauritai ura ainyak era ahnag ara ; inyi ti apol irak.

4 Etpu amen itac acen vai nyak natimi ineig et acalacal inliinmopon aien : inki ti ato natimi ineig ainyak et atimi auatatimi aien.

5 Ekpu auahas natimi ineig ainyak et asan tas has vai etoan aien : ek esjum ainyak vai natimi ineig et ijinies nedo o uu, um lep ijinies inliinmopon.

6 Etpu amen nesganimtak irai ilpu atimi inivaijec an pece, va erupu amen ehelek ara : etpu aheca unyak aien et atga aien an nefalaig upene.

7 Inyi ti amen anli neom unyak aien et ago nedo efaifa aien : inyi ti amen aktit an nuhup unyak aien et asan tas ahcil aien :

8 Ekpu auroauro ainyak um auahas ilpu atimi auatatimi asega an pece ; ekpu auahas ilpu atimi ago nedo has asega ainyak an nuarin pece o Ihova.

SALM 102.

1 Ak Ihova namu atahajjeg intas alaigaheni unyak aiek, etmu lep yet pan ehelum nahlaig unyak.

2 Namu jim adinaig nesganimtam vai nyak aiek an naopan o nohacred unyak : atgeig pam intikgam ehelek : namu auroauro aiek

um adai intas unyak an nadiat ineig ekpu ahlaig vai euc ainyak.

3 et yet pan itac nadiat irak et idivaig nadran cop, er cas niji eduok et idivaig imunam.

4 Er auad inliinmopok, et imlai et idivaig nefelelicai ; ek lep eti imiehva ainyak inhag vaig.

5 Et apol an narasik niji eduok va naunyaugaig unyak.

6 Ek idivaig pelikan an namas acen ainyak : ek idivaig nalidmut ainyak an nuarin er eti amen iran.

7 Ek aijilahlah ainyak, um idivaig inman tintin et echem amen ijinies an neom.

8 Era atuh nyak a ilpu atimi tak atimi irak an nadiat asega ; era lep asan tas itaup vai nyak ara sji eigki era atavaitaup alupas vai nyak ara.

9 Kis caig nohpa ainyak is idivaig nareto, um ago pelaig nitai alumak an nidi imtak,

10 Va nedemda unyum im intavaitaup unyum : as idim imiaridjai nyak aiek um imiasuol nyak.

11 Et tup ti nadiat irak et idivaig nalmui itai ; ek imlai ainyak et idivaig nefelelicai.

12 Ja napu amen aiek ira iji mesese, ak Ihova ; uhpu lep imiehva euc um yet pan irai iji tak aopan asega.

13 Napu atidai aiek, um aiheuc vai Saion : et mun idim yet pam naopan marom eris up yi asaig.

14 Era imacitak niji hat iran a ilpu aheca unyum, um aiheuc vai nobohtan iran.

15 Erupu lep imtitai nidai Ihova a ilpu atimi aupat, im natimi alupas unyum a ilpu atimarid asega an nobohtan.

16 Etpu uctaig ehni Saion a Ihova ja par ehcohos an natimi alupas o un.

17 Etpu aktaktai nalaigaheni o

ilpu ihki atimi aien, um eti amcel vai nalaigaheni ura.

18 Er aged nitai ineigki va atimi an tak aopan : erupu lep imiahpas Ihova natimi uhpu lep apos ra.

19 Is ias sepam aien an nuarin itaup o un ijinies acen ; is almoi nobohtan a Ihova an nohatag :

20 Par atahajjeg naunyauaig o ilpu atimi eris arore ra ; um aihiyi ra eris asaig inmas ura ;

21 Va uhpu asuptecnaig nidai Ihova an nedoon Saion, im nimiahpas o un Jerusalem :

22 Eruit asjapicnaig natimi, im nihi elcau, par aheca o Ihova.

23 Is atipagki nemda unyak aien an nefalaig ; is ika aien yi eti alupat nadiat irak.

24 Kis ika ainyak, ak Atua unyak, jim atipagki nyak aiek an tak uras unyak : na idim amen aiek ira iji mesese.

25 As ati aktit nobohtan aiek itu acen : et lep auritai ira ikmam nohatag.

26 Etpu ti nitai iji eigki, ja napu amen aiek : etpu idim mutit nihi itai asega et idivaig napelumai ; napu iknipagki aiek et idivaig napelumai, uhpu idim iknipagki ra :

27 Ja na eti eche aiek, inyi ti lep ti inmesese iram.

28 Erupu amen a ilpu hal o ilpu aheca unyum, erupu lep amen aktit a ilpu mapora an nuhup unyum.

SALM 103.

1 Etmu imiahpas Ihova inliinmopok ainyak : etmu lep imiahpas nidan upene nihi itai asega anliinmopok.

2 Etmu imiahpas Ihova inliimopok ainyak, um jim ahnag irai nedo aiheuc asega o un.

3 Et iknipagki nedo has asega unyum aien, um ago cehcehe euc va nemehe asega unyum ;

4 Et imiatamai euc aien va nehpanitai ; et taluopni pam euc aien an nedo aiheuc im nedo upene o un.

5 Et alupai euc nihi itai upene et ahinag aien ; na lep takuras aiek et idivaig ical.

6 Et ago nedo atoh im nedo upene a Ihova vai ilpu atimi asega er ehceruca ra.

7 Is asuptecnaig nedo o un ehele Moses aien, im nihi auritai o un ehele nupu Isreel.

8 Et tak eris ira atimi a Ihova um aiheuc vai ra, um eti fi auroauro um atavaitaup, um esjilid naiheuc o un.

9 Inyi ti ated atimi aien ira iji adiat : inyi ti lep amen nedemda o un ira iji mesese.

10 Is eti ago iraija aien is idivaig nedo has uja ; um eti aru iraija is idivaig nedo acalacal uja.

11 Et idivaig et ijinies nohatag irai nobohtan, et um ucco et esjilid naiheuc o un vai ra era imtitai yin ara.

12 Et idivaig et itac acen inridjai o un va nette o un, et um ucco is ikni itac acen vai caija nedo has uja.

13 Et idivaig et aiheuc vai ilpu al o un a etmara, et um ucco et aiheuc vai ra a Ihova era imtitai yin ara.

14 Et ato nohuja aien ; et imiehva aien mika inta obohtan akaija.

15 Et idivaig nefelelicai nihi adiat ira atimi : et edel aien et idivaig intisianicai an nobohtan.

16 Et yet pan nimitinjop iran, um lep ti ; er eti lep ecetai an nuarin o un.

17 Ja etpu amen naiheuc o Ihova ira ra era imtitai yin ara ira iji mesese, im lep nedo atoh o un irai ilpu mapora ;

18 Ira ra era apos intas asuptecnaig o un ara, um lep ra era imiehva intas alep o un um imiaiji.

SALM, 104.

19 Is ati dorona o un an nohatag a Ihova; et lep atimarid aien ira iji itai asega.

20 Akumu asan tas upene vai Ihova aijaua, ak ilpu agelo o un, et esjilid nemda unyimia, eka imiaiji intas alep o un aijaua, um atahaijeg nohran tas o un.

21 Akumu asan tas upene vai Ihova aijaua, ak ilpu agelo o un: eka ilpu aheca o un aijaua, um ago nitai merit o un.

22 Etmu imiahpas Ihova niji auritai asega o un ira iji uarin asega an nelcau o un: etmu imiahpas Ihova inliinmopok ainyak.

SALM 104.

1 Etmu imiahpas Ihova inliinmopok ainyak. Ak Ihova Atua unyak na esjilid acen aiek: na aso euc aiek an nimiahpas im natimi alupas.

2 Na taluopni pam euc aiek an lah et idivaig an napelumai: um alage nohatag et idivaig napelumai:

3 Et ikni nauicai atgeig an neom o un aien ijinies irai wai: et ika aien yi itai atga o un naupat: et atga aien an nehpan nimtinjop.

4 Et ika aien yi agelo o un nimtinjop; um lep aheca o un incop.

5 Is ati intinan nobohtan aien, va yi jim amaamai ira iji mesese.

6 As adahpoi an tuboahau aiek et idivaig an napelumai: is amen inwai ijinies irai lola edoon.

7 Is aha va intas alep unyum; is auroauro um yet pan va nohran munuka unyum.

8 Et aridjai ira iji edoon; et lep asuol ira iji ihkanse um yet pan an nuarin as ati vaig aiek.

9 As ati natacai aiek va yi jim ahtaregde; um lep apam um taluopni pam nobohtan.

10 Is ika aien yi ahlau ohua inwai

ira iji ihkanse, et lep yah ira iji edoon.

11 Era umwig iran niji itai eclim edo irai pece: era lep ehgi vaig nifo aleg.

12 Erupu amen ubutpotet o un inman an nohatag, um laav irai rai cai.

13 Et ohoaig niji edoon aien irai iji uarin amen ijinies o un; et ohua nohoai itai an nobohtan va nauritai unyum.

14 Et ika aien yi ededel nefelelicai incai niji itai eclim edo irai pece, im inceslum incai atimi: va etpu eteuc nitai caig an nobohtan;

15 Im waina par imiacitak inliinmopoi atimi, im naraki mika yi naunau nesganimtara vaig, im nitai caig par ago emda natimi.

16 Et mulmul nauicai o Ihova; nauicai Sitar Lebanon is ahoaig aien;

17 Era ago nasiom ura iran inman: ja et uarin amen o stork nauincaincai paina.

18 Era amen upene nanin aleg irai lola edoon; im lep kuni irai hehteuc.

19 Is ati inmohouc aien par asjaaicnaig niji aopan: et ato nette o un nagesega.

20 As ago naupat aiek, et lep epeg: era ehchos iran niji itai eclim edo irai pece aleg asega.

21 Era aunyauaig va nitai caig incara inhakli laion, um ahilek nitai caig incara ehele Atua.

22 Et aridjai nagesega, era asjapicnaig ara, um asjeuc irai kakoai kuri ura.

23 Era apan atimi u nauritai ura, um auritai um yet pam an jupura.

24 Ak Ihova, et ahinag niji auritai unyum! as ago asega aiek an nara-pakau unyum: et ohua niji itai upene unyum an nobohtan.

25 Im lep injop esjilid ineigki um alupas, et amen iran niji itai atga

SALM, 105.

et ahinag, niji itai umumoh aclin um alupas.

26 Et atga iran nelcau : et lep amen iran livaiedin, as ago aiek um imiacitak.

27 Era aijnai euc nitai iji eigki asega : va apu alupai ra nitai caig aiek incara ira iji adiat.

28 Era asjapicnaig nitai iji eigki ara na alupai ra aiek : na asalage nikman aiek, era gaije ara va niji itai upene.

29 Na adinaig nesganimtam aiek, era ohacred ara : na atipagki nohrara aiek, era ememas ara, um adumoig pan an nobohtan.

30 Na abrai nesgam aiek, um ago ra : na lep ago upene narasin nobohtan aiek.

31 Etpu amen natimi alupas o Ihova ira iji mesese : etpu imiacitak nauritai o un a Ihova.

32 Et eas pan nobohtan aien, et lep ucjucjucaig : et aticei pan niji edoon aien, et lep ahes nadran cop iran.

33 Ekpu acesaces nohranitai vai Ihova ainyak an numoh vaig asega unyak : ekpu acesaces nohranitai vai Atua unyak ainyak an namen unyak an nobohtan.

34 Ekpu aktaktai yin ainyak anliinmopok upene : ekpu imiacitak Ihova ainyak.

35 Uhmu auahas ilpu atimi aua-tatimi an nobohtan, erumu lep ti ilpu atimi ago nedo has. Etmu naaurineig vai Ihova inliinmopok ainyak. Akumu imiahpas Ihova aijaua.

SALM 105.

1 Ago naaurineig vai Ihova ; ahlaig vai nidan : asuptecnaig ehele atimi niji auritai o un.

2 Acesaces nohranitai vai yin, um imiahpas yin : akumu tas aijaua va niji auritai imiali asega o un.

3 Akumu imiacitak nidan aijaua : etmu imiacitak inliinmopoi ra sji eigki aijaua era ahilek Ihova ara.

4 Akumu ahilek Ihova aijaua im nemda o un : ahilek nesganimtan ira iji adiat.

5 Akumu imiehva niji auritai imiali aijaua is ago aien ; nedo imiali o un, im intas alep asega an nipjineucsen ;

6 Ak ilpu mapoi Ebrahim naheca o un, ak ilpu mapoi Jakob is ehtai yin aien.

7 Et Ihova aien Atua uja : er ato nedo ated atimi o un an nobohtan asega.

8 Et imiehva intas is up yi asaig o un aien ira iji mesese, intas is asaig aien ehele atimi an tak aopan.

9 Intas o un ehele Abraham, im intas asig yi aktit o un ehele Aisaak ;

10 Is lep ati ehele ilpu mapoi Jakob aien mika yi tas alep imi ra, im lep ehele nupu Isreel mika yi tas etipup imi ra ira iji mesese.

11 Um ika, ekpu alupai euc inpece Kenan ainyak mika aki ohuun aijaua.

12 Eris wat eti alupat ara ; um eti ahinag, um tak atimi iran.

13 Eris wat ahes ara an pece is ethi um apan irai taka pece, um lep ahes iran nelcau is ethi um apan irai taka uarin ;

14 Is acniji atimi aien va yi jim ago nedo has vai ra tah : is lep ated ilpu atimarid aien vai ra :

15 Um ika, Jim aticei pan ilpu profeta unyak aiek, um jim ago tah nedo has vai ilpu profeta unyak.

16 Is lep ika aien yi umlain has an pece : is atipagki nitai caig asega aien.

17 Is abrai natimi is ethi aien mika yi uhup ira ra Josef marom, eris ahtai yin mika yi aheca aien :

18 Is emda neduon va wau : eris ati natau hat iran :

19 Um imihum pan an naopan

SALM, 106.

yehki is ehneijid intas o un : eris aticijaig yin va intas o Ihova.

20 Is abrai atiml a natimarid par aihiyi yin : natimarid an pece marom um aticijai yin.

21 Is ati yin aien mika yi esjilid aien an nimmim o un, um atimi alupas irai padiaig asega o un :

22 Par arore ilpu atimi alupas o un el is upene iran ; um esege imi ilpu atimi tastas alep narapakau.

23 Is yet pan Ijpt a Isreel : is lep amen a ilpu mapoi Jekob an pece o Ham.

24 Is ika aien eri ahinag acen ilpu atimi o un ; is lep ika aien eri esjilid ara irai ilpu atimi tak atimi ira ra.

25 Is lep ahidaig inliinmopura aien mika eri amcel vai ilpu atimi o un ara, um ago nedo efaifa vai ilpu aheca o un.

26 Is abrai Moses aien naheca o un ; im Eron yehki is ehtai yin aien.

27 Erus ehvaig niji itai asjaaicnaig o un ehele ra aien, im nedo imiali an pece o Ham.

28 Is ati inmehcum aien um ika yi aupat ; ja eris eti impalea intas o un ara.

29 Is ika aien yi ja inwai, um atgei numu ura.

30 Is ahinag rane an pece ura, im lep irai li com umjeg o ilpu atimarid ura.

31 Is tas aien, ja is ehcohos niji ubatpot lag, im nicit ira iji uari pece ura.

32 Is alupai ra hion aien va incopda, im incop alaume an pece ura.

33 Is lep auad vaine ura aien, im nauicai ateg ura ; um asvi nauicai ira iji uari pece ura.

34 Is tas aien, ja is ehcohos inheled, im nimyiv is ahinag,

35 Um ahtahni inceslum asega an pece ura, um caig nohoai itai an nobohtan ura.

36 Is lep auad inmetto asega aien

an pece ura, inmetto an nemda asega ura.

37 Is iknipagki ra aien im lep colt im silver ura : is lep eti amen tah natimi auatialidi ira ra.

38 Eris imiacitak Ijpt va napan ura : eris idim imtitai ra ara.

39 Is alage naupat aien par adahpoi ra ; im incop mika yi lah an nepeg.

40 Eris ugni itai atimi is lep imipam inman aien, eris gaije ara va nitai caig is ahes an nohatag.

41 Is asalage inhehteuc aien, is lep ahlau ohua jai inwai iran ; is yah irai uari amasacen is idivaig nofowai.

42 Is imiehva intas up yi asaig upene o un aien ehele Abraham naheca o un ;

43 Is iknipagki ilpu atimi o un aien incediaig vaig, im ilpu atimi ehtai ra nimiacitak vaig.

44 Is alupai ra inpece o ilpu atimi aupat aien : eris ohuun nauritai o atimi ara ;

45 Va erupu imiaiji intas asuptecnaig o un ara, um apos intas alep o un. Akumu imiahpas Ihova aijjaua.

SALM 106.

1 Aleluia. Akumu ago naaurineig vai Ihova aijjaua : et upene aien : et amen naiheuc o un ira iji mesese.

2 Et emda a di par asuptecnaig niji auritai esjilid o Ihova ? um imiapaahni nimiahpas yin asega.

3 Era mun ahis moij ara sji eigki era imiaiji intas alep o un ara, im lep yin et ago nedo atoh aien ira iji adiat.

4 Ak Ihova, imiehva nyak an naiheuc unyum vai ilpu atimi unyum : etmu ateghe nyak nitai imiatamaig nyak unyum.

5 Va ekpu ato ainyak inupene o ilpu atimi ehtai ra unyum, um imiacitak va nimiacitak o nup iran pece

unyum, um cediaig ehele ilpu atimi unyum.

6 Ecris ago nedo has aijama im lep ilpu retpoma, ecris ago nedo imipalea aijama, ecris ago nedo auatatimi aijama.

7 Eris eti ato nedo imiali unyum a ilpu retpoma an pece ljipt; eris eti imiehva nedo imiali unyum is ahinag ara; ja eris imipalea ara u injop, Injop cop marom.

8 Ja is imiatamaig ra aien va nidan, va uhpu ato nemda esjilid o un.

9 Is lep acaiji Injop cop aien, is um ame: is lep atau ira ra aien irai iji uarin ubo, et idivaig an namas acen.

10 Is imiatamaig ra aien va nikmai natimi amcel vai ra: um ikni-pagki ra an nikmai natimi tak atimi ira ra.

11 Is taluopni pam ilpu atimi tak atimi ira ra injop: is eti amen tah ra.

12 Eris imiisjis ninivaijec intas o un ara; eris lep acesaces nohranitai vai yin ara.

13 Eris auroauro ara um eti imiehva nisi auritai o un; eris eti aijnaig intas o un ara.

14 Eris ahvig emda itai an namas acen ara, um auahas inliinmopoi Atua an namas acen.

15 Is alupai ra itai aien eris ugni ara; ja is lep alupai ra nauatialidi aien.

16 Eris lep auatatitai vai Moses ara an nuarin amen o atimi, im lep vai Eron natimi upene o Ihova.

17 Is asalage nobohtan um atleg Todan, um taluopni pam ilpu atimi apol irai Ebarim.

18 Eris adnan cop an nibla atimi asjapienag; is atnamud ilpu atimi auatatimi nalaume u incop.

19 Eris ago inhakli kurimatau ara Horeb, um ago nalaigaheni vai natmas hat ineigki.

20 Eris idim ika ara et idivaig kurimatau et caig nefelelicai natimi alupas ura.

21 Eris eti imiehva Atua imiatamaig ra ara, is ago nedo emda ljipt aien;

22 Nauritai imiali an pece o Ham, im nedo eris imtitaig vaig u Injop cop.

23 Va nitai ineigki is ika aien, etpu auahas ra aien, ja is aiji a Moses an nuhup ura an nibla ra, par atapanes nedemda o un, va yi jim auahas ra aien.

24 Eris lep amcel vai inpece upene ara, eris eti ateuc an tas o un ara:

25 Ja is has inliinmopura ara irai li eom atga ara, um eti atahaijeg intas o Ihova.

26 Va nitai ineigki is adaig jai nikman aien vai ra par imiasuol ra an namas acen:

27 Um lep imiasuol ilpu hal ura ira iji uarin um imiterimterim ra ira iji pece.

28 Eris lep apol irai Beelpeor ara, um caig nisi itai ahlap vai itai ememas.

29 Is idim ucco eris auahas inliinmopon ara an nedo has ura; is lep yet pan ira ra nemehe has.

30 Ja is atidai a Finehas um tas alep; is lep ti nemehe has.

31 Eris esvi nedo upene ineig o un atimi asega ira iji mesese asega.

32 Eris lep auahas inliinmopon ara ui wai Meriba, is lep has namen o Moses vai ra:

33 Eris auahas inliinmopon ara va nitai ineigki is asan tas ahnag aien an nipjineucsen.

34 Eris eti auahas nup irai pece iji ehki ara, is tas alep vai ra a Ihova:

35 Ja eris ehramen ehele ilpu atimi aupat ara, um leh nedo ura.

36 Eris lep aheca u natmasimai ura ara: is itai oop ra ineigki.

SALM, 107.

37 Eris lep ahlap vai ilpu agelo has ara irai ilpu halav atamaig ura im ilpu halav atahaig ura.

38 Eris atgei ilpu atimi ara, upene ilpu halav atamaig ura im ilpu halav atahaig ura marom, eris ahlap ira ra ara vai ilpu atmasimai Kenan, is has inpece va inja iran.

39 Is idim ucco eris auahas ra ara va niji auritai ura, um ago ingaijed an nedo ura.

40 Va nitai ineigki is atavaitaup a Atua vai ilpu atimi o un, um lep amcel vai natimi iji ehki is ehtai ra aien.

41 Is ikni ra aien an nikmai ilpu atimi aupat; eris lep amcel vai ra ara sji ehki eris esjilid ira ra ara.

42 Eris lep ehcercai ra a ilpu atimi tak atimi ira ra, eris lep upoupo ara an nuhup ura.

43 Is ecahinag imiatamaig ra aien; ja eris auahas inliinmopon ara va nimiisjis itai ura, eris lep ilpu ihki atimi ara va nedo has ura.

44 Ja is aktaktai nohacred ura aien, is wat atahajeg intaig ura aien:

45 Is imiehva intas up yi asaig o un aien vai ra, um adumoij et idi-vaig naiheuc esjilid o un.

46 Is lep ika aien eri aiheuc vai ra ara sji ehki asega eris iknipagki ra ara.

47 Imiatamaig cama, ak Ihova Atua unyima, um iknipagki cama ehele ilpu atimi aupat, par ago naaurineig vai nidam upene, um imiacitak nimiahpas euc.

48 Naaurineig vai Ihova Atua o nupu Isreel, ira iji mesese asega: erumu lep ika atimi asega, Amen. Aleluia vai Ihova.

SALM 107.

1 Ago naaurineig vai Ihova, et idim upene aien, et eteuc naiheuc o un ira iji mesese.

2 Etmu ucce intas o ilpu atimi

is imiatamaig ra a Ihova, is imiatamaig ra aien va nikmai ilpu atimi tak atimi ira ra;

3 Um asjapicnai ra ira iji pece, an ridjai o un, im an nette o un, im nord im saud.

4 Eris atga ara an namas acen is ti nefalaig iran; eris eti ecetai tah nuarin pece ara par amen iran.

5 Is ehtele ra ara um ahvig wai, is auatialidi inliinmopura ara.

6 Eris ahlaig vai Ihova ara an nohacred ura, is lep imiatamaig ra aien va nohacred ura.

7 Is atau ira ra aien an nefalaig atoh, va erupu apan ara an nuarin eris amen iran natimi.

8 Erumu imiahpas Ihova natimi va naiheuc o un, im lep nauritai imiali o un vai atimi!

9 Et ika aien yi gaije natimi ahvig itai, et lep ika aien yi gaije ira iji itai upene natimi ahvig itai.

10 Era amen an mehcum ara im naupat u inmas, eris arora ra ira atau hat;

11 Va nedo ura nikavaig eris imipalea intas o Atua ara, um amcel vai intas o un et esjilid acen aien.

12 Va nitai ineigki is imiasuol inliinmopura aien an nohacred; eris ebehtau ara, is eti amen tah par atau imi ra.

13 Eris ahlaig vai Ihova ara an nohacred ura, is lep imiatamaig ra aien va nohacred ura.

14 Is imiatamaig ra aien va inmehcum im naupat u inmas, um ahtamud nitai arore ra.

15 Erumu imiahpas Ihova natimi va naiheuc o un, im nauritai imiali o un vai atimi:

16 Is idim auahas nitai atapanes irai bras aien, um ahtaldei sjipe nau aiiron.

17 Era ohacred a ilpu atimi ahnag va nedo imipalea ura, im lep nedo has ura.

18 Et amcel vai nitai caig asega

SALM, 108.

inlinmopura ara : era ubutpotet u inmas ura ara.

19 Era ahlaig vai Ihova ara an nohacred ura, et lep imiatamaig ra aien va nohacred ura.

20 Et tas alep aien um ago cehcehe ra, um imiatamaig ra va niiji itai auahas ra.

21 Erumu imiahpas Ihova natimi va naiheuc o un, im lep niiji auritai imiali o un vai atimi.

22 Erumu ahlap ara ira iji itai ahlap naaurineig, um asuptecnaig niiji auritai o un um acesaces nohranitai.

23 Ara era atga an jop ara irai elcau um auritai ijinies an tupohau esjilid ;

24 Era almoi nauritai o Ihova ara sji eigki, im lep nedo imiali o un an tupohau.

25 Et tas alep aien um ago nehio um imiaridjai nepeau iran.

26 Et aridjai an nohatag, et lep asuol an nuarin ubo : et auatialidi inliinmopura ara va nohacred ura.

27 Et aedyau i sjipe, um atga ahnag et idivaig natimi umni kava, et lep ti nesgara.

28 Era ahlaig vai Ihova ara an nohacred ura, et lep imiatamaig ra aien va nohacred ura.

29 Et ika aien yi eigpa, et lep esjainse injop.

30 Era imiacitak ara va namen upene ura, et lep imiapan ra aien an nafaiava era merit vaig ara.

31 Erumu imiahpas Ihova natimi va naiheuc o un, im lep niiji auritai imiali o un ehele atimi :

32 Erumu lep asan tas upene vai yin ara an nuhup o ilpu atimi asjapicnaig, um imiahpas yin an nuhup o ilpu atimi alupas.

33 Et ika aien yi amas acen niiji ofowai, um lep ucda mese nuarin is ahlau ohua jai inwai iran ;

34 Um amas acen nobohtan aiyu, va nedo has ura era amen iran ara.

35 Et ika aien yi etpen wai namas acen, um lep uarin ahlau ohua jai inwai iran nobohtan ucda mese.

36 Et ika aien eri amen eahki a ilpu atimi ehteleva, va erupu ago nuarin amen iran ara ;

37 Um ahapol an nobohtan um ahoag vaine, va etpu ahinag nohoai itai.

38 Et lep asan tas upene vaig aien, mika yi ahinag nohoan ; et lep ika aien eri jim eti alupat niiji itai eclim edo irai pece ura.

39 Era lep eti alupat ara um asuol va nedo ehcercai ra, im nohacred, im intaig ura.

40 Et amcel vai ilpu atimarid aien, um ika eri atga ara an namas acen, et ti nefalaig iran.

41 Ja imiatamaig ilpu ihki atimi aien va nohacred ura, um ika eri idivaig inpak irai siip a ilpu hal o un.

42 Erupu almoi a ilpu atimi upene um imiacitak : erupu ucsup a ilpu atimi auatatimi asega.

43 Erupu ato naiheuc o Ihova ara sji eigki era arapakau ara, um aktaktai nitai iji eigki.

SALM 108.

1 Ak Atua, et amen aktit inliinmopok ainyak ; ekpu acesaces nohranitai ainyak, um imiahpas euc aulinmopok.

2 Uhm u aiji lahlah salteri im harp : ekpu auroauro ainyak um aiji lahlah.

3 Ak Ihova ekpu imiahpas euc ainyak an nuhup o atimi : ekpu imiahpas euc ainyak an nuhup o nup ira iji pece.

4 Et esjilid naiheuc unyum irai nijinies u nohatag : et yet pan nedo inivaijec unyum an nohatag.

5 Ak Atua, namu esjilid aiek ira ohatag : im natimi alupas unyum irai nobohtan asega ;

6 Va uhpu imiatamaig ilpu atimi

SALM, 109.

unyum eti aiyu inliinmopom aiek vai ra : namu imiatamaig cama aiek an matam um atahajjeg intas unyak.

7 Is tas a Ihova an nuarin upene o un ; ekpu imiacitak ainyak, ekpu ahaig Sikem ainyak, um akaro sjipe nihkanse Sukkod.

8 Ek ohuun Ciliet ainyak ; et unyak Manasi ; et lep nemda esjilid unyak Ifreim ; et ahes intas alep unyak Juta ;

9 Et elcau ereuc unyak Moab ; ekpu ethaig su unyak ainyak ijinies irai Itom : ekpu imiacitak ainyak vai Filistia.

10 Etpu imiapan nyak an nuarin pece esjilid a di ? etpu atau pan irak Itom a di ?

11 Aiek marom, ak Atua, as atci-jaig cama aiek ; Ak Atua, napu ahced ilpu eucsupo unyima aiek an nedoa, ka o'o :

12 Atau imi cama aiek an nohacred, era auatialidi atimi par atau imi cama.

13 Ecrupu emda aijama vai Atua ; etpu idim atga ijinies aien irai ilpu atimi tak atimi irama.

SALM 109.

1 Ak Atua, ek imiahapas euc ainyak, namu jim ucsup aiek.

2 Era asalage nipjineucsera vai nyak a ilpu atimi auatatami im ilpu atimi efaifa ; eris asan tas ahcil vai nyak ara.

3 Eris lep arahed irak ara irai tas edemda ; eris lep ispara ago nedoa vai nyak ara.

5 Eris aru nedo upene unyak ara an nedo has, im naiheuc unyak an nedemda.

6 Etmu esjilid iran natimi auatatimi, etmu lep aiji a Satana an matan.

7 Uhuit tas alep vai yin, etmu amen iran nedo has o un : etmu lep has nalaigheni o un.

8 Etmu eti alupat nadiat iran : etmu leh nauritai o un intak atimi.

9 Erumu umnij a ilpu hal o un, etmu takata echem amen a ehgan.

10 Erumu amen ehcid a ilpu hal o un, um ugni itai ; erumu ahilek nitai caig ura ara irai iji uarin amas acen.

11 Etmu leucse niji itai asega o un a natimi atoraliak itai ; erumu lep auahas nauritai o un a nup irai taka uarin.

12 Etmu jim aiheuc vai yin tah : etmu jim aiheuc vai ilpu umnij o un tah.

13 Erumu ememas a ilpu hal o un ; etmu ti nidara an tak aopan.

14 Etmu imiehva nedo has o ilpu retpon a Ihova : uhmu jim iknipagki nedo has o risin.

15 Erumu amen ara an nuhup o Ihova ira iji adiat, va uhpu eti imiehva ra an nobohtan.

16 Va nedo o un nikavaig is eti imiehva nedo aiheuc vai atimi aien, ja is atmas aien vai natimi ineig is ohacred aien um ihkin natimi, va etmu auahas natimi ineig aien er ahtagre inliinmopon.

17 Is merit vai intas has aien, etmu lep yet pam iran : is eti imiacitak intas upene aien, etmu lep itac acen vai yin.

18 Is aso yin aien an tas has et idivaig an napelumai, etmu lep yet pam anli nipjinetgan et idivaig inwai, um lep idivaig naraki anli neduon.

19 Etmu idivaig napelumai et aso yin iran aien, im nitai ahid et arore nejihgan iran aien ira iji adiat.

20 Etmu ucce neruvaig o Ihova irai ilpu atimi tak atimi irak, im lep ira ra era asan tas has vai nyak ara.

21 Ja namu atau imi nyak aiek ak Atua Natimarid, va nidam ; imiatamaig nyak va naiheuc upene unyum.

22 Ek ohacred ainyak um ihkin

SALM, 110, 111.

natimi, er lep ahcai inliinmopok.

23 Ek apan ainyak et idivaig nalmui itai et lep ti: er ahladaig sjipe nyak et idivaig inheled.

24 Et auatialidi nijin neduok va natoakum unyak, et lep erekinman inman irak ainyak.

25 Er amcel vai nyak: eris wat alum nyak ara eris auhohaig nidjin-ira ara.

26 Atau imi nyak, ak Ihova Atua unyak: imiatamaig nyak an naiheuc unyum:

27 Va erupu ato ara mika nikman ineigki; as ago aiek, ak Ihova.

28 Erumu asan tas has ara, ja namu asan tas upene aiek: eruit atidai ara erumu ehcamai ara: ja etmu imiacitak a naheca unyum.

29 Erumu ehcamai alupas a ilpu atimi tak atimi irak, erumu aso ra ara an nehcamai ura et idivaig an napelumai.

30 Ekpu imiahpas alupas Ihova ainyak an nipjineucsek; ekpu idim imiahpas yin ainyak an nuhup o atimi.

31 Etpu aiji aien an matai nihki natimi par imiatamaig yin vai ilpu atimi tastas alep vai yin.

SALM 110.

1 Is ika a Ihova ehele Natimarid unyak, Namu eteuc an matak aiek, um imihum pan an naopan yehki ekpu ikni ilpu atimi tak atimi iram ainyak mika eri itai atijai neduom iran.

2 Etpu ika a Ihova yi ahes Saion neseuc emda unyum; namu atimarid aiek an nuhup o ilpu atimi tak atimi iram.

3 Erupu eti esjum a ilpu atimi unyum an nadiat o nemda unyum, an nuarin itaup upene: erupu idivaig nara et ahes an nipjinetgan nahialeg a ilpu hal unyum.

4 Is asan tas aktit o un a Ihova,

inyi ti lep adumoij o un aien, na atimi ahlap aiek ira iji mesese et idivaig Malkisitek.

5 Etpu auad ilpu atimarid a Natimarid an matam an nadiat o intavaitaup o un.

6 Etpu tas alep aien vai ilpu atimi aupat: erupu ahinag acen a ilpu atimi ememas vai yin: etpu atgei atmas ilpu atimi alupas aien ira iji pece ahinag.

7 Etpu umwig aien an ran wai an nefalaig: etpu lep alcacse jai nidjinen aien.

SALM 111.

1 Aleluia. Ekpu, imiahpas Atua ainyak anliinmopok asega, an nuhup o ilpu atimi upene, im lep ilpu atimi asjapicnaig.

2 Et esjilid nauritai o Ihova, era ahilek ara asega era imiacitak vaig ara.

3 Et upene um esjilid nauritai o un; et lep amen nedo atoh o un ira iji mesese.

4 Is ika aien eri imiehva niji auritai imiali o un; et aiheuc vai atimi a Ihova, et lep esjilid acen naiheuc o un.

5 Is alupai ilpu atimi imtitai yin nitai caig aien incara; etpu imiehva intas up yi asaig o un aien ira iji adiat.

6 Is ehvaig ehele ilpu atimi o un aien niji auritai emda o un, va etpu alupai ra nuarin eris ohuun a ilpu atimi aupat.

7 Et inivaijec um atoh nauritai an nikman; et inivaijec intas alep asega o un.

8 Et amen aktit ira iji mesese; et lep ahes an nedo inivaijec im nedo atoh o un.

9 Is imiatamaig ilpu atimi o un aien; is ati intas up yi asaig o un aien mika yi amen ira iji mesese; et upene im itaup nidan.

SALM, 112, 113, 114.

10 Natupun narapakau ineigki nimitai Ihova : et eteuc upene lelera sji eigki asega era apos intas alep o un ara : uhpu imiahpas yin ira iji mesese.

SALM 112.

1 Aleluia. Et mun ahis moij a natimi ineig et imtitai Ihova aien, um imiacitak alupas intas alep o un.

2 Erupu esjilid a ilpu mapon an nobohtan : erupu ahes moij a ilpu atimi upene.

3 Etpu amen anli neom o un naga im niiji itai upene : etpu lep amen nedo upene o un ira iji mesese.

4 Et aridjai inlah an naupat va ilpu atimi upene : era upene ara um aiheuc alupas vai atimi, um atoh nedo ura.

5 Et ago nedo aiheuc vai atimi a natimi upene, um alupai ilpu atimi ugni itai ; et arapakau nedo o un vai niiji itai o un.

6 Inyi idim eti amaamai aien ira iji mesese : uhpu imiehva ilpu atimi upene ira iji mesese.

7 Inyi ti imtitaig intas has aien : et amen aktit inliinmopon aien, um asgeig irai Ihova.

8 Et emda inliinmopon aien, inyi ti imtitaig aien, um imihum pan an naopan yehki etpu almoi aien nitai merit o un irai ilpu atimi tak atimi iran.

9 Et eduoraprap itai aien, et alupai ilpu ihki atimi itai aien ; et amen nedo atoh o un ira iji mesese ; etpu aridjai nemda esjilid o un.

10 Erupu almoi a ilpu atimi auatatimi, um edemda vaig : etpu aktitit neijin aien, ja pah mas : etpu ti nitai merit o ilpu atimi auatatimi.

SALM 113.

1 Aleluia. Akumu imiahpas yin aijaua, ak ilpu aheca o Ihova, imiahpas nidai Ihova.

2 Naaurineig vai nidai Ihova an naopan ineig um yet pan ira iji adiat.

3 Uhmu imiahpas nidai Ihova an ridjai o un um yet pan an nette o un.

4 Et esjilid a Ihova ira iji pece asega, et lep esjilid natimi alupas o un irai ohatag.

5 Et idivaig Ihova Atua uja a di? et amen ijinies aien,

6 Et asuol aien par almoi niiji itai an nohatag im lep an nobohtan :

7 Et imiaridjai ilpu atimi upoupo aien an nobohtan, et alcacse jai ilpu ihki atimi aien an nuarin u nohok ;

8 Va etpu ikni ra aien ehele ilpu atimarid, ilpu atimarid o atimi marom.

9 Et ika aien yi risi ilpu hal o un um imiacitak a intakata eti asvalav anli neom. Aleluia.

SALM 114.

1 Eris wat ahes Ijipt a nupu Isreel, um lep ahes ehele nup auoh intas is eche a ilpu mapoi Jakob ;

2 Eris itaup vai yin a ilpu mapoi Juta, is lep atimarid irai upu Isreel aien.

3 Is ecetai injop um aha : is lep adumoij nofowai Jortan.

4 Is aleaujai niiji edoon et idivaig siip atamaig, im niiji edoon aklin et idivaig inhakli siip.

5 Is auri injop par aha? im nofowai Jortan par adumoij?

6 Im niiji edoon par aleaujai et idivaig siip atamaig ; im niiji edoon tintin, et idivaig inhakli siip :

7 Etmu ucjucjucaig nobohtan an nuhup o Ihova, an nuhup o Atua o Jakob ;

8 Is ika yi etpen wai inhehteuc im lep inwai ahlau ohua jai inhetme.

SALM 115.

1 Uhmü jim imiahpas cama, ak Ihova, jam imiahpas nidam ache, va naiheuc unyum im intas inivaijec unyum.

2 Era auri a ilpu atimi aupat par ika, Atua ura yeuc eda?

3 Ja et amen a Atua unyima an nohatag : is ago nedo asega ineigki aien is upene iran.

4 Et silver im colt natmasimai ura, nauritai ira ikma atimi.

5 Et eteuc nipjineucsera, ja era eti tas ara : et eteuc nesganimtara, ja era eti alum itai ara :

6 Et eteuc intikgara, ja era eti ahge itai ara : et eteuc ingedjera, ja era eti ipni itai ara :

7 Et eteuc nikmara, ja era eti ubli itai ara, et eteuc neduora, ja era eti atga ara : era eti tas ara irai hujgopul ura.

8 Era idivai ra a ilpu atimi ago ra : im lep ra asega era asgeig ira ra ara.

9 Ak nupu Isreel, akumu asgeig irai Ihova aijaua : et atau imi ra aien um imiatamaig ra.

10 Ak ilpu mapoi Eron, akumu asgeig irai Ihova aijaua : et atau imi ra aien um imiatamaig ra.

11 Ak ilpu atimi imtitai Ihova, aijaua : et atau imi ra aien um imiatamaig ra.

12 Is aktaktai caija a Ihova ; etpu asan tas upene vai caija aien, etpu asan tas upene vai nupu Isreel aien ; etpu asan tas upene vai ilpu mapoi Eron aien.

13 Etpu asan tas upene aien vai ra era imtitai Ihova ara, ilpu ihki atimi im ilpu atimi alupas.

14 Etpu ika a Ihova mika aki ahinag aijaua, im lep ilpu hal unyimia.

15 Eka mun ahis moij aijaua vai

Ihova ineig is ago nohatag aien im nobohtan.

16 Et ohuun nohatag ijiuies acen a Ihova ; ja is alupai atimi nobohtan aien.

17 Era eti imiahpas Ihova a ilpu atimi ememas, im lep ra asega era asuol se anli nehpanitai ara :

18 Ja intumu imiahpas Ihova akaija an naopan ineig um yet pan ira iji mesese. Aleluia.

SALM 116.

1 Et aiyu inliinmopok ainyak vai Ihova va nedo o un nikavaig, is atahajeg nohrak aien im intas ugni unyak.

2 Um atgaig pam intikgan ehelek va nitai ineigki ekpu ahlaig vai yin ainyak ira iji adiat irak.

3 Is arahed irak inwau an mas ; is apol irak nohacred ira uma atmas : kis ato nohacred ainyak im nerec inman irak.

4 Ja kis ahlaig ainyak vai nidai Ihova ; ek ugni eucainyak, ak Ihova, mika an imiatamaig nyak aiek.

5 Et upene a Ihova um atoh nedo o un ; et idim aiheuc vai atimi a Atua uja.

6 Et aminjinaig ilpu atimi eclim amen a Atua ; eris imiasuol nyak, ja is atau imi nyak aien.

7 Etmu lep eropse inliinmopok ainyak ; is idim ago nedo upene vai nyak a Ihova

8 As immiatmaig nyak aiek va inmas, im nesganimtak va intaig, im neduok va nebehtau vaig.

9 Ekpu atga ainyak an nuhup o ilpu atimi umumoh.

10 Kis imiisjis ninivaijec ainyak va nitai ineigki kis tas ainyak : kis ohacred alupas ainyak.

11 Kis auroauro ainyak um ika era asan tas ahcil natimi asega.

12 Ekpu alupai Ihova inhe ain-

SALM, 117, 118.

nyak, va nedo upene asega o un vai nyak?

13 Ekpu leh nipjinitai ainyak va nimiatamaig nyak, um ahlaig vai nidai Ihova.

14 Ekpu ehgeijid intas up yi asaig unyak ainyak an nuhup o ilpu atimi o un asega.

15 Et itai esjilid an nuhup o Ihova inmas o ilpu atimi upene o un.

16 Ak Ihova, ek idim naheca unyum ainyak; ek naheca unyum ainyak, im inhal o naheca atahaig unyum; as aihyi nitai arore nyak aiek.

17 Ekpu ahlap vai euc ainyak an nitai ahlap naaurineig, um ahlaig vai nilai Ihova.

18 Ekpu ehgeijid intas up yi asaig unyak ainyak ehele Ihova, an nuhup o ilpu atimi o un asega,

19 Anli nikaro an neom o Ihova, an nuarin juju iram, ak Jerusalem. Aleluia.

SALM 117.

1 Akumu imiahpas Atua aijaua, ak nup ira iji pece asega: akumu imiahpas yin aijaua, ak nup iran pece asega.

2 Et esjilid acen naiheuc o un vai caija: et amen nedo inivaijec o Ihova ira iji mesese. Aleluia.

SALM 118.

1 Ago naaurineig vai Ihova: et idim upene aien; et amen naiheuc o un ira iji mesese.

2 Erumu ika a nupu Isreel, et amen naiheuc o un ira iji mesese.

3 Erumu ika a ilpu mapoi Eron, et amen naiheuc o un ira iji mesese.

4 Erumu ika a ilpu atimi imtitai Ihova, et amen naiheuc o un ira iji mesese.

5 Kis ahlaig vai Ihova ainyak an nohacred unyak: is adai intas

unyak a Ihova um ati nyak an nuarin alupas.

6 Et amen ehelek a Ihova; inki ti imtitaig ainyak: erupu ago inhe vai nyak natimi?

7 Et amen ehelek a Ihova tup ethi pan irai ilpu atimi atau imi nyak: va nitai ineigki ekpu almoi nitai merit unyak ainyak ira ilpu atimi amcel vai nyak.

8 Et upene par asgeig irai Ihova, jam eti upene nasgeig ira atimi vaig.

9 Et upene par asgeig irai Ihova, jam eti upene nasgeig ira ilpu atimarid vaig.

10 Eris arahed irak a nup ira iji pece asega: ja ekpu auahas ra ainyak an nidai Ihova.

11 Eris arahed irak ara; eris arahed irak ara; ja ekpu auahas ra ainyak an nidai Ihova.

12 Eris arahed irak ara et idivaig impak irai bii; eris ahni ra et idivaig incop an nefelelicai: ekpu idim auahas ra ainyak an nidai Ihova.

13 As aticei pan emda nyak aiek va ekpu eropse ainyak: ja is imiatamaig nyak a Ihova.

14 Et nemda unyak a Ihova im nohranilai unyak, et lep imiatamaig nyak aien.

15 Et amen nohrara imiacitak va nimiatamaig ra irai li eom atga o ilpu atimi upene: et auritai emda a Ihova an matan.

16 Et mun adaigjai inmatan a Ihova: et auritai emda a Ihova an matan.

17 Inki ti mas ainyak, jam umoh, um asuptcnaig nauritai o Ihova.

18 Is ated emda nyak a Ihova; ja is eti ati nyak aien mika ki mas ainyak.

19 Asalage vai nyak intapanes o ilpu atimi upene; ekpu atga iran ainyak, ekpu lep imiahpas Ihova ainyak:

20 Intapanes o Ihova ineig, erupu atga irau a ilpu atimi upene.

SALM, 119.

21 Ekpu imiahpas euc ainyak : as atahajjeg intas unyak aiek, um imi-atamaig nyak.

22 Inhat ineig eris ude a ilpu atimi uctaig neom, et hat esjilid ineigki an nesvi va neom.

23 Nedo o Ihova ineigki : et lep itai imiali an nuhup uja.

24 Nadiat ineigki is ago a Ihova ; ecrupu imiacitak akaija um cediaig iran.

25 Ak Ihova, ek ugni euc ainyak mika an imiatamaig nyak aiek : ak Ihova, ek ugni euc ainyak mika ki amen upene ainyak.

26 Et mun ahis moij aien et ham aien an nidai Ihova : ecra asan tas ces yi aloai vai caua aijama anli neom o Ihova.

27 Et Atua a Ihova, is ehvaig inlah ehelaija aien ; arore nitai ahlap an wau irai ibat an nataau.

28 Na Atua unyak aiek, ekpu ago naaurineig vai euc ainyak : na Atua unyak aiek ekpu imiahpas euc ainyak.

29 Ago naaurineig vai Ihova ; et idim upene aien, et amen naiheuc o un ira iji mesese.

SALM 119.

1 Era mun ahis moij ara sji eigki et upene asega nedo ura, era lep atga ara an tas o Ihova.

2 Era mun ahis moij ara sji eigki era apos intas asuptecnaig o un ara ; um ahilek yin anliinmopura asega.

3 Era lep eti ago tah nedo has ara, jam ahced nefalaig o un.

4 As asaig aiek mika ecri imiaiji upene intas alep unyum aijama.

5 Ek idim merit ainyak mika yi emda inliinmopok ainyak par apos nedo unyum !

6 Inki eti lep ehcamai ainyak, ekuit aktaktai intas alep asega unyum ainyak.

7 Ekpu ago naaurineig vai euc ainyak, uhuit esege imtak nedo atoh asega unyum.

8 Ekpu apos nedo unyum ainyak : namu jim ude nyak aiek.

9 Etpu upene nedo o un tah intakuras vanhe ?

10 Kis ahilek euc ainyak anliinmopok asega : ekmu jim ude intas alep unyum ainyak.

11 Kis adinaig intas unyum anliinmopok ainyak va ki jim ago nedo has ainyak, vai ki jim ago nedo has ainyak vai euc.

12 Naaurineig, ak Ihova ; esege intak nedo unyum.

13 Kis asuptecnaig an nipjineucsek ainyak intas asega as asaig aiek.

14 Ek imiacitak nedo ineig ainyak as asuptecnaig aiek, et idivaig inpadiaig asega.

15 Ekpu aktaktai intas alep unyum ainyak, um ahced nefalaig unyum.

16 Ekpu imiacitak nedo unyum ainyak : inki ti ahnag an tas unyum ainyak.

17 Namu aiheuc vai naheca unyum aiek, va ekpu umoh ainyak, um apos intas unyum.

18 Namu asalage nesganimtak aiek, va ekpu almoi niji itai imiali ainyak an tas alep unyum.

19 Ek atimi amen ehcid an no-bohtan anyak ; jim adinaig intas alep unyum vai nyak.

20 Et mas inliinmopok ainyak vai inmerit alupas o un va intas unyum.

21 As ated ilpu atimi auatatimi aiek, etpu lep erek inman ira ilpu atimi ahnag an tas alep unyum.

22 Atipagki intas has vai nyak, im intas edemda ; kis idim apos intas asuptecnaig unyum ainyak.

23 Eris ateuc a ilpu atimi alupas um tas vai nyak : ja is aktaktai

intas alep unyum a naheca unyum.

24 Ek imiacitak intas asuptecnaig unyum ainyak, er lep ated nyak iran.

25 Et apol an nobohtan inliinmopok ainyak : namu imiatamumoh nyak aiek et idivaig intas unyum.

26 Kis asuptecnaig nedo nyak ainyak, as lep atahajjeg intas nyak aiek : esege imtak nedo unyum.

27 Namu ehvaig ehelek aiek nesgan tas an tas alep unyum : ja ekpu tas ainyak va niji auritai imiali unyum.

28 Et auatialidi inliinmopok ainyak va nohacred nyak : namu ago emda nyak aiek et idivaig intas unyum.

29 Etmu itac acen vai nyak nedo ahcil : namu lep alupai nyak intas alep unyum aiek an tup naiheuc unyum.

30 Kis merit va nedo inivaijec ainyak : kis ati nedo unyum an nuhup nyak ainyak.

31 Kis apol an tas asuptecnaig unyum ainyak : ak Ihova, ekmu jim ehcamai ainyak.

32 Ekpu auroauro ainyak um imiaiji intas alep unyum, nauit ago emda inliinmopok aiek.

33 Ak Ihova, esege imtak nedo unyum, ekpu lep apol iran ainyak um eti adumoij o un.

34 Alupai nyak inliinmopok ato itai, ekpu lep apos intas unyum ainyak anliinmopok asega.

35 Atau irak an nefalaig as asaig aiek ; ek idim imiacitak nitai ineigki ainyak.

36 Namu aihiaig pam inliinmopok aiek u intas asuptecnaig unyum ; um jim aihiaig pan u nitai merit has.

37 Namu ahidaig pan nesganimitak aiek va ki jim almoi intakitai ainyak ; um imiatamumoh nyak an nefalaig.

38 Namu ehnejid intas unyum aiek ehele naheca unyum, va uhpu imtitai euc.

39 Namu atipagki nitai ehcamai unyak ek imtitaig vaig ainyak : et idim upene nedo unyum.

40 Kis idim ahvig intas alep unyum ainyak ; namu imiatamumoh nyak aiek an nedo atoh unyum.

41 Ak Ihova, etmu lep yet pam ehelek naiheue unyum, niji itai imiatamaig nyak unyum marom, ak Ihova et idivaig intas unyum.

42 Va ekpu tas ainyak ehelen et atuh nyak aien ; ek idim asgeig an tas unyum ainyak.

43 Um jim atipagki asega intas inivaijec an nipjineucsek : kis idim aijnaig nedo ated atimi unyum ainyak.

44 Ja ekpu apos intas unyum ainyak um eti atumop ira iji adiat.

45 Ekpu lep atga an nuarin lah ainyak : ek idim ahilek intas unyum ainyak.

46 Ekpu tas ainyak va intas asuptecnaig unyum an nuhup o ilpu atimarid, jam eti ehcamai.

47 Ekpu lep imiacitak intas alep unyum ainyak, et aiyu inliinmopok ainyak vaig.

48 Ekpu lep adaigjai nikmak ainyak u intas alep unyum, et aiyu inliinmopok ainyak vaig ; ekpu lep aktaktai intas alep unyum ainyak.

49 Namu imiehva intas unyum aiek ehele naheca unyum, kis asgeig iran ainyak.

50 Nitai imiacitak nyak ineigki, an nohacred unyak ; is idim imiatamumoh nyak intas unyum.

51 Era imiafak ahcil nyak a ilpu atimi auatatimi ; ja ek eti ahnag irai tas alep unyum ainyak.

52 Ek imiehva nedo unyum itu acen ainyak, ak Ihova ; et lep imiacitak inliinmopok ainyak.

53 Et ucjucjucaij alupas inliinmopok ainyak va nedo o ilpu atimi auatatimi era ahnag irai tas alep unyum ara.

54 Kis acesaces nohrai itai ainyak irai tas alep unyum an nuarin ineig, kis amen ehced iran ainyak.

55 Ak Ihova, ek imiehva nidam ainyak an nepeg, um apos intas alep unyum.

56 Is idim ucce, va nedo unyak nikavaig, kis apos intas alep unyum ainyak.

57 Ak Ihova, Nai hadek aiek : kis ika ainyak ekpu apos intas unyum ainyak.

58 Kis ugni naiheuc unyum ainyak anliinmopok asega : namu aiheuc vai nyak aiek et idivaig intas unyum.

59 Kis aktaktai nedo unyak ainyak, um adumoij pau o intas alep unyum.

60 Kis auroauro ainyak, um eti atomop par imiaiji intas alep unyum.

61 Is arahed irak nopoig o ilpu atimi auatatimi ; ja kis eti imiehva intas alep unyum ainyak.

62 Ekpu aiji ainyak an nijihgan nepeg um ago naaurineig vai euc va nedo atoh unyum.

63 Ek etoai ra sji eigki ainyak era imtitai euc ara, im lep ra era apos intas alep unyum ara.

64 Ak Ihova, et ohua naiheuc unyum an nobohtan : esege imtak intas alep unyum.

65 Ak Ihova, as ago nedo upene aiek vai naheca unyum, et idivaig intas unyum.

66 Esege imtak mika ki aktaktai upene ainyak um ato itai : kis idim imiisjis ninivaijec intas alep unyum ainyak.

67 Kis ahnag ainyak an naopan yehki kis eti fi ohacred ainyak : ja ek apos intas unyum ainyak an naopan ineig.

68 Na upene aiek um lep ago nedo upene : esege imtak intas alep unyum.

69 Eris athai intas ahcil vai nyak a ilpu atimi auatatimi : ja ekpu apos intas alep unyum ainyak anliinmopok asega.

70 Et agnyiv inliinmopura ara et idivaig nagako ; ja ek imiacitak intas alep unyum ainyak.

71 Et upene vai nyak mika ki ohacred ainyak : va ekpu ato intas alep unyum ainyak.

72 Et upene irak intas et ahes an nipjineucsum irai colt im silver et ahinag.

73 As ago nyak an nobohtan aiek um ati nyak : alupai nyak inliinmopok aktaktai itai mika ki ato intas alep unyum ainyak.

74 Erupu imiacitak ara sji eigki era imtitai euc ara eruit ecet nyak ara ; kis idim asgeig an tas unyum ainyak.

75 Ak Ihova, ek ato ainyak mika et atoh nedo unyum, as lep ati nohacred irak aiek an nedo imivaijec unyum.

76 Etmu imiacitak inliinmopok ainyak va naiheuc unyum, et idivaig intas unyum ehele naheca unyum.

77 Etmu yet pam ehelek naiheuc unyum va ekpu umoh ainyak : ek imiacitak intas alep unyum ainyak.

78 Erumu ehcamai a ilpu atimi auatatimi ; eris ispara ago nedo has vai nyak ara : ja ekpu aktaktai intas alep unyum ainyak.

79 Erumu adumoij pam ehelek ara sji eigki era imtitai euc ara, im lep ra era ato intas asuptecnaig unyum ara.

80 Etmu atoh inliinmopok ainyak an tas alep unyum, va ki jim ehcamai ainyak.

81 Et mas inliinmopok ainyak va nitai imiatamaig nyak unyum ; ja ek asgeig an tas unyum ainyak.

82 Et auatialidi nesganimtak ain-

yak va intas unyum, Ek ika ainyak, napu aiheuc vai nyak aiek an nahopan?

83 Ek idivaig inhubej arasi itai ainyak an nadran cop, ja ek imiehva intas alep unyum ainyak.

84 Inyi ehed nadiat irai naheca unyum? napu aru nedo o ilpu atimi atmas vai nyak aiek an nahopan?

85 Eris ucji ehpai itai vai nyak a ilpu atimi auatatimi, era eti apos intas alep unyum ara.

86 Et inivaijec intas alep asega unyum: era ago nedo has vai nyak ara an nefafa ura; namu atau imi nyak aiek.

87 Eris ubutpotet ara u nauahas nyak vaig an pece; ja kis eti ude intas unyum ainyak.

88 Namu imiatamumoh nyak aiek et idivaig naiheuc unyum; ekpu lep apos intas asuptecnaig ainyak et ahes an nipjineucsum.

89 Ak Ihova, et amen aktit intas unyum an nohatag irai iji adiat.

90 Et inivaijec nedo unyum irai iji mesese: as ati nobohtan aiek, et lep amen aktit.

91 Et eteuc an naopan ineig va intas unyum: et lep aheca unyum niji itai asega.

92 El ekis eti imiacitak intas alep unyum ainyak, el ekis mas ainyak va nohacred unyak.

93 Inki imiehva intas alep unyum ainyak ira iji mesese: as imiatamumoh nyak aiek iran.

94 Ek atimi unyum ainyak, namu imiatamaig nyak aiek: kis ahilek intas alep unyum ainyak.

95 Eris atpoijnaig nyak a ilpu atimi auatatimi par auahas nyak: ja ekpu aktaktai intas asuptecnaig unyum ainyak.

96 Ek ato inupene u itai asega ainyak: ja et esjilid acen intas alep unyum.

97 Et aiyu alupas inliinmopok

ainyak vai intas alep unyum! ek aktaktai ainyak ira adiat asega.

98 Et esjilid narapakau unyak ira arapakau o ilpu atimi tak atimi irak va intas alep unyum: et amen ehelek irai iji adiat.

99 Ek esjilid ainyak va nato itai unyak irai ilpu atimi esege imtak asega: ek idim aktaktai intas alep unyum ainyak.

100 Ek esjilid ainyak va nato itai unyak irai ilpu atimi itu acen, ek idim apos intas alep unyum ainyak.

101 Kis aminjinaig neduok ainyak va nedo has asega, va ekpu apos intas unyum ainyak.

102 Kis eti ude nedo unyum ainyak: as idim esege imtak aiek.

103 Et idim adale intas unyum ek wat atemtem iran ainyak: et esjilid nadale iran irai hune an nipjineucsek

104 Ek ato itai ainyak va intas alep unyum: vi nitai ineigki ek amcel vai nedo efaifa asega ainyak.

105 Et lamp uri neduok intas unyum, et lep itailah va nefalaig unyak.

106 Kis up yi asaig ainyak mika ekpu apos nedo upene ainyak as asaig aiek, ekpu lep ehnejid ainyak.

107 Ek ohacred alupas ainyak, ak Ihova, namu imiatamumoh nyak aiek, et idivaig intas unyum.

108 Ek ugni euc ainyak, ak Ihova mika etmu upene iram niji itai ahlap et ispan ahes an nipjineucsek, um esege imtak nedo unyum.

109 Et amen nitai umoh iran unyak an nikmak irai iji adiat; ja ek et. ahnag irai tas alep unyum ainyak.

110 Eris ati nopoig vai nyak a ilpu atimi auatatimi: ja kis eti ude intas alep unyum ainyak.

111 Kis leh intas alep unyum ainyak um apol iran irai iji mesese; et lep imiacitak inliinmopok ainyak vaig.

112 Kis ika inliinmopok ainyak ki imiaiji intas alep unyum ainyak irai iji adiat, im niji mesese.

SALM, 119.

113 Ek amcel vai naktaktai has ainyak, ja et aiyu inliinmopok ainyak vai intas alep unyum.

114 Na uarin adinaig unyak aiek, im nitai atapen unyak; ek aijnaig intas unyum ainyak.

115 Akumu ude nyak aijaua ak ilpu atimi auatatimi: ekpu idim imi-aiji intas alep o Atua unyak ainyak.

116 Namu atau imi nyak aiek et idivaig intas unyum, va ekpu umoh ainyak: ekmu jim lep ehcamai ainyak va inliinmopok asgeig iram.

117 Namu asjirai nyak aiek va ekpu umoh ainyak; ekpu lep aktaktai intas alep unyum ainyak irai iji adiat.

118 Na amcel vai ra sji eigki asega aiek, era ahnag irai tas alep unyum ara: et ahcil nedo efaifa ura.

119 Na iknipagki ilpu atimi auatatimi an nobohtan aiek et idivaig nohok va nitai ineigki et aiyu inliinmopok ainyak va intas unyum.

120 Et ucjucjucaij nohuk ainyak um imtitaig euc, ek lep imtitaig ainyak va nedo ated atimi unyum.

121 Kis ago nedo atoh ainyak im nedo upene; jim aticijai nyak imi ilpu atimi ago nedo has vai nyak.

122 Namu atau imi naheca unyum aiek, va ekpu amen upene ainyak; erumu jim ago nedo has vai nyak a ilpu atimi auatatimi.

123 Et aupat nesganimtak ainyak va najnaig nitai imiatamaig nyak unyum in intas upene unyum.

124 Ago nedo upene vai naheca unyum et idivaig naiheuc unyum, um esege imtak intas alep unyum.

125 Ek aheca unyum ainyak; namu alupai nyak inliinmopok ato itai aiek, mika ki ato intas unyum ainyak.

126 Naopan auritai unyum, ak Iho-va; era auahas intas alep unyum ara.

127 Va nitai ineigki, et esjilid naiyu u inliinmopok ainyak vai intas alep unyum ira colt, colt upene marom.

128 Va nitai ineigki ek ika ainyak et upene intas alep asega unyum va niji itai asega, ek lep amcel vai nedo efaifa asega ainyak.

129 Et itai imiali intas asuptecnaig unyum: et lep amen auliinmopok.

130 Et eteuc inlah va nesege intas unyum: era lep ato itai vaig a ilpu atimi aupat.

131 Kis asalage nipjineucsek ainyak um mopmop; kis idim ahvig intas alep unyum ainyak.

132 Namu alum nyak aiek, um aiheuc vai nyak, et idivaig nedo unyum va ra sji eigki, et aiyu inliinmopura ara vai nidam.

133 Namu asjaaicnaig ehelek an nefalaig unyum aiek irai tas unyum: etmu jim lep esjilid irak tah nedo has.

134 Imiatamaig nyak va nedo ipjin o atimi; ekpu lep apos intas alep unyum ainyak.

135 Etmu upene nesganimtak aiek vai naheca unyum; um esege imtak intas alep unyum.

136 Et yah nidi imtak et idivaig nofowai, va nedo ura nikavaig era eti apos intas alep unyum ara.

137 Ak Iho-va, na upene aiek: et lep atoh nedo ated atimi unyum.

138 Et upene intas alep unyum as asaig aiek, et lep inivaijec.

139 Ek mas ainyak va nitai merit emda unyak, era idim eti imiehva intas unyum a ilpu atimi tak atimi irak.

140 Et upene acen intas unyum: va nitai ineigki et ahvig a naheca unyum.

141 Ek aclin ainyak er lep amcel vai nyak: ja ek eti ahnag irai tas alep unyum ainyak.

142 Et upene nedo atoh unyum irai iji mesese, et lep inivaijec intas alep unyum.

143 Et erek inman irak ainyak um ohacred alupas: ja et imiacitak in-

tas alep unyum inliinmopok ainyak.

144 Et atoh intas asuptecnaig unyum irai iji mesese: alupai nyak inliinmopok ato itai va ekpu umoh ainyak.

145 Kis ahlaig ainyak anliinmopok asega; ak Ihova, atahaijeg intas unyak; ekpu apos intas alep unyum ainyak.

146 Kis ahlaig vai euc ainyak; imiatamaig nyak aiek, ekpu lep apos intas asuptecnaig unyum ainyak.

147 Kis ahlaig vai euc ainyak, ja is par ahrareu nepeg: kis asgeig an tas unyum ainyak.

148 Ek up yi hup ainyak um aiji lahlah, ja et par apitac niji uari epeg ek imigaiji ainyak, mika ki aktaktai intas unyum ainyak.

149 Atahaijeg nohrak, et idivaig naiheuc unyum: ak Ihova, namu imiatamumoh nyak aiek et idivaig intas unyum.

150 Era ubutpotet a ilpu atimi ahilek nedo has: era itac acen u intas alep unyum ara.

151 Na ubutpotet aiek, ak Ihova; et lep inivaijec intas alep asega unyum.

152 Kis ato ainyak itu acen mika as ati intas alep unyum aiek mika yi amen aktit ira iji mesese.

153 Namu aktaktai nohacred unyak aiek, um imiatamaig nyak: ek idim imiehva intas alep unyum ainyak.

154 Aiheuc vai nyak um imiatamaig nyak: imiatamumoh nyak et idivaig intas unyum.

155 Et itac acen vai ilpu atimi auatatimi nitai imiatamaig ra: era eti ahilek intas alep unyum ara.

156 Ak Ihova, et esjilid nedo aiheuc unyum: imiatamumoh nyak et idivaig intas unyum.

157 Era ahinag a ilpu atimi atmas piv vai nyak im ilpu atimi tak atimi

irak; ja ek eti adumoij u intas alep unyum ainyak.

158 Kis alum ilpu atimi imipalea ainyak, um ohacred; era eti apos intas unyum ara.

159 Aktaktai naiyu u inliinmopok vai intas alep unyum: ak Ihova, imiatamumoh nyak, et idivaig naiheuc unyum.

160 Is inivaijec intas unyum itu acen um imihum pam an naopan ineig: et lep amen aktit intas atoh asega unyum.

161 Eris ispara edemda va nyak a ilpu atimi alupas: ja et imtitaig intas alep unyum inliinmopok ainyak.

162 Ek imiacitak intas unyum ainyak, et idivaig tah et ecetai impadiaig alupas aien.

163 Ek amcel vai intas ahcil ainyak um esjum vaig: ja et aiyu inliinmopok ainyak vai intas alep unyum.

164 Ek eceseven imiahpas euc ainyak ira iji adiat va nedo atoh unyum.

165 Et esjilid neigpa ura et aiyu inliinmopura era vai intas alep unyum: et ti nitai ebehtau ura.

166 Ak Ihova, kis aijnaig nitai imiatamaig nyak unyum ainyak, um imiaiji intas alep unyum.

167 Et apos intas alep unyum inliinmopok ainyak; et lep aiyu alupas inliinmopok ainyak vaig.

168 Kis apos intas alep unyum ainyak im intas asuptecnaig unyum; et eteuc nedo asega unyak an nuhup unyum.

169 Ak Ihova, etmu aridjai nahlaig unyak an nuhup unyum: alupai nyak narapakau, et idivaig intas unyum.

170 Etmu aridjai intas ugni unyak an nuhup unyum; um imiatamaig nyak et idivaig intas unyum.

171 Etpu ahlaua intas imiahpas an nipjineucsek, naut esege imtak intas alep unyum aiek.

SALM, 120, 121, 122, 123.

172 Etpu ahes intas unyum an nipjineucsek : et idim atoh intas alep asega unyum.

173 Namu atau imi nyak aiek ; kis apos intas alep unyum ainyak.

174 Kis aijgaig nitai imiatamaig unyum ainyak, ak Ihova ; ek lep imiacitak intas alep unyum ainyak.

175 Ekmu umoh ainyak, va ekpu imiahpas euc ainyak ; namu lep atau imi nyak aiek an nedo unyum.

176 Kis ahnag ainyak et idivaig siip ahnag ; ahilek naheca unyum ; ek imiehva intas alep unyum ainyak.

SALM 120.

1 Kis ahlaig vai Ihova ainyak an nohacred unyak, is atahajeg intas unyak aien.

2 Ak Ihova, namu imiatamaig nyak aiek va intas ahcil im intas efaifa.

3 Etpu aru iram inhe aien ? etpu lep ago inhe iram aien, ak natimi asan tas ahcil ?

4 Nidji afana arig o ilpu atimi emda marom, im lep inhumla irai ritem.

5 Kaiheuc vai nyak ! ek amen Misesek ainyak, ek lep amen ainyak ira iji eom atga Kitar !

6 Kis amen ainyak is itu irak ehelen et amcel vai neigpa aien.

7 Ek atimi eigpa ainyak, ja ekuit tas ainyak era asaig nedoa ara.

SALM 121.

1 Ekpu yiasji pan ainyak irai iji edoon, et ahes iran nitai atau imi nyak.

2 Et ahes ehele Ihova nitai atau imi nyak, is ago nohatag aien im nobohtan.

3 Etpu ika aien yi jim ebehtau neduom : inyi ti umjeg aien et aminjinai euc aien.

4 Inyi idim eti imtate um umjeg aien et aminjuaig nupu Isreel aien.

5 Et aminjinai euc a Ihova : et aiyu iram a Ihova an matam.

6 Inyi ti auad euc nagesega an nadiat ; im lep inmohouc an nepeg.

7 Etpu aminjinai euc a Ihova va niji itai has asega : etpu aminjuaig nesgam aien.

8 Etpu aminjuaig napan vaig unyum aien im napam vaig unyum, an naopan ineig, um yet pan ira iji mesese.

SALM 122.

1 Kis imiacitak ainyak eris wat ika ehelek ara, Intumu apan akaija anli neom o Ihova.

2 Ak Jerusalem, etpu aiji neduoi ja anli neucse nathatahau unyum.

3 Eris uctaig niji eom Jerusalem, eris idim uctaig upene :

4 Era apan eahki a ilpu atimi o Ihova, va intas alep ehele nupu Isreel, par ago naaurineig vai nidai Ihova.

5 Et amen eahki dorona eh tas alep iran, dorona o ilpu atimi ehpan irai Tevit.

6 Akumu ugni Atua aijaua mika yi amen neigpa Jerusalem : erupu amen upene ara sji eigki et aiyu inliinmopura ara vai euc.

7 Etmu amen neigpa anli nathatahau unyum, im niji itai upene irai li emnem atimi unyum.

8 Ekpu ika ainyak vai ilpu etoak im ilpu apapa unyak, Etmu amen neigpa iram.

9 Ekpu ugni Atua ainyak mika an upene aiek va neom o Ihova Atua uja.

SALM 123.

1 Ekpu yiasji pan ehelum ainyak, ak Atua an nohatag.

2 Et idivaig era almoi nikmai ilpu atimi alupas ura a ilpu aheca ura, et idivaig et lep almoi nikmai natimi alupas o un a naheca atahaig o un ; et um ucco et almoi Ihova Atua uja nesganimtaija um yet pan

SALM, 124, 125, 126, 127.

an naopan yehki etpu aiheuc vai caija aien.

3 Aiheuc vai cama aiek, ak Iho-
va, aiheuc vai cama: et esjilid acen
nedemda vai cama.

4 Et gaije acen inliinmopoma
ajama va nedo auatafak ahcil o
ilpu atimi tup amen im namcel vaig
o ilpu atimi ijinies inliinmopura.

SALM 124.

1 Erumu ika a nupu Isreel, el is
eti amen ehelaija a Ihova;

2 El is eti amen ehelaija a Ihova
eris wat atidai vai caija natimi:

3 El eris auroauro ara um atleg
caija, eris wat edemda ara vai caija:

4 El is taluopni pam caija inwai:
el is yet pam iraija inwai yah.

5 El is yet pam iraja inwai es-
jilid.

6 Naaurineig vai Ihova is eti
aticijaig caija aien irai eijera.

7 Er imiatamaig caija et idivaig
inman, va nopoig o natimi ahilek
man: eh mun ahtamud nopog, er
lep imiatamaig caija.

8 Er imiatamaig caija va nidai
Ihova, is ago nohatag aien im no-
bohtan.

SALM 125.

1 Erupu idivaig nedoon Saion
ara asega era asgeig irai Ihova ara,
um eti amaamai, jam amen aktit ira
iji mesese.

2 Et idivaig et arahed Jerusalem
niji edoon, et um ucco et arahed
ilpu atimi o un a Ihova an naopan
ineig um yet pan ira iji mesese.

3 Inyi ti amen se niseo o ilpu
atimi auatatimi ijinies irai ilpu atimi
upene, va eri jim atgeig yi apidi
nikmara u nedo has a ilpu atimi
upene.

4 Ak Ihova, ago nedo upene, vai
ilpu atimi upene, im lep ra et atoh
inliinmopura ara.

5 Ja etpu atai ira ra sji eigki a

Ihova pan irai ilpu atimi auatatimi
era ahidai ra pan ira efalaig acalacal
ara, ja etpu amen neigpa irai upu
Isreel.

SALM 126.

1 Is wat imiadumoj pam nupu
Saion a Ihova eris leuese pan ra,
intis idivaig ilpu atimi umjeg ahnag
akaija.

2 Is ohua inlaav an nipineucsaija,
intis lep acesaces nohranitari akaija:
eris ika ara ehele ilpu atimi aupat,
Is ago niji itai esjilid a Ihova vai
caija.

3 Is ago niji itai esjilid a Ihova
vai caija, inta imiacitak vaig akaija.

4 Ak Ihova, namu lep imiadu-
moij pam ra sji eigki aiek eris
leucse pan ra, et idivaig nauai wai
saud.

5 Erupu alde nohoai itai um
imiacitak ara sji eigki era ahoiag
itai ara jam taig.

6 Aien et apan aien um taig um
apos nupsi itai upene; etpu idim
lep ham aien um imiacitak, um apos
nuhud irai sito.

SALM 127.

1 El et eti uctaig neom a Ihova,
et takitai nauritari o ilpu atimi uc-
taig neom: el eti aminjinaig nuarin
pece a Ihova, el et takitai najilah-
lah vaig o natimi aminjinaig.

2 Et takitai naji vaig an nuhia-
leg im naji lau vaig an jupura; im
nacaig vaig nitai caig er ohacred
vaig; et um ucco et ika aien eri
umjeg a ilpu halav cop o un.

3 Et idim alupas caija ilpu halav
cop o un.

4 Et idivaig nidji afana an nik-
mai natimi emda; era lep ucco a
ilpu halav an takuras uja.

5 Et mun ahis moij a natimi in-
eig et ohua incetpoi nidji afana o
un iran: erupu eti ehcamai ara, ja
erupu tastas ara an neucse nathat-
ahau ehele ilpu atimi tak atimi ira ra.

SALM 128.

1 Era mun ahis moij ara asega era imtitaig Ihova ara; um ahced nefalaig o un.

2 Napu caig nauritai ira ikmam aiek: napu ahis moij aiek, um amen upene.

3 Etpu idivaig vaine a ehgam et ohoai itai upene: erupu lep idivaig inhakli oliv a ilpu halav unyum u inhag unyum.

4 Inyi ahis moij inyi ucce a nati-mi ineig et imtitai Atua aien.

5 Etpu asan tas ces yi aloai Saion a Ihova: napu almoi nitai upene aiek irai Jerusalem ira iji adiat asega iram.

6 Napu idim almoi ilpu mapom, aiek im lep neigpa irai upu Isreel.

SALM 129.

1 Erumu ika a nupu Isreel, eris ecahinag edemda vai nyak ara an halav unyak um imihum pam an naopan ineig:

2 Eris ecahinag edemda vai nyak ara an halav unyak um imihum pam an naopan ineig: ja eris eti imiasuol nyak ara.

3 Eris ahapol an cehek a ilpu atimi ahapol: is abra nahauai ura.

4 Et atoh nedo o Ihova: is ah-tamud inwau o ilpu atimi auatatimi aien.

5 Erumu ehcamai um adumoij a ilpu atimi amcel vai Saion.

6 Erumu idivaig nefelelicai ara ijinies irai eom, er eti fi ateucra ja et imlai:

7 Et eti amen an nikmai natimi ucce nefelelicai; im lep an riti natimi arore nuhud iran.

8 Era eti lep ika a ilpu atimi atga, Etmu amen iramia intas ces yi aloai o Ihova: ecra asan tas ces yi aloai vai caua aijama an nidai Ihova.

SALM 130.

1 Ak Ihova, kis ahlaig vai euc ainyak ira iji uari ubou.

2 Ak Ihova, ahge nohrak: etmu atahaijeg intas ugni unyak intikgam aiek.

3 Ak Ihova, el et asjaaicnaig nedo has unyak aiek, ak Ihova, etpu atidai a di?

4 Ja et amen ehelum nitai iknipa-gki nedo has, va uhpu imiatamai euc.

5 Ek aijnaig Ihova ainyak, et aijnai yin inliinmopok ainyak, ek aijnaig intas o un ainyak.

6 Ek esjilid ainyak par aijnaig Ihova irai ilpu atimi aijnaig nuhia-leg: ilpu atimi aminjinaig nuhiale-g marom.

7 Erumu asgeig irai Ihova a nupu Isreel: et amen naiheuc ehele Ihova, et lep amen alupas ehelen nitai imiatamaig atimi.

8 Etpu imiatamaig nupu Isreel aien va nedo has asega ura.

SALM 131.

1 Ak Ihova, et eti ijinies inliin-mopok ainyak, um eti ijinies nes-ganimtak: ek eti imjijeuc ainyak vai niji itai esjilid, im niji itai ehka vai nyak.

2 Kis ago nedo upoupo ainyak im nedo erop, et idivaig inhalav et mun atetwan yin a risin: et idivaig inhalav er etetwan yin inliinmopok ainyak.

3 Erumu asgeig irai Ihova a nupu Isreel an naopan ineig um yet pan ira iji mesese.

SALM 132.

1 Ak Ihova, namu imiehva Tevit aiek, im nohacred asega o un.

2 Is asan tas aktit o un ehele Ihova aien: um asan tas up asaig o un ehele Atua emda o Jakob.

3 Mika inki idim eti apan ain yak, an neom unyak, um eti apan an nuarin umjeg unyak:

4 Inyi ti umjeg nesganimtak ainyak, um eti aroparop narasiñ nesganimtak,

5 Um imihum pan an naopan yebki ekpu ecetai nuarin imi Ihova ainyak, nuarin amen imi Atua emda o Jakob;

6 Intis atahajjeg vaig Ifreta akaija: intis ecetai akaija an nuarin nobohtan ui cai.

7 Intupu apan akaija irai tabernakel o un, intupu atpuse akaija an nuhup o nitai atijai neduon iran.

8 Ak Ihova, namu atidai aiek um apan an nuarin atumop unyum; aiek, im nelcau esjilid unyum et amen iran intas alep.

9 Erumu aso ra a ilpu atimi ahlap unyum an nedo upene; erumu lep ahlaig ijinies a ilpu atimi upene unyum va nimiacitak ura.

10 Namu jim ahdaig nesganimtan aiek as ati yin aiek va Tevit naheca unyum.

11 Is asan tas aktit um inivaijec o un a Ihova ehele Tevit; inyi ti adumoij o un aien; ekpu ati a dorona unyum ainyak inmapom.

12 El era apos intas etipup unyak a ilpu hal unyum im intas asuptecnaig unyak ekpu esege imi ra ainyak, erupu lep ateuc a dorona unyum a ilpu hal ura ira iji mesese.

13 Is aniv Saion a Ihova, is merit vaig aien par amen iran.

14 Nuarin atumop unyak ineigki ira iji mesese: ekpu amen igcaki ainyak: kis idim merit vaig ainyak.

15 Ekpu ika ainyak yi ahinag nitai caig iran: erupu lep gaije a ilpu ihki atimi iran irai itai helaig.

16 Ekpu aso ilpu atimi ahlap iran ainyak an nitai imiatamaig ra: erupu lep ahlaig ijinies a ilpu atimi upene iran va nimiacitak ura.

17 Ekpu eka ainyak yi esjilid natimi alupas o Tevit: ek mun lep ati incopalahala ainyak vai yin eris aspi yin.

18 Ekpu aso ilpu atimi tak atimi iran ainyak an nehcamai ura: ja etpu amen upene iran korona o un.

SALM 133.

1 Almoi, et idim upene um esjilid, mika yi tup ethi ache. inliinmopoi ilpu raimu!

2 Et idivaig nitai aspi upene an nidjini atimi, is asuol an nalau an nesganimtai Eron; um yet se pan an tid an napelumai o un;

3 Et idivaig nara irai Hermon, is lep asuol irai lola edoon Saion: is asaig nitai upene eahki a Ihova, nitai umoh iran marom ira iji mesese.

SALM 134.

1 Almoi, akumu imiahpas Ihova aijaua, ak ilpu aheca o Ihova asega, eka aiji aijaua anli neom o Ihova an nepeg.

2 Adaig jai nikmamia, an nuarin itaup, um asan tas upene vai Ihova.

3 Etmu asan tas ces yi aloai euc Saion a Ihova is ago nohatag aien im nobohtan.

SALM 135.

1 Akumu imiahpas Ihova aijaua, Akumu imiahpas nidai Ihova aijaua; ak ilpu aheca o Ihova, akumu imiahpas yin aijaua.

2 Ak ilpu atimi aiji anli neom o Ihova, anli nikaro an neom o Atua uja marom.

3 Akumu imiahpas Atua aijaua; et idim upene a Ihova: acesaces nohrai itai vai nidan; et idim upene.

4 Is ehtai Jakob imi yin a Ihova, im lep nupu Isreel mika eri impadiaig esjilid o un ara.

5 Ek idim ato ainyak mika et esjilid a Ihova, et lep esjilid a Ihova uja rai ilpu atua asega.

6 Is ago niji itai asega a Ihova is merit aien an nohatag, im lep an nobohtan, im lep an jop, im lep ira iji uarin ubo.

7 Et ika aien yi aridjai inmosso an nobohtan asega; et ago nauain-

SALM, 136.

apit aien im lep incopda ; et lep ika aien yi ahes nintinjop an nuarin amen iran o un.

8 Is auad inmetto Ijpt aien um atupun ira atimi um yet pan irai iji itai eclim edo irai pece.

9 Is ehvaig niiji itai asjaaicnaig aien im niiji itai imiali an nuhup unyimia, ak nupu Ijpt, irai Fero im lep irai ilpu aheca o un asega.

10 Is auad nup irai pece alupas aien, um atgei ilpu atimarid esjilid ;

11 Saihon natimarid o nupu Emor, im Oc natimarid Besan, im nup ira iji elcau Kenan :

12 Um alupai nupu Isreel inpece ura, mika eri ohuun ara, nitai ohuun o nupu Isreel o un.

13 Ak Ihova, et amen nidam ira iji adiat ; im nitai imiehva euc, ak Ihova, ira iji mesese.

14 Etpu aktaktai ilpu atimi o un a Ihova, etpu lep eche inliinmopon aien vai ilpu aheca o un.

15 Et silver im colt natmasimai o ilpu atimi aupat, nauritai ira ikma atimi.

16 Et eteuc nipjineucsera, ja era eti tas ara ; et eteuc nesganimtara, ja era eti alum itai ara ;

17 Et eteuc intikgara, ja era eti ahge itai ara ; era lep eti umumoh ara.

18 Era idivai ra a ilpu atimi ago ra : im ra asega era asgeig ira ra ara.

19 Akumu imiahpas Atua aijaua, ak nupu Isreel ; akumu imiahpas Ihova aijaua, ak ilpu mapoi Eron :

20 Akumu imiahpas Ihova aijaua, ak ilpu mapoi Livai : akumu imiahpas Ihova aijaua, ak ilpu atimi imtitai yin.

21 Eruunu imiahpas Ihova a nupu Saion, et amen Jerusalem aien. Aleluia.

SALM 136.

1 Naaurineig vai Ihova ; et idim upene aien : et amen naiheuc o un ira iji mesese.

2 Naaurineig vai Atua o ilpu atua, et amen naiheuc o un ira iji mesese.

3 Naaurineig vai Natimarid o ilpu atimarid : et amen naiheuc o un ira iji mesese.

4 Et ago nedo imiali esjilid aien ache : et amen naiheuc o un ira iji mesese.

5 Is ago nohatag aien an nara-pakau o un : et amen naiheuc o un ira iji mesese.

6 Is alage nobohtan aien ijinies irai jop ; et amen naiheuc o un ira iji mesese.

7 Is ago niiji itai lah alupas aien : et amen naiheuc o un ira iji mesese :

8 Nagesega mika yi esjilid an nadiat : et amen naiheuc o un ira iji mesese.

9 Im inmohoc im inmoijeuv mika yi esjilid an nepeg : et amen naiheuc o un ira iji mesese.

10 Is auad Ijpt aien irai inmetto ura : et amen naiheuc o un ira iji mesese.

11 Um iknipagki nupu Isreel ehele ra ; et amen naiheuc o un ira iji mesese :

12 An nikman emda, im nikman is atgeig yi apidi aien : et amen naiheuc o un ira iji mesese.

13 Is atiakoaisjipe Injop cop aien : et amen naiheuc o un ira iji mesese :

14 Um atau irai upu Isreel an niblan jop : et amen naiheuc o un ira iji mesese :

15 Jam erekhaig se Fero im ilpu eucsupo o un an Jop cop : et amen naiheuc o un ira iji mesese.

16 Is atau irai ilpu atimi o un an namas acen aien : et amen naiheuc o un ira iji mesese :

17 Is auad ilpu atimarid esjilid aien : et amen naiheuc o un ira iji mesese :

18 Um atgei ilpu atimarid emda : et amen naiheuc o un ira iji mesese :

19 Saihon natimarid o nupu Emor:

et amen naiheuc o un ira iji mesese.

20 Im Oc natimarid Besan : et amen naiheuc o un ira iji mese-e.

21 Um ahtai inpece ura imi nupu Isreel : et amen naiheuc o un ira iji mesese.

22 Nitai ohuun imi nupu Isreel marom ilpu aheca o un : et amen naiheuc o un ira iji mesese.

23 Is imiehva caija aien an nihkin natimi uja : et amen naiheuc o un ira iji mesese.

24 Is imiatamaig caija aien va ilpu atimi tak atimi iraija : et amen naiheuc o un ira iji mesese.

25 Et alupai niiji itai umumoh asega nitai caig aien : et amen naiheuc o un ira iji mesese.

26 Ago naaurineig vai Atua an nohatag : et amen naiheuc o un ira iji mesese.

SALM 137.

1 Ecris ateuc se u nofowai Babulon aijama ; ecris imiehva Saion aijama um taig acen.

2 Ecris aijeci harp unyima aijama ijinies irai cai karab eahki.

3 Eris merit mika ecri acesaces nohranitai aijama eahki ara sji ehki eris iknipagki caija ara : eris lep ahilek laav ara sji ehki eris atijai nohacred iraija ara, um ika, Akumu acesaces nohranitai irai Saion aijaua.

4 Ecrupu acesaces nohranitai o Ihova aijama an pece oi tak atimi um yet pan an nahopan ?

5 El ek eti imiehva Jerusalem ainyak, etmu eti imiehva namarero o un inmatak.

6 El ek eti imiehva ainyak, etmu apol namak an nipjineucsek : el et eti esjilid nimiacitak Jerusalem unyak ira iji itai asega ek imiacitak vaig ainyak.

7 Ak Ihova, namu imiehva nupu Itom aiek, an nadiat irai Jerusalem ; eris ika ara, Echedeliekse, echedeliekse upene niiji eom iran.

8 Ak inhalav atahaig o Saion, uhpu auahas euc : etmu ahis moij aien etpu aru iram aien yi idivaig as aru irama aiek.

9 Etmu ahis moij aien et leh ilpu halav unyiqnia aien um auad ra irai hat.

SALM 138.

1 Ekpu imiahpas euc ainyak anliinmopok asega : ekpu acesaces nohranitai vai euc ainyak an nuhup o ilpu atua.

2 Ekpu atpuse ainyak u neom ahlap upene unyum, um imiahpas nidam va naiheuc unyum im nedo inivaijec unyum : as idim ati intas unyum aiek mika yi esjilid irai nidam asega.

3 As adai intas unyak aiek an naopan yehki kis ahlaig vai euc ainyak um ago emda inliinmopok.

4 Ak Ihova, erupu imiahpas euc a ilpu atimarid asega an nobohtan, eruit atahaijeg intas an nipjineucsum ara.

5 Erupu idim acesaces nohranitai ara va nedo o Ihova : et idim esjilid natimi alupas o Ihova.

6 Et esjilid a Ihova ja et almoi ilpu atimi ijinies inliinmopura itac acen aien.

7 Ek atga an nohacred ainyak, ja napu imiatamumoh nyak aiek : napu atgeig yi apidi nikmam aiek va intavaitaup o ilpu atimi tak atimi irak, etpu lep imiatamaig nyak inmatam.

8 Etpu ago ehni itai vai nyak a Ihova : ak Ihova, et amen naiheuc unyum ira iji mesese : jim ude nauritai ira ikmam.

SALM 139.

1 Ak Ihova, as ahilek inliinmopok aiek, um ato nyak.

2 Na ato nateuc vaig unyak aiek im natidai vaig unyak, na ato nak-taktai unyak aiek itac acen.

3 Na ahilek natga unyak aiek im

SALM, 140.

nasjeuc unyak, na lep imjijeuc aiek va nedo asega unyak.

4 Ak Ihova, na idim ato upene aiek intas asega an nipjineucsek.

5 Na arahed irak aiek an cehek im lep an nuhup unyak, um atijai nikmam ijinies irak.

6 Et ehka vai nyak narapakau ineig; et esjilid acen, et ehka vai nyak nato vaig.

7 Ekpu aha pan ainyak eda va nesgam? ekpu aha pan ainyak eda va euc?

8 El ek aridjai an nohatag ainyak, namen eahki aiek: el ek ahled intinak ainyak an nuarin ubo, na idim amen eahki aiek.

9 El ek leh nehpan nuhialeg ainyak, um amen an jop itac acen;

10 Etpu idim atau irak eahki nikmam, etpu lep asjiraig nyak inmatam.

11 El ek ika ainyak, Etpu idim taluopni pam nyak naupat; etpu lah nepeg um arahed irak.

12 Et eti aupat vai euc an nepeg; ja et lah nepeg et idivaig nadiat: et tup apapa naupat im inilah an nuhup unyum.

13 As ago nesgak aiek; as adahpoi nyak aiek an nipjinetgai risik.

14 Ekpu naaurineig vai euc ainyak: eris ago nyak an nedo imtitaig im nedo imiali: et itai imiali niji auritai unyum: ek ato upene ainyak.

15 Eris eti adinaig nohuk vai euc, an naopan yehki eris ago nyak an nuarin adinaig, um ahod upene nyak irai uarin ubo an nobohtan.

16 As almoi nupsen nohuk aiek an nesganimtam; eris lep aged niji uari ohuk asega an nitasvitai unyum, eris ago an nitasvitai unyum, eris ago an naopan yehki is eti fi eteuc tah.

17 Ak Atua, et upene acen naktaktai unyum irak! et idim ahinag acen.

18 El ek esvi ainyak, el et ahinag ira nauaihavig: ekuit aijilahlah ainyak, ek amen ehelum ainyak.

19 Ak Atua, napu idim atgei ilpu atimi auatatimi aiek; akumu ude nyak aijaua, ak ilpu atimi atgei atmās.

20 Era asan tas has vai euc ara, era lep tup asaig nidam a ilpu atimi tak atimi iram.

21 Ak Ihova, ek amcel vai ra sji eigki ainyak era amcel vai euc ara: ek lep ohacred ainyak vai ra sji eigki era atidai vai euc ara.

22 Ek idim amcel vai ra ainyak: ek ika ainyak era ilpu atimi tak atimi irak ara.

23 Ak Atua, akilek nyak um ato inliinmopok: alumajidcid nyak um ato naktaktai unyak:

24 Um almoi kit et amen ehelek tah nitai has; um atau irak an nefalaig ira iji mesese.

SALM 140.

1 Ak Ihova, namu imiatamaig nyak aiek va natimi has; aminjinaig nyak va natimi auatatimi;

2 Era aktaktai nedo has anliinmopura ara, era asjapicnaig ara va nedoa ira iji adiat.

3 Era ati neiji namara ara et idivaig nimyiv; et lep amen nitai acen irai asp ithan narasi nipjineucsera. Sela.

4 Ak Ihova, namu aminjinaig nyak aiek va nikmai natimi has; imiatamaig nyak va natimi auatatimi; eris aktaktai ara par auahas natga unyak.

5 Eris adinaig nopoig im inwau vai nyak a ilpu atimi ijinies inliinmopura; eris alage nopoig ara an nahaijen nefalaig, eris lep ati nitai anai nyak iran. Sela.

6 Kis ika ehele Ihova ainyak, Na Atua unyak aiek; ak Ihova: namu atahajeg intas ugni unyak aiek.

7 Ak Ihova Atua unyak, in nenda unyak par imiatamaig nyak, as

adahpoi nidjinek aiek an nadiat o nedoa.

8 Ak Ihova, jim alupai ilpu atimi auatatimi nitai merit ura: jim atau imi ra an nitai merit has ura; va eri jim aridjai ara. Sela.

9 Jam auauo nidjini ra sji eigki era arahed irak ara; etmu adahpoi ra nitai has is ahes an nipjineucsera.

10 Etmu edjose ijinies ira ra inhumla et cas: uhmu erekhaig jai ra an cop; irai li ehpai itai ubo va eri jim lep atidai ara.

11 Etmu jim amen aktit an no-bohtan tah natimi asan tas has: etpu apitac natimi auatatimi nitai has par auahas yin.

12 Ek ato ainyak mika etpu atau imi ilpu atimi ohacred a Ihova, um ago nedo atoh vai ilpu ihki atimi.

13 Erupu idim ago naaurineig vai nidam a ilpu atimi upene: erupu amen a ilpu atimi upene an nuhup unyum.

SALM 141.

1 Ak Ihova, ek ahlaig vai euc ainyak; auroauro um apam ehelek: atahaijeg nohrak, ekuit ahlaig vai euc ainyak.

2 Etmu aridjai nalaigaheni unyak an nuhup unyum et idivaig nitai aua nipin upene; im nadaig jai nikmak et idivaig nitai ahlap an jupura.

3 Ak Ihova, namu ati nitai aminjinaig nipjineucsek aiek; aminjinaig intapaues an narasin nipjineucsek.

4 Etmu jim aiyu inliinmopok ainyak vaig tah nitai has, par ago nauritai has ehele ilpu atimi ago nedo has: ekmu jim caig niji itai upene ura ainyak.

5 Erumu ated nyak a ilpu atimi upene; nedo aiheuc ineigki: erumu ated nyak ara; naraki upene ineigki inyi ti ehtoplec nidjinek: ekpu ago nalaigaheni vai ra ainyak an nohacred ura.

6 Uhuut erekhaigse ilpu atimi alupas ura irai iji uarin et eteuc

nilpau hat iran, erupu atahaijeg intas unyak ara; et idim adale.

7 Er terimterim neduoja an neucsen nehpanitai, et idivaig nauicai et attai tah um ates.

8 Ak Atua Natimarid, et aes pan euc nesganimtak ainyak: ek asgeig iram ainyak: jim ude nyak.

9 Aminjinaig nyak va nopoig eris ati vai nyak, im lep nehpai itai o ilpu atimi ago nedo has.

10 Erumu ebehtau a ilpu atimi auatatimi irai opoig ura, ja ekpu atga upene ainyak.

SALM 142.

1 Kis ahlaig vai Ihova ainyak an nohrak; kis ugni itai ehele Ihova ainyak an nohrak.

2 Kis asaig upene naktaktai unyak ainyak an nuhup o un: kis asuptecnaig nohacred unyak ainyak an nuhup o un.

3 Is wat ohacred inliinmopok ainyak, as ato nefalaig unyak aiek. Eris ati nopoig vai nyak ara an nefalaig ek atga iran ainyak, jam eti asaig.

4 Kis eas an matak ainyak um almoi, ja is eti ato nyak tah natimi: eris eti aiheuc vai nyak; is eti aktaktai nyak tah natimi.

5 Ak Ihova, kis ahlaig vai euc ainyak: kis ika ainyak, Na uarin atpuh iran unyak aiek, im inpadiag unyak, au pece o ilpu atimi umumoh.

6 Aktaktai nahlaig unyak; eris imiasuol acen nyak: imiatamaig nyak va ilpu atimi edemda vai nyak: era esjilid irak ara.

7 Atipagki nyak anli neom ipjin aiek, va ekpu ago naaurineig ainyak vai nidam: erupu arahed irak a ilpu atimi upene; napu idim ago nedo upene vai nyak aiek.

SALM 143.

1 Ak Ihova, namu atahaijeg nalaigaheni unyak aiek, aktakta

intas ugni unyak : namu adai intas unyak aiek an nedo inivajjec unyum im nedo upene.

2 Namu jim ahilek nedo o nheca unyum aiek : et eti upene tah an nuhup unyum,

3 Is atmas vai nyak a natimi tak atimi irak ; is auad se' nyak an nobohtan aien; is atinyak aien mika ki amen ainyak an naupat et idivaig ra sji eigki eris emesmas ara itu acen.

4 Et idim ohacred inliinmopok ainyak : et lep mas inliinmopok.

5 Ek imiehva niiji adiat itu acen ainyak ; ek aktaktai niiji auritai asega unyum ainyak ; ek aktaktai nauritai ira ikmam ainyak.

6 Ek atgeig yi apidi nikmak ehelum ainyak : et idivaig inpece et ti inwai iran inliinmopok ainyak, um mas vai euc. Sela.

7 Ak Ihova, auroauro um atahaijeg, intas unyak : et mas ehni inliinmopok ainyak : jim adinaig nesganimtam aiek vai nyak, va ki jim idivaig ra ainyak era asuol anli nehpan itai ara.

8 Ekmu atahaijeg nedo aiheuc unyum ainyak an nuhialeg : ek idim asgeig iram ainyak : namu asjaaicnaig ehelek aiek an nefalaig ekpu atga iran ainyak ; et aridjai ehelum inliinmopok ainyak.

9 Ak Ihova, namu imiatamaig nyak aiek vai ilpu atimi tak irak : ekpu atpuh ehelum ainyak.

10 Esege imtak mika ki ago nitai merit unyum ainyak : na Atua unyak aiek : etmu atau irak a nesgam upene an nefalaig upene.

11 Ak Ihova, namu imiatamumoh nyak aiek va nidam : imiatamaig nyak va nohacred unyak va nedo upene unyum.

12 Namu lep ahni ilpu atimi tak atimi irak aiek, um auahas ra asega era atijai nohacred irak ara : ek idim aheca unyum ainyak.

SALM 144.

1 Naaurineig vai Ihova inhehteuc unyak, et ika aien yi imjijeuc nikmak u nehtauo, im nupsikmak u nedoa :

2 Inupene unyak im nirahed unyak: neom ipjin unyak im natimi imiatamaig nyak ; nitai atapen unyak ek asgeig iram ainyak ; na imiasuol nup iran pece unyak aiek vai nyak.

3 Ak Ihova, di natimi mika an ato yin aiek ! im inhal o natimi mika an aktaktai yin aiek.

4 Era idivaig intakitai natimi : et idivaig nalmui itai niiji adiat iran et lep ti.

5 Ak Ihova, imiade pam nohatag um asuol sepam : aticei pan niiji edoon etpu lep abes nadiran cop iran.

6 Aticijaig nauainapit aiek, um imiterimterim ra : aticijaig nidjan nafana unyum aiek um auahas ra.

7 Atgeig yi apidi nikmam aiek ijinies ; atipagki inwai esjilid irak um imiatamaig nyak vai nup irai tak aurin ;

8 Era asaig intakitai irai ipji eucsera ara, et lep amen nefaija an matara.

9 Ak Atua, ekpu acesaces nohranitai ainyak vai euc an nohranitai mat : ekpu acesaces nohranitai ainyak vai euc irai salteri et amen inya et ten iran.

10 Aien aigki et imiatamumoh ilpu atimarid aien : um imiatamaig Tevit va nautoga has.

11 Imiatamaig nyak, um atipagki nyak an nikmai nup irai taka pece, era asaig intakitai an nipjineucsera ara, et lep amen nefaija an matara :

12 Erumu idivaig itai ahoag et ededel a ilpu halav atamaig uja an takuras ura : um lep idivaig inhat uri nesvi va neom esjilid :

13 Etmu ohua niiji eom ikni itai uja ira iji itai asega : erumu ahad

SALM, 145, 146.

siip uja um yet pan irai dausant
inyi ahinag acen irai efalaig uja.

14 Erumu emda kurimatau atamaig uja par auritai, uhmu jim athut pam um athut pan; um ti naunyaunig irai efalaig uja.

15 Era mun ahes moiij natimi iji eigki, et Atua ura a Ihova.

SALM 145.

1 Ak Atua, Natimarid, ekpu imiahpas euc ainyak; ekpu asan tas upene va nidam ainyak ira iji mesese

2 Ekpu asan tas upene vai euc ainyak ira iji adiat: ekpu imiahpas nidam ainyak ira iji mesese.

3 Et esjilid a Ihova, et lep upene par imiahpas alupas yin; er eti ato natimi alupas o un.

4 Uhpu imiahpas nauritai unyum an naopan ineig um yet pan irai tak aopan; um asuptecnaig nedo esjilid unyum.

5 Ekpu tas ainyak va natimi alupas unyum et esjilid acen; im lep niij auritai imiali unyum.

6 Erupu tastas natimi va nemda ira auritai imiali unyum; ekpu lep asuptecnaig natimi alupas unyum ainyak.

7 Erupu tastas alupas ara va niij itai imiehva nedo upene esjilid unyum, um acesaces nohranitai va nedo atoh unyum.

8 Et aiheuc vai atimi a Ihova, um tak eris ira ra alupas; et eti auati emda aien, et lep esjilid naiheuc o un.

9 Et ago nedo upene a Ihova vai atimi asega: et lep amen naiheuc upene o un ira iji auritai asega o un.

10 Ak Ihova, etpu imiahpas euc niij auritai asega unyum; erupu lep asan tas upene vai euc a ilpu atimi unyum.

11 Erupu tas ara va natimi alupas an nelcau unyum, um tas va nemda unyum;

12 Um asuptecnaig ehele atimi

nedo emda o un, im natimi alupas esjilid an nelcau o un.

13 Inyi ti lep ti nelcau unyum, et lep amen natimi alupas unyum ira iji mesese.

14 Et asjiraig jai ra asega a Ihova era ebehtau ara, um alcacse ra asega era amen ubo ara.

15 Et aespan euc nesganimtai niij itai asega: na alaa ra nitai caig aiek an naopan upene.

16 Na asalage nikmam aiek um ika eri gaije niij itai umumoh asega.

17 Et upene a Ihova an nedo asega o un, et lep amen naiheuc an niij auritai asega o un.

18 Et amen a Ihova ubutpotet ehele ra asega era ahlaig vai yin ara, vai ra asega era ahlaig vai yin ara um inivaijec.

19 Etpu ago nitai merit o ilpu atimi imtitai yin aien: etpu lep atahaijeg nahlaig ura aien, um imiatamaig ra.

20 Et aminjinaig ra asega a Ihova et aiyu inliinmopura ara vai yin, ja etpu auahas ilpu atimi auatatimi asega aien.

21 Etpu asan tas imiahpas Ihova nijineucsek ainyak: erumu lep ago naaurineig vai nidam itaup natimi asega ira iji mesese.

SALM 146.

1 Akumu imiahpas Ihova aijaua, etmu imiahpas Ihova inliinmopok ainyak.

2 Etpu imiahpas Ihova ainyak an numoh unyak: ekpu acesaces nohranitai vai Ihova ainyak ira iji adiat irak.

3 Akumu jim asgeig irai ilpu atimarid aijaua, im lep natimi, et eti amen nitai imiatamaig caija ehele ra.

4 Et mas aien; et adumoiij pan an nobohtan aien: et lep ti naktak-tai o un an nadiat yehki.

5 Et mun ahes moiij a natimi

ineig et atau imi yin a Atua o Jakob, et lep asgeig irai Ihova aien Atua o un :

6 Is ago nohatag aien, im nobohtan, im injop, im niji itai asega iran : et lep inivaijec aien ira iji mesese :

7 Et ago nedo atoh aien vai ilpu atimi er edemda vai ra ; et alupai ilpu atimi ehtel era nitai caig aien. Et aihiyi ilpu atimi eris arore ra a Ihova.

8 Et asalage nesganimtai ilpu atimi aupat nesganimtara a Ihova : et alcacse ra a Ihova era eteucum-lai ara : et aiyu inliinmopoi Ihova vai ilpu atimi et atoh nedo ura :

9 Et aminjanaig ilpu atimi et eche a Ihova ; et asjiraig ilpu umnij aien im ilpu takata eris emesmas a ilpu atumn ura : ja et ago acalacal nefalaig o ilpu atimi auatatimi aien.

10 Etpu atimarid a Ihova ira iji mesese, Atua o Saion marom, um yet pan ira iji mesese. Alelulia.

SALM 147.

1 Akumu imiahpas Ihova aijaua ; et upene par acesaces nohrai itai vai Atua uja : nedo esjilid ineigki ; et lep upene nimiahpas yin.

2 Et uctaig Jerusalem a Ihova : et asjapicnaig nupu Isreel aien eris terimterim ara.

3 Et ago cehecehe ra sji eigki aien et auatialidi inliinmopura ara, um aso inmocop ira ra.

4 Et esvi niji moihev aien ; et lep anvi nidara asega aien.

5 Et esjilid a Ihova, et lep esjilid nemda o un : et esjilid acen nato itai o un.

6 Et alcacse ilpu atimi upoupo a Ihova : et lep ethaig se an nobohtan ilpu atimi auatatimi aien.

7 Akumu acesaces nohrai itai vai Ihova aijaua um ago naaurineig ; akumu imiahpas Atua uja aijaua a harp :

8 Et alage naupat an nohatag

aien, um ago incopda va nobohtan, um ika yi ededel nefelelicai irai lola edoon.

9 Et alupai niji itai eclim edo irai pece nitai caig incara aien, im lep inhakli reven, era alilaig vai yin ara.

10 Et eti imiacitak nemda o hors aien : et lep eti upene iran nedui atimi.

11 Et imiacitak ra sji eigki a Ihova era imtitai yin ara, ra sji e gka era asgeig an naiheuc o un ara.

12 Ak nupu Jerusalem, akumu imiahpas Ihova aijaua ; ak nupu Saion, akumu imiahpas Atua unyimia aijaua.

13 Is ago ipjin niji itai atapanes unyimia a en ; is ces yi aloai ilpu hal unyimia aien ehelemia.

14 Et ati neigpa aien ira ahaiji pece unyimia, um ika an gaije aiek irai sito upene.

15 Et imiapaahni intas alep o un aien an nobohtan : et athut emda intas o un.

16 Et imiasuol hion aien et idivaig numri siip : et imiterimterim nopogmul aien et idivaig nohpa.

17 Et aticijaig nesgan munuka o un aien et idivaig nahre itai : et emda a di par atidai an nuhup o inyuyu o un ?

18 Et imiapaahni intas o un aien, um ago updak ra : et ika aien yi ehlehel an nimitinjop, et lep yah inwai.

19 Et ebvaig intas o un aien ehele ilpu mapoi Jakob ; intas alep im nedo atoh o un ehele nupu Isreel.

20 Is eti ago nedo et idivaig ineig aien vai nup iran taka pece : era lep eti ato nedo atoh o un ara. Alelulia.

SALM 148.

1 Akumu imiahpas Ihova aijaua. Akumu imiahpas Ihova aijaua an nohatag : akumu imiahpas yin aijaua ira iji uarin ijinies.

2 Akumu imiahpas yin aijaua, ak ilpu agelo o un asega : akumu imiahpas yin aijaua, ak ilpu aheca o un asega.

3 Etmu imiahpas yin nagesega im inmohoc : etmu imiahpas yin inmoijev naunau asega.

4 Etmu imiahpas yin nohatag ijinies acen, im lep inwai et amen ijinies irai ohatag.

5 Etmu imiahpas nidai Ihova nitai iji eigki ; is tas alep aien ja eris par ateuc.

6 Is lep ikni aktit aien ira iji mesese : is asan tas alep vaig aien inyi ti lep ti.

7 Etmu imiahpas Ihova an nobohtan, numu esjilid, im injop ubo asega,

8 Incop, im nesgan munuka ; hion, im inmoso ; nimitinjop alupas et imiaiji intas o un :

9 Niji edoon alupas, im niji edoon tintin asega ; nauicai oho, im sitar asega :

10 Niji itai eclim edo irai pece aleg, im niji itai eclim edo irai pece auata upene asega, niji itai ata has, im inman ae :

11 Ilpu atimarid an nobohtan, im lep natimi asega ; ilpu atimi alupas, im ilpu atimi tastas alep asega an nobohtan :

12 Ilpu takuras im ilpu atahaig : ilpu fatimi, im ilpu halav :

13 Erumu imiahpas nidai Ihova ara ; et esjilid nidan ache ; et esjilid natimi alupas o un irai obohtan im nohatag.

14 Et ika aien yi esjilid nemda o ilpu atimi o un, im nimiahpas o ilpu atimi upene o un asega ; nupu Isreel marom, natimi amen ubutpotet ehelen. Aleluia.

SALM 149.

1 Akumu imiahpas Ihova aijaua. Acesaces nohranitai vai Ihova an nohranita mat, um imiahpas yin an nuhup o ilpu atimi upene o un.

2 Erumu imiacitak yin a nupu Isreel is ago ra aien : erumu imiacitak Natimarid ura a nupu Saion.

3 Erumu imiahpas nidan ara an hutlavlav : erumu acesaces nohrai itai vai yin ara irai timbrel im harp.

4 Et imiacitak ilpu atimi o un a Ihova : etpu aso ilpu atimi upene aien an nitai imiatamaig ra.

5 Erumu imiacitak emda a ilpu atimi upene ; erumu lep acesaces nohrai itai ijinies ara irai tinara.

6 Etmu amen nimiahpas o Atua an nipjineucsera, im nautoga et arig nahaijen im nahaijen an nikmara :

7 Par ago neruvaig irai ilpu atimi aupat, um ated atimi :

8 Um arore ilpu atimarid irai atau hat, im ilpu atimi alupas ura irai itai ahteghaig hat.

9 Um ago neruvaig yehki ira ra eris aged : et eteuc natimi alupas ineigki irai ilpu atimi upene o un. Aleluia.

SALM 150.

1 Akumu imiahpas Ihova aijaua. Imiahpas yin anli neom itaup o un.

2 Akumu imiahpas yin aijaua va niji auritai esjilid o un : imiahpas yin et idivaig natimi alupas esjilid o un.

3 Akumu imiahpas yin aijaua an nohran taho : imiahpas yin a salteri im harp.

4 Akumu imiahpas yin aijaua a timbrel im inhutlavlav : imiahpas yin irai itai et amen inya iran im natarau.

5 Akumu imiahpas yin aijaua irai simbal et ubobo nohran : imiahpas yin ira simbal et ijinies nohran

6 Erumu imiahpas Ihova niji itai umumoh asega. Aleluia.